

繁峙縣志

序

井疆

圖

山川

水利

總目

星野

一

冊

一

冊

原修繁峙縣志序



余延慶人也來繁峙治之樓三
楹顏曰延慶樓乃爽然曰數之
前定或有然乎緣是委身矢志
而恪恭乃職凡邑之田賦差徭
與夫可以改革創建者靡不殫
思竭慮而經理焉治政之暇諮

塗序

一

詢故典偶得縣志一帙乃前令
關中小山王公纂者披閱數次
則紀載雖真而采摭未詳余謂
邑之志卽國之史觀風問俗者
罔不稽焉不詳何以稽不新何
以詳遂慨然有更新之意第縣
事有可以改革可以創建者未

竟其志而志之新猶未也延三
禩之後幸蒙憲使張公石畫謂
邑之舊城非形勢所宜力爲改
革而創建新城於沱水之北地
名龍鬚雉堞巍然甲於全晉廟
市衙署煥乎一新今日之繁峙
大異於昔日之繁峙矣余忻然

塗序

二

曰志其可新矣乎乃敦禮學博
郝君王君屬之總理協以大學
生任君暨張靳畢三庠友開局
於邑庠號舍各秉公持正逾月
而稿成矣始末釐爲上下二帙
首輿地次建置以及食貨官秩
選舉人物而藝文終焉凡七者

其目也詳考其屬四十有奇稽古證今旁求博采視舊帙大備焉志之新不其與邑而俱新乎遂倩工鐫之以廣前修以備觀風閱治者考焉而予素所譚憶者庶幾哉不虛矣嗚呼爲民牧而思以庇吾民者心也卽方域

途序

三

而記其所宜傳以寄諸跡者分也今日之事求以盡吾心畢吾分而已若曰作之自我而使後世有述焉則吾豈敢則吾豈敢豈

明萬曆十五年歲次丁亥秋月
文林郎知繁峙縣事鄉進士延

慶塗雲路撰

塗序

四

原修繁峙縣志序

粵稽古天子有大史小史內史外史之官
掌邦國四方之事達四方之志諸侯亦各
有國史以記言事今之郡邑卽古之列國
今之守令卽古之諸侯今之志言卽古之
外史達四方之志是已志不一而要皆彰
往考來情見乎辭者也繁峙古唐叔地春
秋時晉荀吳嘗敗敵於大鹵今有鹵城在

王序

一

縣東路北卽其遺址實大夏參星實沈之
墟秦以後爲州爲縣遷聚寶寨奈土城弗
堪保障矧地基僻陋而雄才鮮著士之欲
遷也久矣今於萬厯癸未延慶塗公蒞斯
土累觀縣治之形勢輒喟然嘆曰守令者
民之父母爲民父母見子弟之危且困者
忍坐視耶憂民之憂職將誰歸遂慨然思
輯用光爲繁峙定萬億禩安榮計會憲臺

張公天下奇才也心乎爲國爲民僉通方少府周公議請於大中丞許公奏於上可之卽經營區畫爲甄城於舊城滹沱之北龍鬚地面山河環拱奇勢甲於三晉通周道於兩岐丙戌龍見而土功伊始丁亥蟄俯而于焉告成城巒堞治煥然維新泮水甘棠流風千古洵賢矣哉弗可及矣非世之所稱循良者乎邑旣成公乃忻然曰邑

王序

二

之志卽國之史觀風問俗者罔不稽焉邑其新矣志獨不可新矣乎且志以紀事勸懲寓焉余司土之責者也使不有其志則俊城巖疆蔑以表賢哲俊乂蔑以知胡彰往而開來於是禮屬學博郝君太學任君及弟子員張子斡子畢子諸生輩朝夕從事甫閱月卽授之剗劂授簡命余序之夫志記也士心也士有是心而所之弗能達

之遠且久者非志也見諸行事徵諸庶民
澤被當時功垂後世凡有顯迹則記之以
昭某爲士之時心已若此故曰志是志也
若綱若紀若干卷考覈采摭樸略不文有
古遺意中所載若上公盛德至善浹於民
心之不能忘者雖弗克摹寫其萬一然豐
功偉烈昭如日星者彬彬可觀也彼有志
者豈無本源之思哉傳曰君舉必書書而

王序

三

不法後嗣何觀俾後之司土者得稽勉而
爲良以無負志其惟公之盛心亦惟任先
生輩之功不佞忝屬吏荷知遇仰而鳴得
意於觀感興起者重矣遊在千頃中自不
知汪洋釋鄙吝也計日公垂名太史晉秩
期在旦夕矣愚昧敝帚辱在左顧固蚤暮
望
皆

明萬曆十五年歲次丁亥秋月繁峙縣儒
學訓導秦上郡綏德王坦撰

王序

四

章序

一

序代治東六十里為繁峙
縣其地當平刑茹越之
孔道而峻山崇壁尤稱
天險宋端拱中遼人自
大石路南侵知代州張
齊賢簡崞縣繁峙兵應
之遼為繁兵所破明設
宣府鎮播兵三千駐平
刑關以專應援由是觀
之繁誠巖邑也時當承
平沐浴教澤生其間者

曰用飲食蒸然向風幾
不知數百丰來消磨險
阻陶冶而文章之者恩
德如是其周且渥也故
府興章不綦要與予以
未殊方守鴈門宰是

章序

二

邑者為周君人甲欲新
邑志序甫成以事去固
始吳君其均予同丰松
太觀察其泰弟也觀察
天性篤齋所莅有政聲
良得友于助來嗣斯任

相與為繁邑慶今夏五月關以北旱外藩蝗起延入內地所在多有予奉檄督捕蒞事甚速幸不為災其後雨雖降而旱已成代與繁皆曾被

章序

三

蝗而雨澤獨不缺繁尤稔收計吳君自下車後政亦瘁余虔祈禱而甘澍布勤撲捕而蠶賊除前後檄往山陰懷仁稽查戶口散給拯卹農民

帖然其間猶能與繁之
二三人士叅稽故實綜
理微密俾得次第脩舉
以補舊令尹之志之所
未逮非蔽民勤政曷克
辦此關內外苦歎歲久
章序

四

余予方與諸君子交相
警勉專意任興使民知
孝弟力田為本務馴至
順氣成象感召天和上
與下共享太平之福也
善政善教史不絕書其

增光志乘將有駸駸乎
駕前古而上也者幸不
以斯言為河漢也是為
序道光十六年歲次丙申
長至日鴈平觀察使者

章序

五

章沅謹識



重修繁峙縣志序

繁峙邑名肇於秦漢歷代沿革
遷移皆有可考余始蒞茲土訪
邑志不獲久之得李進士所集
并周明府書各四冊而明宰塗
公舊志僅存數版良可慨也顧
余當下車時清獄訟力催科祈

吳序

一

雨澤捕蝗蝻風塵鞅掌日不暇
給欲與諸君子諏詢而補苴之
而有所未逮洎靈澍應祝轉歉
為豐閭閻輯和案牘日以簡邑
人士忻忻然以修志請夫志史
之樸也余何敢擅例具牒請於
上官上官悉可之乃謀於紳士

而簡繕書者採訪者校勘編次者專司度支者同心協力相與講貫余以暇時斟酌其繁省越數旬而遽成成之速蓋因也非創也雖然典禮紀述或未詳人物山川詳矣而未核踵譌闕疑者皆是也而余亟編次以付諸

吳序

二

剗剗者非遽謂成書也懼修書者畏難而輒止止則猶弗修也且以待將來任斯土者討論而增削也因也仍創也夫繁峙負山巖距關塞古為爭戰地域櫓之宜壯庠塾之宜宏武備文事皆邑宰責余不敏曷能舉前人

所未舉者一一經營而擘畫之
敢以餘力與良史爭長耶原志
創始於塗公其時議遷邑城者
吳公同椿太守也越二百數十
年而余竇繼修邑志此數百年
中豈無好事如余者何闕焉弗
講耶其亦有數存乎其間耶是

吳序

三

為序

大清道光十有六年歲次丙申
冬月知繁峙縣事固始吳其均
謹序




繁峙縣志全圖

西十月四日一...




池城




繁峙縣志全圖

全圖




宮 學




繁峙縣志全圖

圖

全




縣署圖





圖

全





參署圖





淳沱落石


繁峙縣志全圖



筆峰




拱秀



繁峙縣志全圖

圭峰古柏




繁峙縣志全圖

九



巖山疊翠



繁峙縣志全圖



峪口



晴嵐



繁峙縣志全圖

十一


臺背冰巖



三泉湧列



繁峙縣志全圖



繁峙縣志全圖





圖 城 現 影



繁 峙 縣 志 全 圖


十四




孤山晚照



嶺 裁



紅燄



繁峙縣志全圖

十六

畫工朱向清

凡例

一志者史之餘也今日之志卽以備異日國史之採摭必當博考羣書廣詢故老遠有所徵近有所據無浮靡以滋疑似

一舊志經兵燹之後板毀編殘司治者每苦於無徵雖郭公續纂於前嚴公繼輯於後又多草率簡畧未葺厥事楚北周公於公事之暇手錄成帙頗爲詳明余又分委四鄉紳士採訪補其未備而猶必錄原纂官於簡端者以不忘前人之

繁峙縣志

卷之一

凡例

盛舉云

一是編志十門二十一類分六十有六綱舉目張條分縷晰使閱者便於查考

一編志必有次第古人畫野分疆仰觀天文俯察地勢故首天文次輿地國以民爲本民以食爲天食貨皆天地所生也次之衣食足而禮義興故次禮儀天佑下民作之君師次職官兵以衛民可千年不用不可一日不備次武備教化旣行人才迭起故選舉人物次之德行本也藝文

末也又次之

聖世不侈祥瑞而災異尤不多見間或有之亦可以徵休咎而考得失故以祥異終焉

一凡縣志多不載天文而以星野統之輿地然考漢唐以來諸史胥以天文志另列專條仰觀俯察各不相淆故特爲標出

一田賦經兵燹之後冊籍無存難於稽考茲本賦役全書參以歲貢常例詳爲釐定書山地以防水衝還林書澤地以防泛溢兼并書平地以防

繁峙縣志

卷之一

凡例

二

隱射飛詭疆界錢糧於斯正焉

一村堡聚落分東西南北四鄉並載離城里數以便編審稽查

一寺觀廟宇除在祀典外如五道神祀之類不書者以別異端以崇正道

一典禮爲經國之要務壇廟祭祀諸儀制雖有成規具藏冊府而繙閱爲難且里巷士民旣無全書難以深知故必詳志之使一目了然

一繁峙武員較他邑爲多所以重邊防也兵馬俸

餉悉照現存額數載入以便稽考

一 歷任秩官凡有功德於民者必爲立傳附入名宦之末以彰有德

一 人物賢良忠孝胥遵通志列入其有續附者必沒後行實人言無間始爲附入至婦女貞節年例已符者卽入或年例未符而已故者亦憫而錄之以表幽芳

一 繁峙古用武之地工詩文者寥寥且地近邊塞名賢罕至題詠亦屬無多間有詩歌可採者以

世代爲先後別類分體

繁峙縣志

修志職名

明萬曆十五年修志知縣 塗雲路

康熙十一年擬修志知縣 郭傑

康熙四十五年擬修志知縣 嚴元疇

道光十五年擬修志知縣 周人甲

道光十六年修志知縣 吳其均

修志職名

卷之一

一

繁峙縣志

督修

分守雁平大朔寧忻代保兵備道兼管水利事務 章沅

直隸代州知州 張維勤

署直隸代州知州 長惠

總修

繁峙縣知縣 吳其均

分修

繁峙縣教諭 祁采

修志職名

卷之一

二

平刑關巡檢 王長年

繁峙縣典史 夏校

繁峙縣志

修志紳士

經理

候選州同 宮德潤

監生 侯國棟

分校

辛卯科舉人 糜天爵

原任永寧州訓導 高慎修

拔貢候補旗官學教習 宮步霄

修志紳士 卷之一

一

採訪

候選縣丞 張紹高

署朔平府教授 郭永發

署左雲縣訓導 李光乾

歲貢生 劉鵬化

歲貢生 張通淵

廩貢生 宮三台

廩生 張心鑑

繕書

拔

貢

生 郭大生

廩

生 韓作霖

生

員 宮耀南

生

員 郭端

修志紳士

卷之一

二

目錄

卷之一

天文志

星野門

輿地志

井疆門

沿革

疆域

關隘

驛站

山川門

水利門

繁峙縣志

卷之一 目錄

一

渠堰

津梁

卷之二

建置門

城池

公廨

倉廩

學校

街市

集場

都里

村莊

壇廟門

壇廟

寺觀

邱墓門

古蹟門

景致門

風俗門

食貨志

田賦門

田糧

丁徭

起運

留支

正餘稅銀

振武衛歸併本縣

卷之三

物產門

穀類

果類

菜類

木類

繁峙縣志

卷之一 目錄

二

藥類

花類

畜類

禽類

獸類

鱗蟲類

土石類

禮儀志

典禮門

祀典

公式

武備志

武事門

兵制

俸餉

防汛

武功

職官志

官制門

額官

歷官

卷之四

名宦

選舉志

科目門

甲科

乙科

武科

貢生

恩拔副歲

例貢

例員

里選

封贈

卷之五

繁峙縣志

卷之一 目錄

三

人物志

鄉賢門

篤行

文人

倫紀門

忠

孝

義

節烈

仙釋門

卷之六

藝文志

藝文門

疏書記序傳

解銘詩賦雜體

祥異志

祥異門

繁峙縣志

卷之一

目錄

四

天文志

星野

考周禮保章氏以星土辨九州之地即星野之權輿蓋使人仰觀俯察以驗休咎知警備也自漢龍門司馬氏著天官書而晉以來遂行躔次之說以列宿紀躔次以躔次定分野郡邑廢置無常而經緯不易左傳后帝遷實沈於大夏主參唐人是因後成王滅唐而封太叔焉故參為晉星繁峙於漢隸代州之東則為參井分野無疑矣志星野


繁峙縣志

卷之一

一

山西通志繁峙參井分野

代州志冀州實沈之次申宮晉分參井分野參十度半井三十四度不盡於晉半入陝太原屬參井之交則代屬參分參星西脚入玉井則西入玉井者正代州星野之分度繁峙崞縣胥同參井惟五臺屬畢星



步天歌云參是七星觜相侵兩肩雙足三爲心伐有三星足底伸屏星兩扇井南襟軍井四星屏上吟左足下四天廁臨廁下一物天屎沉


參十度上爲五星日月中道甘氏曰參爲忠良孝謹之子明大則臣忠子孝安吉一日參伐一日大辰一日天市一日鈇鉞又爲天獄又主權衡所以平理也又主邊城爲九譯故不欲其動也參白虎之體其中三星橫列三將也東北曰左肩主左將西北曰右肩主右將東南曰左足主後將軍西南曰四星在參西右足下水象也

春秋元命苞太原參井

漢天文志晉之疆候辰星占參伐

唐天文志觜觶參伐實沈也初畢七度終東井八度宋兩朝天文志參十里距中星西第一星去極九十二度半玉井四星距西北星去極九十八度少入畢宿十一度半

井 宿 圖



步天歌云八星橫列河中靜一星名鉞井邊安兩河
 各三南北正天罇三星井上頭罇上橫列五諸侯
 侯上北河西積水北河東畔覓積薪鉞下四星水
 府名水位東邊四星序四瀆橫列南河裏南河西
 下是軍市十三圍中一野鷄孫子丈人市下列各
 位兩星從東說闕邱兩星南河東邱下一狼光蓬

繁峙縣志

卷之一

葺左畔九箇灣弧弓一矢擬射頑狼胸有箇老人
 南極中春秋出入壽無窮

井三十四度甘氏云井八星在河中主泉水日月五
 星貫之為中道石氏謂之東井亦曰天井主諸侯
 帝戚三公之位故明大則封侯建國張衡云天之
 南門也黃道所經為天子之亭候主水衡事法令
 所取平也王者用法平則井明而端列

附考

漢地理志燕地尾箕分野也西有上谷代郡雁門

圖書編山西諸郡太原參井分野平陽觜參分野潞
安參井分野汾州參分野大同昂畢分野澤州觜
參分野遼州參井分野沁州參井分野是山西諸
郡三觜參四參井惟大同爲昂畢也

輿地志

井疆

沿革

疆域

關隘

驛站

國家畫井分疆所以別區域徵因革知要害也自虞舜肇九州為十二州夏復並為九州商周因之而制不同秦漢而後遞有沿革即如繁峙時而隸太原時而隸雁門時而改為郡時而升為州分合無定名號亦殊我

朝損益前代以繁峙隸代州規畫可謂盡善矣而歷代沿革抑有宜遞稽而互覈者存掌故也至於謹

繁峙縣志

卷之一

五

關隘以固邊圉規遠近以置驛郵皆司土者所宜留意也故並志焉

沿革

地表

唐

屬冀州

虞

屬并州

夏

仍屬冀州

商

無考

周

職方并州之地

按成王封弟叔虞爲唐侯後改爲晉時邑內卽有霍人霍音瑣括地志以爲在繁峙界內左傳襄公十年夏五月甲午滅偃陽使周內史選其族嗣納諸霍人

秦 郡縣天下爲繁峙縣屬雁門郡

漢 仍名繁峙縣屬雁門郡

按漢時境內之縣有三一曰鹵城屬代郡一曰葭人卽霍人在今聖水村東古城地屬太原郡一曰繁峙屬雁門郡在渾源州西山之崞口有

繁峙縣志

卷之一

六

繁峙故城

後漢 葭人罷鹵城與繁峙同隸雁門郡

魏 改峙字爲峙字

晉 鹵城罷復有葭人與繁峙同隸雁門郡
以後鹵城葭人尋廢

北魏 置繁峙郡隸恆州所屬有繁峙崞山二縣此崞山亦在渾源州非今之崞縣也以四山皆郭後所改廓州北顯州皆此

東魏 置武州

北齊 改爲北靈州尋廢

隋

開皇十八年復爲繁峙縣

唐

聖歷二年改建於滹沱河南因聚寶寨

爲城

宋

屬代州

金

真祐三年改置堅州隸太原府

元

堅州隸冀寧路

明

洪武二年復改爲繁峙縣屬太原府代

州縣治仍在滹沱河南至萬曆十三年知縣

塗因舊城不堪見龍鬚地規勢雄狀實堪保障

繁峙縣志

卷之一

七

且爲晉代通衢遂改建河北有于翰林碑記

國朝

代州繁峙縣雁平道雍正二年直隸代

州

史記周勃世家降下霍人或曰霍人卽今繁峙縣

霍音瑣一作葆存疑

又史記趙破林胡樓煩築長城自代並陰山下至

高闕爲塞置雲中雁門代郡註代今蔚州樓煩註

古胡地嵐勝等州是顧錫疇綱鑑正史約註樓煩

今代州繁峙縣按樓煩子爵周王會圖有樓煩子

今靜樂縣馬家莊之東有樓煩王城卽其遺址唐置監宋金置縣元省爲巡檢司代州西三十五里有樓煩鄉崞縣東十五里有樓煩城北魏志原平縣有樓煩城原平今屬崞縣輿地要覽云樓煩故城在今太原府崞縣東以此考之則古樓煩地應在代州迤西非今繁峙縣也正史約註恐誤後漢光武紀杜茂與賈覽戰於繁峙註繁峙縣名屬雁門郡今代州縣

晉隆安二年二月魏主珪至自伐燕居繁峙宮尹

繁峙縣志

卷之一

八

耕曰必在盛樂或近盛樂地非今繁峙縣也昭成帝什翼犍卽位於繁峙之北時或建宮且猗盧從劉琨求勾注陁北之地琨徙馬邑陰館樓煩繁峙崞五縣民於陁南更立城邑則漢之繁峙本在雁門關北也

舊唐志代州繁峙漢縣東魏置廓州又廢

唐隸代州明一統志隋徙治武州城唐又移今治

疆域

繁峙縣在太原府東北三百八十里代州東六十

里東西廣一百五十里南北袤一百六十里
東南至南京二千八百里至

京師都城八百里

東至大同府靈邱縣界平刑營一百三十里石橋
界一百三十五里

西至代州界東留屬村十五里至代州治六十里
南至五臺縣界大明烟八十里華巖嶺一百里五
臺縣治一百五十里

北至大同府應州界茹越堡六十里應州治一百
里

東南至直隸正定府阜平縣界韓家莊一百五十
里

西南至五臺縣峩嶺八十里至崞縣治七十里

東北至大同府渾源州界太安嶺一百三十里渾
源州治一百二十里

西北至大同府應州界馬蘭口六十里大同府山
陰縣界胡峪堡六十里山陰縣九十里

關隘

茹越口堡縣北六十里明正統十年築東至小石口堡二十里西至廣武城南至縣六十里北至大同府應州四十里

應州南三十里爲茹越北口龍灣山南四十里爲茹越北口宋志有繁峙茹越大石義興冶寶興軍瓶形梅回麻谷八砦金志繁峙縣有茹越口

後唐清泰中詔應州修茹越口

遼以雲州爲西京則茹越之路自通

明正統十四年九月瓦剌繇茹越口入掠忻崞繁

五臺明史舊有茹越口巡檢司尋廢

小石口堡縣東北八十里明正德十一年築東至北樓城三十里西至茹越口堡二十里南至繁峙縣界四十里北至大同府靈邱縣界二十里設巡檢一員尋廢

應州東南三十里大石口同

小石峪北二里有大石峪水隸應州小石峪有小石峪水隸應州

大石口堡縣東北八十里明正德十一年築

宋端拱元年遼人自大石路南侵知代州張齊賢預簡廂兵千人爲二部分屯繁峙崞縣下令曰代西有寇則崞縣之師應之代東有寇則繁峙之師應之比接戰則軍兵集矣至是果爲繁峙兵所敗宋張耆言契丹雲應蔚朔四郡間遣人以文移至并代非觀邊虛實卽欲察識道路宜密諭代州自雲應蔚至者由大石口入自朔至者由土陞入餘間路塞之以示險

金志繁峙縣有大石鎮

繁峙縣志

卷之一

七

北樓口城縣東北一百一十里東至平刑關六十里西至小石口堡三十里南至繁峙縣界四十里北至大同府廣昌縣界二十里

北樓口南通郎嶺關北樓北口在應州東南四十里

明正德十一年城北樓諸堡凡十有一並設北樓倉

嘉靖二十三年置游擊將軍別爲營駐北樓口三關參將守備分駐北樓各一員

唐武德七年顏利願款北樓關請互市上不之拒胡松答翟中丞書雁門守備雖管帶其地然設在代州勢難遙制且代城甚堅其中固有代州振武衛與按察分司自足捍禦改置北樓口使備東十隘

王家屏三邊修守記甃二城北樓廣武增築土堡六古計砂澗福連坊太管屯黑圪塔中莊

助嶺關舊名狼嶺縣東一百里應州南四十里路通應州界振武衛守備關下有馬跑泉明洪武十

繁峙縣志

卷之一

三

七年築

平刑關縣東一百三十里接靈邱縣界實通

京師孔道也一名瓶形雁門關東二百三十五里西北連渾源州大寨口南接正定府阜平縣界平刑營東至阜平縣界三十里西至縣一百三十里南至阜平縣界十八里北至大同府渾源州一百二十里

明設守備一員百戶一員征操馬軍五百名守堡旗軍一百八十四名統平刑嶺團城子太安嶺葫

蘆頭四隘口

金志繁峙縣有瓶形鎮

宣府鎮摘兵三千在平刑關駐劄專應援吳王口
別鎮三千在廣昌縣駐劄專應援浮圖峪插箭嶺
等處

嘉靖二十三年巡撫都御史曾銑議大城雁門長
城自老營了角山至平刑關東八百餘里

楊博據要害疏大同則當守渾源靈邱廣昌銀釵
驛馬等嶺協同保定鎮巡固守紫荆倒馬馬水口

繁峙縣志

卷之一

十三

等處便不能越關而南山西則當守陽方神池老
營堡偏官等處使不能越關而西其五臺繁峙平
刑在關外尤當一體戒嚴

明設平刑軍站去砂澗驛太白驛各七十里

平刑關巡檢司雍正九年巡撫石麟

題請繁峙縣平刑關距縣治一百三十里路通直隸
深山曲徑甚屬險要應裁平刑倉大使設平刑關
巡檢專司巡緝兼理倉務

平刑嶺口去關城三里近修城垣

團城口在縣東北一百三十里接渾源州界
葫蘆口在縣東北一百里亦要路也

凌雲口在縣東北八十里修築邊城始固

馬蘭口縣西北六十里代州應州界

翁萬達疏自馬蘭峪起東至平刑關止爲垣三十
九里塹十之一增添墩臺五舖屋十五品窖一萬
六千九百四十五

明嘉靖二十年虜從代州掠歸三十七年屢從代
口入知縣王三益追之斬獲虜酋一級戰馬三匹

繁峙縣志

卷之一

古

車道場口北樓營迤東南官兵雍正十二年裁減
太安嶺口北樓營迤東東至鶴子溝澗十五里迤
東接平刑營汎南至大營堡三十二里西至下角
峪石罅嘴三十里迤西接北樓營汎北至石罅嘴
二里迤北接渾源營汎

翁萬達疏自太安嶺起東至平刑關三嶺子盡境
止爲垣七十三丈增添墩臺八十九舖屋一百六
十七品窖一萬四千七百四十八

臺懷鎮大明烟西六十里至峩口接代州東路汎

獅子窩東至金閣嶺接五臺縣地

東城嶺在縣西南

峩嶺東南五十里越嶺在五臺大栢舖

西瓦廠村縣南五臺界由東瓦廠村上金嶺八臺

山

白坡頭口在縣東南 百二十里一統志沙河源

出繁峙白坡頭

南峪口在縣東南七十五里入五臺山路

峩口在縣西南二十里入五臺山路

繁峙縣志

卷之一

五

鐵櫛嶺在縣北三十里亦要路也

堡

故縣堡

三泉堡

砂澗堡

大白堡

楊興堡

斥埃

西關墩

北峯墩

楊興墩

聖水墩

下茹越墩

永興墩

羊腦墩

砂澗墩

許秀作墩

金山墩

龍山墩

三泉墩

舖

楊興鋪

在城總鋪

華巖鋪

永興鋪

沙河鋪

金山鋪

三泉鋪

孤山鋪

平刑鋪

按繁邑地雖彈丸實爲全晉咽喉並是備邊要地界於南北二山之中北控十口南連五臺十口舊在山前今在山後謂之後口其地延袤百餘里村莊百餘所晉代三藩占爲莊至動兵革後皆勘革還林謂之禁山林本封植爲山西藩籬縣治雖十八里而東西南北周圍數百餘里

繁峙縣志

卷之一

六

軍民雜處養欲給求費用浩繁兼之地理寫遠最爲難治有志化理者宜於此急爲注意焉

驛站

砂澗驛西接代州雁門驛一百二十里至繁峙縣六十里接平刑站七十里平刑站東北接靈邱太白驛七十里此孔道也若縣北六十里至茹越口東北八十里至大石口小石口東北一百一十里至北樓城此孔道而實峻山崇壁險道也大小石口尤名天險若東北六十里至馬蘭口東一百里

至朗嶺關西南至東城嶺南至西瓦廠東南至峩嶺此爲山徑小道也

砂澗驛舊設馬騾三十二匹頭馬夫十六名歲支銀八百六十四兩

今設馬十七匹撥協樂平縣馬三匹撥協平定州馬二匹現養馬十二匹每馬日支銀九分八釐馬夫六名每名日支工食銀三分每年共支銀四百五十七兩五分六釐

三泉廠夫額設夫二十八名歲支銀一百六十五

兩二錢五分九釐零每名日支工食銀一分六釐三毫九絲四忽八微三塵三渺二埃一漠

平刑驛舊設馬三十五匹頭馬夫一十七名半歲支銀七百三十二兩九錢五分九釐零

今設馬十七匹撥協賈令驛馬三匹甘桃驛馬二匹現養馬十二匹每馬日支銀六分六釐七毫七絲七忽七微七纖七沙七塵七渺七埃七漠夫六名每名日支工食銀三分一年共支銀三百五十三兩二錢八分

山川志

山川

粵昔柏翳著山海經十八篇又著嶽瀆經爲志山川者所自昉於以考方輿審形勢申畫郊圻慎固封守以及秩祀之典遊觀之景胥於是乎備繁峙左連五臺之勝右接三關之雄崇巖峻嶺延袤三百餘里皆恆嶽之餘裔也而滹沱一河長流如帶縈村抱郭亦可以考古而利民焉志山川

山

繁峙縣志

卷之一

六

泰戲山縣東北百二十里一名孤山明一統志俗名小孤山

五臺志泰戲山在北臺東七十里

章懷注山海經云泰戲之山滹沱之水出焉在今代州繁峙縣東

鳳翅山在縣東北北近大石口南連上永興一帶
懸山在縣東八十里峻聳崎嶇陟此難辨方正

清涼山志云昔有梵僧從魏文帝乞一卧地帝許之展卧具覆五百餘里帝知其神駭之梵僧馳騎

而去山隨之帝曰爾憇耶山遂止故名

象梳山在縣東北峯出如梳故名

華巖嶺在縣東九十里在東臺西北十五里

馬蘭峪縣西北十里

公主山縣東南二十里相傳拓拔氏女潛遁修佛行後追兵繼至乃避入石巖中以火焚之大雨如注至今遇旱積薪焚峽雨輒應號娘子巖東北邊石有手足跡

馬鬃山縣西南二十里橫互盤踞峩河之東以形

似名

小五臺山縣東南二十里白雲先生隱居於此曰此亦小五臺山也可以棲跡修行

峩嶺縣西南八十里當秋紅葉滿山如流霞布錦寶山縣東南九十里鑿礦掬砂燒煉成金故名南峪在縣東南七十里有洞爲懸空寺層巖疊嶂時有雲氣

筆峯山縣正南二十里三峯並列宛似筆架與縣治相對每當晴空遠眺嵐翠如在目前

白坡頭在縣東南百二十里一統志沙河源出繁
峙縣白坡頭

靜明山在縣正南十里三峯中立兩巒外張爲縣
屏山內有仙人洞雲氣縹渺又名九龍戲龜之形
通志爲端橫嶺

圭峯山縣西南三十里面前峯峙如圭有滴水巖
仙人掌奇峯拱秀上有古柏龍榦虬枝干霄直上
莫稽其始

代志圭峯山在代州東南五十里本豐而未攜象
繁峙縣志

卷之一

三

圭之終葵山下明月巖其石象月盈時東澗有峯
千巔石竅洞開名穿心洞俛入洞口輒高朗可容
數十百人宋末夏丞相姪吉祥避元兵於此明正
德八年敵大入棲洞者俱不及難

巖頭山縣西南六十里延袤八百餘里南連太行
石崖巉巖此爲其首有龍洞春夏之交樹木葱蘢
峯巒青翠足可怡情又有秘魔岩秘魔師修行於
此

大孤山縣東一百二十里泰戲山近法池口三峯

孤峙於平川之內諸山皆晚獨此山猶餘夕照其東又有小孤山

茹越山縣北二十里有谷路通大同越渥敗至此山元兵獲之恨奮吞茹故名

龍山縣東北六十里似二龍相戲亦恆山之餘峯也

鐵櫺山縣北三十里有蕭太后梳洗樓爲縣之鎮山

又俗傳太原府鎮鐵樓之根也俗名鐵角嶺一名鐵脚山有池清澈

繁峙縣志

卷之一

三

如鏡雲氣潏然蓋龍湫也

沒淚山縣東北九十里土人相傳蕭太后登此山哭而沒淚故名俗呼爲木累陀

平地嶺在茹越東北百餘里

北臺山名叶斗峯縣東南九十里臺高三十八里平廣周三里背屬繁峙盛夏見雪有萬年冰康熙二十二年秋八月

御題冰風二字匾額康熙元年旱禱雨泰華池祠忽雷電大作空中墮冰一片長一丈三尺濶七尺厚四

尺餘上皆茅土人皆以爲臺背冰也

王老崖縣南二十五里有石洞內出包金土爲聖
壁之用

唐山五朝志雁門郡繁峙有長城滹沱水派水唐
山

鉞山穆天子傳庚辰至於鉞山之下癸未雨雪獵
於鉞山之西阿於是得絕鉞山之隊北循滹沱之
陽是鉞山當隸雁門關東隘諸山也存以俟考

川

繁峙縣志

卷之一

三

滹沱河源出縣東百三十里泰戲山流甚微涓涓
如瀉壺色青黑列如品字西南流三里至故福都
合玉斗泉一名青龍泉西流數里名三泉都其泉
列如品字又西流至下匯村伏地中四十餘里至
永興村復湧出西合華巖嶺水經縣城南西入代
州界納峩口河水又經崞縣五臺至忻口三百餘
里始東流入直隸正定府平山縣界至直沽入海
周禮職方氏并州其川滹沱

禮記晉人將有事於河必先有事於惡池陳澔註

惡池并州川之大者河之從祀惡當爲呼聲之誤
通典滹沱發源在今雁門郡繁峙縣界通考同繁
峙有滹沱河源出縣東南孤音阜阜山

漢志代郡鹵城縣庫池河東至參合入滹沱別并
州川從河東至文安入海過郡六行千三百七十

里顏師古注滹沱出鹵城

章懷注山海經云秦戲之山滹沱之水出焉在今
繁峙縣東流經定州深澤縣東南卽光武所度處
今俗猶謂之危度口

繁峙縣志 卷之一

三

元和志滹沱水出代州繁峙縣秦戲山西南流逕
唐林縣東又西南逕崞縣東又西南逕秀容縣東
東轉逕定襄縣北又東逕五臺縣西南又東逕孟
縣北

元志秦定四年八月都水監廉訪司正定路及瀕
河州縣洎耆老會議言滹沱其源自五臺諸山來
至平山縣王母村口下與平定州娘子廟石泉台
河合夏秋霖雨水漲瀰漫城郭每年勞民築堤莫
能除害宜自王子村新安村鑿河長四里餘接魯

家灣舊澗復開二百餘步令人治河可以分殺其勢

石瑤泛滹沱河賦出自繁峙經於代谷放乎雁門之坂帶於泰山之麓朔方巨嶽實扼其胸恆衛諸流半入其腹

薛士龍曰衛水東北合滹沱河

氣吞萬壑激碗礪而未平勢應三泉墮平原而愈蹙

品字泉在大營東南北流合滹沱河

明喬宇滹沱河源記自王莊驛西行五十里道瓶形關飲孤山村下村以小孤山而名迤西有三泉

鼎開相去僅五十步皆幅員尺許瀟涌正出浮清泄瀾皎然不污故得保其明潔趨繁經代達於平山會於常山爲黃潦之流而歸於海泉之最顯於晉者以此

華巖水縣東南一百里稍灌民田然遷徙不常經冶子場獅子坪東山底南峪口西北流入滹沱

黑龍池縣東南九十里北臺山頂西流三十里入巖頭河經海子諸村流合滹沱

秦華池縣東南百里深不可測禱雨多應水入滹

沱明景泰時常勅祭焉

峩河縣二十里源出於中臺太華池水經云峩谷之水出於中臺是也經巖頭諸村流九十餘里始出山口西岸口屬代州東岸溝子屬繁峙二處互爭水利疊訟不休萬厯間始均分之立石於村口龍池在縣北鐵櫛嶺下廣丈餘深莫測遇旱求水最靈明邑令張壽蔣瓚皆禱焉

泃水見前唐山下說文泃水起雁門後人皮夫山東北入海

柏家莊河縣東北源出莊西北山下雖寒猶暖南合鹵城龍池河入滹沱

冶口河縣東北經砂澗驛入滹沱

小冶河出縣東北小冶村西北山下南經砂澗驛入滹沱

雙井河出縣東北石梯山下南經上永興村入滹沱

茹水出縣北鐵角嶺分東西二支東至蘇孟莊經上寨下寨下茹越入滹沱西至郭家莊經趙家莊

聖水村繞縣南流入滹沱

青龍池在縣西北后殿村禱雨輒應有祠乾隆六十年重修

馬峪河在縣西北經高陞寨西莊南入滹沱

打鷹泉在縣南二十里知縣周銘詒祈禱卽時大雨如注

靈應泉在縣西南五里邑民禱雨多應

九龍泉在縣東北二十里后掌村知縣楊元興禱雨必應

七股泉在縣正南十五里澤萌泉峪內天旱禱雨必應

大海泉在縣西南

白龍池在縣南十三里澤萌泉南山上有白雨龍王廟

馬跪泉在縣東一百里狼嶺關下

鳳凰泉在縣西南二十里

水利 渠堰 津梁

晉省山高水急不易蓄瀦瀕河居民每多開渠築堰以資灌溉隨宜蓄洩俾無棄利亦善政也繁峙居兩山之間山水漲發易盈易涸不能設立渠道近來瀕河村莊亦有引水灌田者故特志之以爲農事之勸至津梁掌之司里以濟不通亦水利之一端也因附志焉

渠堰

滹沱河渠源出泰戲山西南流數里合玉斗泉水

繁峙縣志

卷之一

三

又數里合三泉水至砂澗東合北樓口水至新興村合華巖嶺水西入代州自上而下水勢陡瀉遇山水暴漲一湧輒涸向未設立渠道比見永興下茹越等村亦多開渠引水灌地而水利之事漸興矣舊志滹沱河渠灌永興大溝子下茹越富家莊華岩村梁家莊福連坊作頭村聖水頭鐵家會杏園村古家莊北峯村東留屬地

峩河渠縣西南二十里發源黑龍池流經巖頭等村九十餘里出峩口東岸屬繁峙西岸屬代州二處互爭水利布政司臧判曰水源出自繁峙末流

始經代州豈末流獨專其利而發源無涓滴之沾乎嘉靖二十年復訟權監司李判云水利來自繁峙經由代郡卒遇歲旱亦當均分至萬曆十五年始奉道府公分之立石村口以爲後世遵守云

舊志

峩河渠溉峩口村佛光莊上下木角村高陵村南留屬地

按代州有峩河渠又有滹沱河渠俱始立夏日按時日分水程自上而下以次引灌渠頭司之二水胥經繁峙諸村但勢處上游不易瀦蓄至代州境勢漸平坦始能設立渠道故代州民食

繁峙縣志

卷之一

三

水澤獨深於繁峙

南峪口渠在華巖嶺發源溉東山底山會村南峪口村地

冶口渠在縣東六十五里溉孫家莊義興寨冶口下匯村地

津梁

普濟橋在平刑關石澗明萬曆三十七年七月善人白珠募建

京都孔道也後被山水沖激雍正十三年七月重修

滹沱河橋在城南門外

按滹沱河木橋冬修春拆或謂甃石爲之則可
裨久遠不知滹沱橋不可石甃以石至岸邊輒
匯於沙故俗以滹沱落石爲一景雖欲爲一勞
永逸之計不可得矣

西關橋在西門外

古家莊橋在城西

峩河橋在縣西南五臺山去路

華巖橋在縣東

繁峙縣志

卷之一

五

永興橋在縣東

雙井橋在縣東

沙河橋在縣東


南峪口橋在縣東南

下匯橋在縣東

大營橋在縣東北

繁峙縣志卷之一終





繁峙縣志

建置 壇廟 邱墓 古蹟
景致 風俗 田賦

冊二



建置

城池 集場

公廨 都里

倉廩 村莊

學校

街市

國家建都設邑蓋以捍外衛內施政設教者也繁
邑遭劉遷之變城垣廬舍焚燬殆盡百餘年來膺
斯土者補葺經營規模漸備休養生息蒸蒸日上
上理焉雖興廢不同而致治之心則一修舉之責
實存乎其人耳志建置

城池

繁峙縣城唐聖歷二年建舊在滹沱河南明萬曆
十四年知縣塗雲路嫌其南近山麓北臨河岸且

繁峙縣志

卷之二

一

城市高下崎嶇申上遷建於河北岸龍鬚之地周
圍四里有奇高三丈五尺池深一丈五尺水從東
北周流南入於河城三門東曰和豐區曰拱衛神
京西曰安阜區曰屏翰全晉南曰淳簡區曰襟帶
山河各有樓稱門之制角樓四視門樓具體而微
敵臺十有三級上各有樓城中鼓樓一雄偉聳峙
稱壯觀焉學校廟宇公廨民廬條理井然新建東
關店宇整齊民居稠密真金湯之固也迨

國朝順治五年逆賊劉遷據城焚燬殆盡知縣張志

高重修周圍四里東西長一百六十丈南北濶二百丈共八百六十一丈五尺連堞墻高四丈三城門三甕城城樓三座規模復舊制焉康熙四十年知縣齊士琬修乾隆三十一年知縣戴一仁領帑重修

砂澗驛城周二里有奇高三丈東西二門角樓六燬其半

砂澗驛井在驛前驛舊無井取濟於河但河水泛溢無常有時困竭驛爲通

京孔道皇華策遣往來不絕加之民居稠密市廛穴集其資於水也大矣邑侯戴公募工浚之閱兩月而井成迄今沐公之澤者無殊耿公拜水之賜云

公廨

縣署在城西北新順街隋開皇初置武州徙治城中大業間移縣置武州城屬雁門郡唐復移今治宋屬代金陞爲堅州元因之明洪武二年改爲繁峙縣洪武六年知縣禹義貢建署萬厯十四年始由滹沱河南遷治河北知縣塗雲路建今署

國朝順治五年劉遷作亂公署盡燬六年知縣張志高來宰是邑架木殘廟之中侍從皆露立越二年乃謀修葺建蓋堂廡雖視舊制稍遜而敷政臨民之規立矣

公署大堂五楹分東西二間爲庫 二堂五楹過堂一間 三堂五楹 內宅正庭五楹東西房各三間 東西正書房各三間 閒房東西二間儀門三楹 大門三楹 吏書房八間 快阜民壯房各三間

繁峙縣志

卷之二

三

以上乾隆四十一年知縣鄭如玉重修

今署連門樓共房七十七間百餘年來興廢改建固有不同耳

典史署在縣治西偏

大門一座 大廳三間 二廳三間 內宅正庭三間 書房三間 吏役房四間

以上皆邑尉王嘉錫建亦隨時興廢不同

砂澗驛舍郵廠俱燬驛丞陶奇英建 馬神廟一間 樂樓三間 住房五間 馬廠房十間 今

裁驛丞馬廠移置城內縣署大堂東偏砂澗驛舍
改爲稅廳

巡檢署在平刑關

監獄在縣署二門內西邑尉王嘉錫倡修

乾隆五十五年

知縣陳蕃嗣

甄垣以甄

養濟院三間在縣城西南隅邑侯郭傑修

普濟堂在西甕城內今爲關帝廟

育嬰堂在西甕城內今爲關帝廟

牌樓一座知縣鄒曉建匾曰盤根錯節

繁峙縣志

卷之二

四

鼓樓一座在城中央崇臺南北洞開上有樓祀

文昌帝君康熙二十七年知縣劉棻建匾曰聲聞遠

震樓北匾曰三關耳目旁鐘鼓樓知縣周銘詒建

坊二在永豐街東曰騰蛟西曰起鳳知縣田成玉

建乾隆四十二年知縣仇恂重修

叅將府署在西門內永豐街康熙五十二年邑侯

齊公奉憲修

大堂五楹 二門三楹 大門三楹 鼓吹樓二

座 東二亭三間 西書房三間 后住宅正房

五間 東西房各三間 箭道房三間 東官廳
轅門 營房三百間 兩司庭堂住宅全

以上皆北樓營守備王縣尉夏董其成

演武廳五楹在西門外教場知縣郭傑修

將臺一座 轅門一所今廢

千總署在縣署東北

布政司舊治燬

察院舊治燬 向在縣治南

官亭舊治燬

舊有延賓館申明亭旌善亭各三楹
又張家莊有接官亭一所三泉廠有

繁峙縣志

卷之二

五

公署一所署內管廠官亭
三間夫房二十間皆廢

進士坊在東大街爲進士糜有象立今燬

倉廩

預備倉在二門外共八十三間

北樓倉正廩房六間 南廩房二間今廢

平刑倉在平刑關巡檢經理

社倉五處倉正副經管

義倉四處倉正副經管

學校

儒學在縣治之巽地東南至城下龍道西北俱至
民居地勢方廣元至正初建明洪武三年縣丞劉
議修成化間知縣李芳張壽嘉靖七年知縣于隆
先後增葺順治五年劉遷之亂盡燬止存大成殿
十七年廣文吳國儒始合諸生謀之曰吾徒雖蔽
袍鶉衣忍令

先師風雨乎各量力出貲期年而廡戟門墻煥然新
焉

大成殿五楹 東西廡各五楹 戟門三楹

繁峙縣志

卷之二

六

櫺星門三楹

康熙四十七年知縣齊士琬重修

崇聖祠三間在大成殿東北知縣郭傑建

文昌閣在崇聖宮南

奎昌樓在東城頭吳國儒建坐東齊士琬改坐南
教諭侯繼周改坐東南

名宦祠三間在泮池東

鄉賢祠三間在泮池西

節孝祠在龍門東南

泮池坊二齊士琬修

明倫堂五楹 龍門坊一 儒學大門三間戴聖
建齊士琬修

教諭宅在明倫堂西正房三間東西房六間鱸堂
三間小正房二間南庭三間教諭梁樞重修

訓導宅在明倫堂東正房三間東西房六間半山
堂三間火房一間南庭三間道光十二年裁訓導
缺

義學向在三官殿今建北靈書院遂廢

義學向無成規康熙四十三年知縣嚴元疇莅繁

下車首重文學詢及鄉會試不開科近百年因仍
舊制立義學定日期課諸生乙酉秋闈韓煥中副
車自是諸生踴躍公益忻然政治之暇不倦於訓
誨

北靈書院在西順街北乾隆二十八年知縣李鳳
集建

正庭正間 東西房六間 禮門一 講堂五間
東西房十間 大門一

峩口水地四十畝

南關河灘地一段伍十二畝

寬坪村官地一股

河家會村地七十四畝五分

下狼澗沙地五十三畝

上永興紅溝門地二十六畝

以上租稞爲山長修金之資

書院生息錢三百千文以一分五釐起息每年得
息錢五十四千文 禮房紙筆費錢三千二百文
山長火夫工食錢八千文除開銷外餘生息錢四

繁峙縣志

卷之二

八

十二串八百文以作生童膏火之資有碑立書院
內

入學十二名

廩膳生二十名

增生二十名

街市

新順街在縣治前

永豐街俗名大街自東門直達西門集場在焉

承宣街卽二道街

宣化街卽三道街

崇禮街卽四道街

尙義街南二道街

中順街通鼓樓直至南門

東順街卽南北街

西順街通南北街

集場

在城集

每月雙日集稅廳設縣治前街口

砂河集

去城六十里每月以單日集稅廳卽砂河驛

繁峙縣志

卷之二

九

大營集

去城一百里每月以雙日集

都里

在城都

西義都

東義都

臨河都

李牛都

河興都

三泉都

天延都

大義都

代人都

按繁峙在明時原立十九都經鼎革之後又值劉遷作逆人民凋零奉巡撫白攢立八都代人乘其弊或帶糧承行或虛錢佃置地畝侵漁過半其糧仍累繁民貧者逃去貽患富室累年詞訟不休繁民無由申白至康熙四十二年邑庠生孟學臯張灝李俊發等哭籲邑侯維公府憲

繁峙縣志

卷之二

十

趙公具陳利弊準代人另立都甲因更立二都曰大義一都大義二都爲代州寄莊自是之後代與繁各承賦役民業雖未復而賠累之苦稍紓遂名爲十都云後又改大義一都二都爲大義都代人都云

村莊

東鄉

聖水頭

距城二里

作頭村

距城十里

西村

福連坊

均距城十五里

下茹越

距城二十里

大溝村

小溝村

馬圈村

均距城二十五里

下永興

上永興

上寨村

下寨村

趙家峪

塔西溝

均距城三十里

下雙井

興旺莊

淨林村

均距城三十五里

左家窰

距城四十里

上雙井

距城四十五里

西沙河

小沙河

泉溝村

石塔溝

界牌嶺

羊腦溝

均距城五十里

砂河堡

距城六十里

下匯村

下狼澗

沿口村

曹家寨

均距城七十里

天延村

苑家地

和家會

均距城八十里

繁峙縣志

卷之二

士

蛟宅村

距城八十五里

紅崖子

口子裏

紅水兩岸

北辛莊

安樂莊

均距城九十里

小楊莊

東西箭

均距城九十五里

老羊溝

大營鎮

三泉村

馬家莊

水磨上

均距城一百里

東禪房

西禪房

台莊

豹峪裏

潑寨村

固伏村

楊家莊

龍池河

孤莊子

齊城村

小店子

前所裏

後所裏

孤山村

小屯子

南堡村

巧林子背

腰站裏

太安嶺

均距城一百一十里

新房子

劉家莊

火盤溝

四兒溝

左所裏

辛莊子

石堂溝

磨峪溝

東抱池

東西連仲

西抱池

梅迴村

澗頭村

上葱正

下葱正

太平村

大南溝

牛心堡

管仲溝

黑狗背

臭坡窰

寬坪裏

繁峙縣志

卷之二

三

火燒溝

均距城一百二十里

天橋子

西溝裏

柳綠寺

東水溝

白坡頭

官溝裏

鶴子澗

潑子裏

喬兒溝

賈家溝

土樓子

中觀台

紅澗村

瓶形關 均距城百三十里

禿藍台

細腰澗

麻子山

山角裏

山石堂灣

娘子城

盤道村

王子裏

四道溝 均距城一百四十里

大西溝

車廠裏

青羊口

口前村

老漢坪

白堂子

兌白子

蓮花崖

常坪村

韓家莊

竹白窰

均距城一百五十里

文溪裏

鹿骨台

均距城一百六十里

黃家台

距城一百七十里

西鄉 兼西南鄉

西義村

距城二里

筆峯村

距城五里

古家莊

距城五里

塹頭村

東莊村

西莊村

大砂村

小砂村

崗裏村

均距城十里

高陵村

距城十二里

東留屬

魏家村

繁峙縣志

卷之二

十三

高位村

齊家村

佛光莊

上木角

下木角

均距城十五里

南關裏

鄧家窰

宮家莊

南梁上

立窰上

興盛村

木閣村

均距城二十里

周家莊

距城二十五里

樓子嶺

白堡子

水塔灘

均距城三十里

安頭村

南磨裏

元山子

均距城十五里

后殿裏

東堡掌

香坪裏

麻地溝

官地村

大包村

鐵關村

羊腦溝

三岔村 均距城四十里 甘泉村 天井村

訓草裏 舊盤裏 均距城四十五里 上下后溝

板峪村 巖頭村 古山裏

堂子溝 曹家辛莊 王家屋

寺溝裏 均距城五十里 辛莊子 圪料溝 均距城五十五里

深溝裏 靠兒坡 兵馬會

趙家莊 西窖裏 塔兒坪 均距城六十里

郎家莊 灰峪村 劉家坪

康家溝 東冷溝 寬灘子 均距城七十里

繁峙縣志 卷之二 古

香台裏 距城七十五里 尖山村 東溝裏

新莊子 龍鬚溝 照山

大西溝 土嶺 白家查

娘娘會 均距城八十里 台峪口 破寺子 均距城八十五里

半截橋 茶舖 均距城九十里 褚家莊 距城九十二里

揮橋子 西溝裏 大明烟 均距城九十五里

六草坪 楊家莊子 十方院 均距城一百里

二伽藍 距城一百一十里

南鄉

杏園村 小西關 南關村 均距城二里

姚頭村 距城五里 鐵家會 澤萌泉

鼇子頭 黃家莊 牛家窰

姚家莊 均距城十里 華巖村 代峪村

墨坡村 麻峪口 梁家莊 均距城二十里

光裕堡 公主村 上黎峪

下黎峪 均距城二十五里 富家莊 大李牛

小李牛 大木瓜 均距城三十里 果園村

雙全梁 小木瓜 均距城四十里 蘇家口

繁峙縣志 卷之二 五

小宋峪 大宋峪 小水峪

麻黃溝 均距城五十里 東山底 東洽溝

鹿骨崖 大凍溝 下峩河

上峩河 中莊寨 東西桃園

楊家莊 魏家莊 李家莊

三會村 石灰裏 木口裏

南峪口 均距城六十里 寺子上 簸箕窟

沙窰溝 茶房子 方秤溝

四道溝 北井溝 均距城七十里 巡檢寺

暖溝村

黃草村

均距城七十五里

後峪裏

香坪裏

堂子後

厥坪裏

射香村

三羊會

三神堂

均距城八十里

野子廠

拖方溝

正溝裏

代黃溝

南莊子

均距城八十五里

獅子坪

張先生溝

南溝裏

耿家莊

伯牆子

均距城九十里

太平溝

大溝村

均距城一百里

北鄉

高家莊

季家莊

均距城二里

趙家莊

繁峙縣志

卷之二

六

安家山

羅家山

刁兒泉

三祝村

均距城十里

任家窩

王家坡

水峪村

黑掌村

均距城十五里

喬家背

花家台

樓崗村

西衛家窩

后掌村

小宅子

將台背

紅花溝

均距城二十里

板箱背

距城二十五里

麻峪裏

六郎寨

蘇孟莊

喬家窩

二莊子

川草坪

石棧子

李子溝

板舖

蘭家渠

高家梁 瓦窑溝 黑石裏

玄窑上 穆井裏 台子底

官地溝 樓子嶺均距城三十里 雙溝裏

曹碾上 李家窑 侯家窑

大王嶺 東樓固 后河窑均距城三十五里

黃土圪洞 馬蘭口 高家窑

土巷 梨樹坪 馬醋裏

書堂厓 海子溝 印子坪

雷溝 三羊溝 和村

繁峙縣志 卷之二 七

窩坡溝 柴狗背 角兒菴

牛晉村 樺溝裏 土忽洞

科竹林均距城四十里 火燒坡 劉家莊

晉王店 羅家窑 三岔村均距城四十五里

代石堡 楊家莊 侍倚堡

圪料溝 杏子坪 西習麻

孫家莊 備子裏 天井村

喬兒溝 松澗裏 大西舖

小西舖 上下常柴溝 大藍寨

北林莊

同路裏

短嘴裏

均距城五十里

地坡溝

距城五十五里

臭坡坪

大石口

楊家窰

小石口

狼窩嘴

鹿圈掌

牛家圈

西石槽

蘿筐裏

石口子

均距城六十里

茹越口

義行寨

腰子溝

葫蘆嘴

窰峪裏

粉兒溝

元樹嘴

孫家莊

紅溝裏

晶石裏

柴窰裏

朱家房

上角峪

繁峙縣志

卷之二

六

下角峪

均距城七十里

羅家坪

狐子窩

南北馬圈

三條嶺

市兒溝

長城溝

羊圈裏

要眼莊

西娘娘溝

油房溝

均距城八十里

斗道裏

黃土嘴

紅砂坡

東碾子溝

西碾子溝

柏家莊

小南川

水圪坨

周家溝

均距城九十里

澤青嶺

距城九十五里

關西溝

關東溝

溫家莊

均距城一百里

明禋之典上以答神庥下以爲民錫福也我

國家昭格明神釐定祀典卽蕞爾偏邑自風雲雷雨山川社稷以及百神之有功烈於民者胥遣有司歲時致祭崇報固云隆矣其他寺觀鄉曲委巷迎神報賽亦可以備風土之一則非必埒楊氏伽藍記段氏寺塔記也志壇廟

壇廟

社稷壇在城外西北

祭法昔歷山氏之有天下也其子曰農能植百穀夏之衰也周棄繼之故祀以爲稷 家語孔子曰古之平水土及播植百穀者衆矣惟勾龍兼於社而棄爲稷神易代奉之無敢益者明不可與等云 雍正十年三月欽奉

部頒壇制縱橫胥廣二丈五尺高二尺一寸陞各三級繚以周牆其石主長二尺五寸方一尺瘞於壇南正中去壇二尺五寸只露圓尖神牌二以木爲之朱漆青字填寫神號屆祭期設於壇上祭畢

藏於附近寺中潔淨處每歲春秋二仲上戊日陳設致祭祭品帛二俱黑色羊一豕一釧一邊四豆四簠簋各二
先農壇在城東關外大殿三間門樓一座籍田在中以牆圍之壇制高二尺一寸寬二丈五尺神牌高二尺四寸寬六寸座高五寸寬九寸五分紅牌金字祭品羊一豕一帛一釧一邊四豆四簠簋各二雍正四年欽奉

上諭通行直省擇潔淨之地照九卿所耕籍田四畝九

分之數設立先農壇於雍正五年爲始每歲仲春亥日府尹督撫及府州縣衛所等官率所屬之員耆老農夫恭祭

先農神照九卿耕藉之例行九推之禮其設立壇並恭祭

先農俱令動支正項錢糧其所用數目各該地方官報明戶部查核

風雲雷雨山川城隍南壇在南門外一里
周禮大宗伯禋燎祀風師雨師

唐制諸郡置風伯壇於社壇東雨師壇於西各稍北數十步卑下於社壇

宋咸平二年早詔有司祀雷師雨師

雍正十年三月欽遵

部頒制度同壇設三神位風雲雷雨居中山川居左城隍居右制帛七風雲雷雨帛四山川帛二城隍帛一俱白色祭品陳設行禮與社稷同

厲壇北門外一里歲清明日七月望日十月朔日祭無嗣鬼迎城隍神主之

繁峙縣志

卷之二

三

左傳鬼有所歸乃不爲厲明洪武三年令天下立壇祀之

龍王廟在縣治東

文昌廟在文廟東二月初三日爲

帝君誕生之辰致祭

倪岳正祀典疏云神姓張諱亞子其先越雋人西晉丁未二月三日生蚤得異人大洞訣疑真於蜀之梓潼九曲溪上因報母仇從居劍州之七曲山仕晉戰沒立廟祀之唐明皇幸蜀追封左丞僖宗

入蜀封濟順王宋咸和中改封英顯王元加號輔元開化文昌司祿宏仁帝君又按文昌六星在北斗奎前爲天之六府道家謂上帝命梓潼掌文昌府事及人間祿籍故學校中多立祠祀之

三神廟在縣署大堂東祀火神鄧侯關帝乾隆二十年知縣周銘詒建

宋祀大火以闕伯配建中靖國元年有司言祀融高辛氏之火正也闕伯陶唐氏之火正也祀融旣爲上公則闕伯亦當服上公袞冕九章之服從之

漢相蕭何封鄧侯以有造律功故州縣多祀焉

馬王廟在大堂東偏馬號內

立帝廟在正覺寺后中順街北城牆下

關帝廟一在東順街南西向鄉紳糜有象建一在西順街北廟南有尊親配天坊一在城東門內一在西月城

城隍廟在西順街西大殿五楹東西廊各六間寢宮三間樂樓三間大門三間牌樓一座道光五年重修

初封顯佐伯明洪武三年五月詔定稱本府州縣
城隍之神

國朝因之倪岳正祀典疏天下府州縣皆有城隍之
祭

財神廟在城隍廟東

奶奶廟在中順街南

白衣殿在城隍廟西義民畢應麟建

聖母廟在中順街西義民鄭春闈張岐政張志太

康熙五年糾建

繁峙縣志

卷之二

三

三義廟在西順街北城牆下

三官廟在東順街北城牆下

八蜡祠在城東門外一里十二月初八日祭

蜡祭之禮自伊耆神農以下皆有之夏更名曰嘉

平商曰清祭周曰大蜡今府州縣胥祭八蜡亦古

之遺意也八蜡鄭康成謂一日先嗇二日司嗇三

日農四日郵表暉五日貓虎六日防七日水庸八

日昆蟲是也今州縣有蚩蚘神廟卽八蜡中之昆

蟲

土地祠在縣署大門內東乾隆四十七年知縣劉徵泰重修

旗纛軍牙六纛之神也霜降武職官祭於演武廳節孝祠在縣東南隅

忠義祠在縣東南隅

玉皇閣一在東順街中一在中順街南

白衣菴在東甕城內鄉紳梁棟建

五穀行祠在作頭村明洪武年建

東嶽行祠在作頭村三月二十八日鄉民會祭

繁峙縣志

卷之二

十四

北嶽行祠在大宋峪四月初八日鄉民會祭

后土行祠在砂澗驛三月十八日鄉民會祭

總司聖母行祠一在大李牛一在三會村四月十

八日鄉民會祭

關聖帝君祠在下永興村康熙二十八年新建三月十五日鄉民會祭

李衛公祠二一在大李牛村一在小李牛村俗呼

爲大王廟明崇禎五年有神箕自言壽星停箕於廟三年常爲人言禍福無不響應所留詩對甚多

其神始言李靖祠

衛國李公佐命唐室勲德第一傳稱公京兆人謚景武在潞者曰靈顯王廟

泰華池祠在縣東紅澗村每遇大旱禱雨輒應明天啟五年典史王步禱淘泉得泥水後獲雨溼人衣皆泥點知縣周漢傑建廟祀之康熙元年旱遠近禱雨者雲集忽雷電大作空中墮冰一片長一丈三尺濶七尺厚四尺餘上皆茅土後三日大雨康熙七年典史王嘉錫禱雨有應重新其祠道光

繁峙縣志

卷之二

五

十四年六月旱邑令周公率典史夏校往禱十六年五月旱均偕候補守備閆金城往禱俱得甘霖立沛四野均霑

打鷹泉龍神祠在縣正南二十里

寺觀

正覺寺在縣署東鼓樓后

龍牌供此

建福寺在西義村

正覺寺一在西關外元甲辰年建明洪武間置僧

會司

淨明寺在縣南淨明山唐建宋太平興國間勅重修金元時累修葺

公主寺在縣南二十里公主村後魏誠信公主出家建唐末唯德禪師重修

蘭若寺在太黃尖北二十里唐建明萬厯初法華道者挂錫於此併宋峪天宮二寺入焉有卓錫泉清源寺在太黃尖下二十里羣峰環抱元建關西僧戒喜參悟中和尙久而辭去中偈記曰爾緣在

繁峙縣志

卷之二

五

此逢源而止萬厯初至此卓庵握地得古碑名曰清源院卽以名之

正覺禪院在滹沱之濱宋名天王院宣和間黃冠改爲神霄宮五台真容院僧請復爲寺勅賜今額護國千佛寺在東莊村

三聖寺在西莊村

興福寺在楊興墓村

能仁寺在高陵村

菩薩寺在佛光莊

圭峰寺在菴頭村

多寶寺在海子村

秘魔寺在巖頭村

南山寺在娘子崖下

龍興寺在梨峪村

普光寺在梨峪村

文殊禪寺在梨峪村

舊志下梨峪村寺內有西天禪師善世容及其靈骨碧峰

禪師舍利塔千佛袈裟一襲今無

文殊寺在小李牛村

繁峙縣志

卷之二

七

海眼寺在泊子村今廢

滹沱水自下匯村伏地至此湧出故名

寶藏禪寺在南峪口

普慶寺在東山底

吉祥寺在南峪口

菩薩寺在中莊村

三會寺在三會村

嵩山寺在天延村

天空禪寺在北樓村

龍泉寺在后掌村

崇福寺在上永興村

南山寺在冶口村

金界教寺在狼澗村

釋迦寺在上狼澗村

羅喉寺在柏家莊

寶泉寺在和家會

興國寺在下滙村

興龍寺在下永興村舊名五龍殿

三清觀在舊東關卽老君廟金大定年建

繁峙縣志

卷之二

三

洞陽觀在西北二十五里上莊村

新龍池殿在曹家坡莊昔傳龍神至此半坡燥石

中出泉泓然遠近取水祈雨輒應元建廟於泉之

崗明萬厯間義民郭維祥重修日久漸頽康熙十

年邑庠生劉永祚重修之

秋月寺在齊城

地藏菴在大營堡

壽寧寺在南峪口

佛光寺在佛光莊

石佛洞在縣南十五里

天宮寺在西村

五穀殿在曲河村舊名藥師廟

落馬菴在縣東八十里

邱墓

繁峙在漢爲鹵城已有封爵自宋迄金元皆爲用武之地凡諸侯王之分封將帥臣之鎮守卒墓於茲土者間亦有之雖代遠年湮類多附會而一抔猶存亦足繫人流連憑弔千載其人如見則禁牛羊嚴樵採亦有司之責也志邱墓

鹵王墓在縣城東八十里

馬王墓在縣城西北二十里

宋王墓在縣東南四十里

繁峙縣志

卷之二

三

宋楊七郎延興墓在縣西十五里業子

宋楊元帥

友山

墓在縣西十五里晏頭村

劉元帥墓在縣東南四十里大宋峪村西南有神

道碑記

王元帥墓在縣東五十里中莊村有神道碑記

趙元帥墓在縣東十里鐵家會

殷奉議大夫墓在縣西北二十里東莊村

魏宮人墓在公主村南山麓有二十餘冢

邑侯尙質崔公墓在縣東關路南

古蹟

古蹟之留遺所以徵一邑之故實但世遠代湮遺墟舊址半沒於荒烟蔓草中而野史流傳又多神異附會其說後世稽古之儒何所考據而折衷也繁邑僻處偏隅名蹟無多然英賢憩息高士經營當日斯愛斯傳皆足繫人憑弔之思姑卽舊志所載書之簡編其昭著史冊者固必詳其始末或疑信互參亦存而不削蓋郭公夏五之意也志古蹟鹵城周三里一百步有東西南三門本漢高祖十

二年封張平爲鹵侯孝文四年國除後立縣每天將雨城隱隱現於雲霧中歲豐之兆今猶然

齊城在鹵城東五里建置不可考隱現同鹵城現則歲歉

六郎城在東北七十里義興寨宋楊延昭遺址

五郎城在縣東七十里下滙村寺內有石上書五台山太平興國寺楊五郎和尚莊

山西通志五郎祠在五台縣北台樓觀谷西宋楊業第五子出家於此

宋王城縣東四十里大宋峪村俗號宋王嶺故址
尚存所植松栢百餘株邑人思之不忍伐

繁峙故郡北魏志天平二年置繁峙郡及縣後周
並廢

故廓州北魏志武定元年置治肆州敷城界郭城
舊唐志繁峙漢縣魏置廓州久廢

繁峙宮北魏太祖天興元年自中山還駐蹕於此
尹耕日必在盛樂或近盛樂地非今繁峙縣也按
魏昭成帝卽位於繁峙之北時或建宮

繁峙縣志

卷之二

三

北魏顯祖獻文帝諱宏文成帝長子母李貴人興
光元年七月生於陰山之北和平六年卽位常有
遺世之心皇興二年五月乙卯畋於崞山遂幸繁
峙

蔚州僑治舊唐志武德六年置蔚州七月自陽曲
寄治繁峙縣葭人故縣漢置隸太原郡如淳注曰
葭音瓊漢末廢

義興冶宋志繁峙縣有義興冶今呼爲義興寨
留屬村在縣西十五里相傳漢帝北征曾留家屬

於此故名

作頭村在縣東十里相傳明正德微行至此借銀於郭一貫家後遣中使齎還

迎翠樓在河南舊城市口元時建今廢

故城一在滹沱河南原名聚寶寨一在聖水村卽明史所謂成化三年移置東義村者蓋不詳其廢置

景致

滹沱落石

南北皆山雨集諸谷漂來亂石入水輒沒

筆峰拱秀

南對縣治三峰竦立鼎峙雲端

圭峰古柏

縣南山之南奇峰圓秀古柏干霄有寺名人題咏頗多

巖山疊翠

亦南山之南石屏橫列紫色參天細草烟痕皆堪題畫洵勝景也

峪口晴嵐

縣東層巒峭壁有如玉屑日光射之爽氣飛來遠近一色

臺背冰巖

縣東南北臺背也冰結不消鑑懸崖畔常瑩瑩朗若夜照之珠俗呼萬年冰

三泉湧冽

縣東三泉沸如珠亂噴雖盛暑對之亦寒一名品字泉

鹵城現影

縣東朝暾初靄城郭依然將雨徵也主豐

繁峙縣志

卷之二

三

孤山晚照

縣東平原小阜夕陽沈西紅光爛然猶在其巔

峩嶺秋紅

當秋紅葉如流霞布錦

各題景詩見藝文

風俗

五方風氣不齊習尚亦異繁邑雖僻處偏隅聞有明盛時俗尚儉約秉性樸實其土習詩書其農務力田不事商賈猶有太古之風焉我

朝定鼎以來生聚教養風會蒸蒸日上化行俗美於茲邑有厚望焉志風俗

北齊書晉有唐虞之風其俗節財而儉嗇

隋書恆山趙郡人性多敦厚務在農桑好儒術而傷於遲重

繁峙縣志

卷之二

三

祝志土瘠民貧士多守禮

穆志其俗勤儉樸質少文

婦女不出閨門男恥入贅女不貿易

繁峙在代郡東氣寒而早霜收穫未嘗過寒露立秋後十八日穀齊秀乃望有秋否則不能成熟矣前代無宿麥種春麥者不過十之一二今種宿麥者亦間有之稻惟滹沱河南北諸村種之民食以粟爲主佐以蕎麥燕麥

居喪及殯葬用鼓樂行家禮來弔者俱分帛尺許

孟春清明孟秋之望孟冬之朔祭先祖皆至墓惟
元旦備物其餘如端陽中秋諸節各以時物薦焉
婚嫁猶遵六禮遺意媒妁定議後以名柬相通將
娶先請期次納幣至期備綵輿二乘壻親迎婦至
門下轎時橫馬鞍於轎前以紅氍覆之婦騎而過
新婦入房設弓箭合巹交盃畢廟見翼日聚親族
於堂徧拜焉

三月十八日本城砂河俱有香烟會遠近士民各
以鷄鴨羊隻入廟酬神是日商賈雲集惟砂河會

爲最盛

食貨志

田賦

田糧 丁徭 起運留支
正餘稅銀 振武衛歸併本縣

禹平水土則壤成賦上中下錯惟正是供歷代相因皆不能易但陞科減額亦不無因時變通之法繁邑自有明嘉靖知縣楊守信均平地糧相肥磽以定等則招流亡以實戶口由是賦役有所繫著豪強不得兼并迨兵燹之後故府冊籍無存新派糧賦亦異而代人乘做每多侵漁詭瞞之私當事苦於無徵茲特卽殘編遺留及現行賦役以志其

繁峙縣志

卷之二

三

大畧云

一田糧

原額民田共地貳千捌百肆拾陸頃肆拾肆畝五分柒釐陸毫共徵夏秋糧壹萬貳千叁百壹拾肆石柒斗捌合柒勺柒抄壹撮肆圭內

本色糧五百玖拾捌石五斗肆升貳合

折色糧壹萬壹千柒百壹拾陸石壹斗陸升陸合柒勺柒抄壹撮肆圭順治四年巡撫祝具 題部 覆奉

旨蠲免無主荒地叁百肆拾叁頃該糧柒百五拾陸石壹斗叁合肆勺捌抄叁撮每石折銀陸錢該銀肆百五拾叁兩陸錢陸分貳釐玖絲地畝玖釐每畝徵銀肆釐壹毫柒絲捌忽玖微壹纖該銀壹百肆拾叁兩叁錢叁分陸釐陸毫壹絲叁忽二項共銀五百玖拾陸兩玖錢玖分捌釐柒毫叁忽又於順治十四年巡撫白具 題部覆奉

旨蠲免傷亡荒地捌百柒拾壹頃五拾壹畝捌分貳釐獲糧肆千叁百五拾柒石五斗玖升壹合

繁峙縣志

卷之二

三

共實在民田熟地壹千陸百叁拾壹頃玖拾貳畝柒分五釐陸毫共糧柒千貳百壹石壹升肆合貳勺捌抄捌撮肆圭內

本色糧叁百捌拾陸石柒斗陸升叁合

折色糧陸千捌百壹拾肆石貳斗五升壹合貳勺捌抄捌撮肆圭該銀肆千肆百五拾貳兩柒錢捌分叁釐貳絲玖微壹纖肆沙地畝玖釐銀陸百捌拾壹兩玖錢陸分柒釐柒毫柒絲五忽驛站銀玖百肆拾肆兩玖分肆毫

每石派銀壹錢叁分捌釐五毫肆絲陸忽肆微陸纖

沙^參共銀陸千柒拾捌兩捌錢肆分壹釐壹毫玖絲
五忽玖微壹纖肆沙內

稻地柒拾壹畝肆分貳釐玖毫每畝徵粳米柒升
共粳米五石叁抄內

本色糧貳斗陸升肆合壹勺叁抄

折色糧肆石柒斗叁升五合玖勺每石折銀陸錢
五分叁釐肆毫五絲壹忽五微肆纖叁沙連地畝
玖釐銀驛站銀叁項共折銀肆兩肆分玖釐叁毫
壹絲捌忽柒微柒纖五沙肆塵五渺五埃叁漠地

畝玖釐銀驛站銀二項銀數俱詳前總折糧內

平地陸百伍拾柒頃叁分叁釐每畝徵糧柒升共
糧肆千伍百玖拾玖石貳升叁合壹勺內

本色糧貳百肆拾叁石肆斗陸合五勺

折色糧肆千叁百伍拾伍石陸斗壹升陸合陸勺
每石折銀連地畝玖釐銀驛站銀共銀叁千柒百
貳拾肆兩 錢玖分伍釐肆毫肆絲伍忽肆微柒
纖陸沙捌塵伍渺貳埃貳漠

坡地貳百叁拾叁頃陸畝叁分伍釐每畝徵糧伍

升該糧壹千壹百陸拾伍石叁斗壹升柒合五勺
內本色糧柒拾玖石捌斗叁升肆合

折色糧壹千捌拾伍石肆斗捌升叁合伍勺每石
折銀連地畝玖釐銀驛站銀共銀玖百伍拾柒兩
玖分伍釐玖毫壹絲玖微玖纖玖渺肆埃伍漠
沙山地柒百肆拾壹頃壹拾肆畝陸分肆釐柒毫
每畝徵糧壹升玖合叁勺壹抄柒撮壹粒肆粟共
糧壹千肆百叁拾壹石陸斗柒升叁合陸勺五抄
捌撮肆圭內

本色糧陸拾叁石貳斗伍升捌合叁勺柒抄
折色糧壹千叁百陸拾捌石肆斗壹升伍合貳勺
捌抄捌撮肆圭每石折銀連地畝玖釐銀驛站銀
共銀壹千叁百玖拾叁兩伍錢伍毫貳絲陸微柒
纖壹沙叁塵玖渺捌埃

一明神宗年加增豐贍庫夏秋糧柒石壹斗五升
陸合陸勺柒抄捌撮柒圭五粒俱係折色并馬草
共徵銀陸兩玖分柒釐肆毫玖絲貳微玖纖五沙
一順治十三年起至十六年止共開墾過民田荒

地壹百柒拾玖頃肆拾玖畝壹分捌釐共徵糧貳百壹拾陸石玖升捌合壹勺各徵不等共折色銀貳百壹拾捌兩玖錢肆分壹釐捌毫玖絲貳忽一康熙二三年共開墾過民田荒地叁拾伍頃捌拾肆畝共徵糧壹百柒拾玖石貳斗內本色糧陸石叁斗玖升貳合叁勺折色糧壹百柒拾貳石捌斗柒合柒勺各徵不等共折色銀壹百柒拾陸兩肆錢陸分貳釐柒毫五絲壹忽肆微捌纖

一康熙十六年清出隱漏額內民田共地伍拾頃貳拾壹畝伍分各徵不等共徵糧壹百肆拾捌石伍斗叁升伍合伍勺貳抄玖撮捌粒柒粟內

本色糧柒石貳斗壹升捌合玖勺肆撮壹圭壹粒叁粟

折色糧壹百肆拾壹石叁斗壹升陸合陸勺貳抄肆撮玖圭柒粒肆粟各徵不等共折色銀壹百柒拾柒兩壹錢伍分柒釐捌毫伍絲壹忽柒微壹纖陸塵貳沙叁漠

一雍正六八兩年民人首墾額內民田坡沙共地伍拾貳頃捌拾叁畝叁分柒釐肆毫伍絲捌忽肆微壹纖捌沙共徵糧壹百貳拾捌石貳斗壹合肆勺壹抄伍撮玖圭陸粒捌粟內

本色糧陸石陸斗伍升陸合玖勺壹抄肆撮伍圭叁粒陸粟

折色糧壹百貳拾壹石伍斗肆升肆合伍勺壹撮肆圭叁粒貳粟各徵不等共折色銀壹百壹拾捌兩叁錢肆分壹釐柒毫伍絲壹微肆纖肆沙壹塵

陸渺壹埃柒漠

以上民田共地壹千玖百伍拾頃叁拾畝捌分壹釐伍絲捌忽肆微壹纖捌沙共徵

本色糧肆百柒石叁升壹合壹勺壹抄捌撮陸圭肆粒玖粟

折色并加增馬草共銀陸千柒百柒拾伍兩捌錢肆分貳釐玖毫叁絲壹忽伍微肆纖叁沙柒塵捌渺貳埃

一雍正十年開墾民田額內共沙地柒拾伍畝陸

分參釐共徵糧壹石肆斗陸升玖勺肆抄伍撮柒圭陸粒玖粟內

本色糧陸升肆合伍勺伍抄壹撮柒圭陸粒叁粟折色糧壹石叁斗玖升陸合叁勺玖抄肆撮陸粟折銀壹兩肆錢捌分柒釐叁毫叁絲柒忽壹微玖纖壹沙伍塵貳渺捌埃

一乾隆元年欽奉

上諭事案內改歸五台縣徵收寄糧除民田坡地壹頃肆拾陸畝捌分捌釐玖毫伍絲肆忽叁微柒纖應

除

折色糧柒石叁斗肆升肆合肆勺玖抄柒撮壹圭捌粒伍粟折除銀柒兩貳錢柒分陸釐肆毫柒絲一乾隆二十五年開墾民田額內共沙地壹頃捌拾柒畝玖分陸釐叁毫捌絲共徵糧叁石陸斗叁升捌勺玖抄玖撮叁圭伍粒陸粟內

本色糧壹斗陸升肆勺貳抄柒撮壹圭叁粟

折色糧叁石肆斗柒升肆勺柒抄貳撮貳圭伍粒叁粟各徵不等共折色銀叁兩伍錢叁分肆釐玖

絲玖微貳織壹沙伍塵玖渺肆埃貳漠

以上除乾隆元年改歸五台縣徵收寄糧外共

民田地壹千玖百伍拾壹頃肆拾柒畝伍分壹釐肆毫捌絲肆忽肆織捌沙共徵

本色糧肆百柒石貳斗伍升陸合玖抄柒撮伍圭壹粒伍粟

折色馬草共銀陸千柒百柒拾叁兩伍錢捌分柒釐捌毫捌絲玖忽捌微伍織陸沙玖塵肆埃貳漠原額屯田振武衛坐落本縣屯下地貳千貳百壹

拾柒頃陸拾貳畝叁分共徵糧貳千叁百陸拾捌石伍斗肆升叁合伍勺壹抄內

本色糧貳千貳百捌拾石捌斗陸升壹合

折色糧捌拾柒石陸斗捌升貳合伍勺壹抄每石折銀叁錢共銀貳拾陸兩叁錢肆釐柒毫伍絲叁忽於順治十四年九月內巡撫白具 題部覆奉

旨蠲免荒地壹千叁百柒拾玖頃捌拾伍畝陸分叁釐捌毫該豁本色糧壹千肆百伍拾陸石肆斗陸升捌合貳勺玖抄叁撮

折色糧肆拾貳石壹斗玖升伍合陸勺叁抄每石
折銀叁錢該銀壹拾貳兩陸錢伍分捌釐陸毫捌
絲玖忽

實在熟地捌百叁拾柒頃柒拾陸畝陸分伍釐肆
毫共糧捌百陸拾玖石捌斗柒升玖合伍勺捌抄
柒撮內

本色糧捌百貳拾肆石叁斗玖升貳合柒勺柒撮
折色糧肆拾伍石肆斗捌升陸合捌勺捌抄每石
折銀叁錢該銀壹拾叁兩陸錢肆分陸釐陸絲肆忽

繁峙縣志

卷之二

星

一順治十四年起至十八年止共開墾過屯田地
壹百柒拾壹頃肆拾柒畝貳分壹釐共徵

本色糧壹百貳拾捌石捌斗伍升肆合捌勺

一康熙二年起至二十三年止共開墾過屯田荒
地壹拾玖頃陸拾貳畝共徵糧貳拾石玖斗伍升
陸合陸抄壹撮玖圭捌粒柒粟內

本色糧貳拾石肆斗玖升柒合柒抄壹撮玖圭捌
粒柒粟

折色糧肆斗伍升捌合玖勺玖抄折色銀壹錢叁

分柒釐陸毫玖絲柒忽

此條賦役全書載康熙二年起至十一年止共開墾屯地壹拾伍頃玖拾貳畝共徵糧壹拾柒石肆合貳勺伍抄捌撮壹圭壹粒柒粟內本色糧壹拾陸石伍斗肆升伍合貳勺陸抄捌撮壹圭壹粒柒粟折色糧肆斗伍升捌合玖勺玖抄折色銀壹錢叁分柒釐陸毫玖絲柒忽核與後總數不符故從舊志纂入存參

一康熙十六年清出隱漏額內有主新荒屯田地

壹頃捌拾貳畝共徵糧壹石玖斗柒升陸合柒勺肆撮伍圭肆粒捌粟內

本色糧壹石玖斗貳升壹合肆抄玖撮肆圭玖粒肆粟

折色糧伍升伍合陸勺伍抄伍撮伍粒肆粟折色銀壹分陸釐陸毫玖絲陸忽伍微壹纖陸沙貳塵以上屯田共地壹千叁拾頃陸拾柒畝捌分陸釐肆毫共徵本色糧玖百柒拾伍石陸斗陸升伍合陸勺貳抄捌撮肆圭捌粒壹粟

折色并加增馬草銀壹拾叁兩捌錢肆毫伍絲柒忽伍微壹織陸沙貳塵

原額更名田晉府下地伍拾柒頃玖拾壹畝捌分伍釐共徵租銀壹百貳拾捌兩陸錢陸分玖釐於順治十四年巡撫白具題部覆奉

旨蠲免荒地伍拾叁頃叁拾捌畝捌分伍釐豁銀壹百壹拾捌兩陸分玖釐

實在熟地肆頃伍拾叁畝每畝徵銀貳分叁釐叁毫玖絲玖忽伍微伍織捌沙肆塵玖渺共租銀壹

拾兩陸錢

一康熙二三年共開墾過更名田荒地貳拾畝共徵折色銀肆錢肆分肆釐叁毫壹絲伍微肆織一康熙十六年清出隱漏額內新荒更名田共地壹拾畝共徵租銀貳錢貳分壹釐壹毫伍絲陸微貳織貳沙叁塵貳渺伍埃

以上更名田共地肆頃捌拾叁畝共徵租銀壹拾壹兩貳錢陸分伍釐肆毫陸絲壹忽壹微陸織貳沙叁塵貳渺伍埃

通共民田屯田更名田實在熟地貳千玖百捌拾陸頃玖拾捌畝叁分柒釐捌毫捌絲肆忽肆纖捌沙各徵不等共

本色糧壹千叁百捌拾貳石玖斗貳升壹合柒勺貳抄伍撮玖圭玖粒陸粟

折色并加增馬草絲絹共銀陸千柒百玖拾捌兩陸錢伍分叁釐捌毫捌忽伍微叁纖伍沙肆塵貳渺玖埃貳漠

一丁徭

繁峙縣志

卷之二

哭

明初戶二千三百四十六口一萬六千五百四十嘉靖三十二年兵荒後戶四百二十口五千一十乾隆年間審編戶九千三百七十八大口二萬三千七百四十小口五萬四千二百七十

道光十三年審編戶九千三百八十一男婦大口二萬五千一百八名小口五萬七千三百五十名舊管判書人丁柒千柒百柒拾壹丁順治五年審編實行差人肆千柒百玖拾玖丁該均徭并地差共銀肆千捌百肆拾捌兩陸錢叁分陸釐伍毫伍

絲玖忽柒微陸織玖沙貳塵又加增胖襖銀叁拾玖兩共銀肆千捌百捌拾柒兩陸錢叁分陸釐伍毫伍絲玖忽柒微陸織玖沙貳塵於順治八年二月題奉

旨蠲免傷亡人捌百捌拾捌丁該徭銀叁百玖拾壹兩柒錢壹分陸釐又於順治十四年九月內題奉

旨蠲免逃亡人壹千捌百陸拾叁丁該徭銀玖百肆拾陸兩壹錢肆分叁釐康熙元年審編

實在共人肆千柒百陸拾捌丁內除紳衿優免本身壹百陸拾捌丁外

繁峙縣志

卷之二

巽

實行差人肆千陸百丁該均徭銀辦買本色顏料加增銀并地差銀共叁千伍百柒拾柒兩叁錢叁分玖釐陸毫肆絲玖忽貳微叁織肆沙貳塵康熙十一年審編增出銀陸錢二十二年爲請亟開豁逃亡丁糧等事案內報過逃亡人叁百叁拾伍丁缺徭銀壹百陸拾柒兩肆錢自二十一年準其豁免三年於二十四年招復補額訖五十二年欽奉

恩詔但據康熙五十年審定丁冊定爲常額續生人丁

永不加賦乾隆二十一年審編乾隆二十二年分實在其人伍千叁百柒拾壹丁內除紳衿優免本身壹百伍拾伍丁外

實行差人伍千貳百壹拾陸丁內

中下則壹拾壹丁每丁徵銀壹兩貳錢共銀壹拾叁兩貳錢

下上則貳百玖拾陸丁每丁徵銀玖錢共銀貳百陸拾陸兩肆錢

下中則貳千玖百玖拾陸丁每丁徵銀陸錢共銀

壹千柒百玖拾柒兩陸錢

下下則壹千玖百壹拾叁丁每丁徵銀叁錢共銀伍百柒拾叁兩玖錢

以上共徵均徭并辦買本色顏料加增銀又地差銀共銀叁千伍百柒拾柒兩玖錢叁分玖釐陸毫肆絲玖忽貳微叁纖肆沙貳塵

一順治十四年清出紳衿優免共丁壹百捌拾叁丁俱下下則每丁徵銀壹兩肆錢肆釐共銀貳百伍拾陸兩玖錢叁分貳釐

以上通共實行差人伍千叁百玖拾玖丁共徵均
徭并辦買本色顏料加增銀貳千玖百捌兩叁分
貳釐又地差銀玖百貳拾陸兩捌錢叁分玖釐陸
毫肆絲玖忽貳微叁纖肆沙貳塵共銀叁千捌百
叁拾肆兩捌錢柒分壹釐陸毫肆絲玖忽貳微叁
纖肆沙貳塵於乾隆十年歸入地糧徵收銀壹千
貳百捌拾捌兩叁錢叁分貳釐隨丁辦納銀壹千
陸百壹拾玖兩柒錢共地差銀兩向係按糧派徵
以上地丁共徵本色糧壹千叁百捌拾貳石玖斗

貳升壹合柒勺貳抄伍撮玖圭玖粒陸粟內
米肆百柒石貳斗伍升陸合玖抄柒撮伍圭壹粒
貳粟黑豆玖百柒拾伍石陸斗陸升伍合陸勺貳
抄捌撮肆圭捌粒壹粟

折色銀壹萬陸百叁拾叁兩伍錢貳分伍釐肆毫
伍絲柒忽柒微陸纖玖沙陸塵貳渺玖埃貳漠

按地丁總數與賦役全書徵有不合以志中增入
雍正十年及乾隆二十五年開墾民田本折銀數
又有開除乾隆元年改歸五臺縣徵收寄糧故有

不合其實一也

一起運

戶部項下宣大王糧地畝并開墾增出均徭隱漏首墾等項共銀貳千伍百伍兩貳錢伍分捌釐貳

毫貳絲貳忽壹微叁纖壹塵叁沙玖埃貳漠

乾隆二十

五年開墾折色銀在內

禮部項下羊價藥味等銀壹拾陸兩玖錢陸分捌釐壹毫叁絲柒忽腳價銀貳錢叁釐伍毫

兵部項下柴薪銀叁拾柒兩伍錢腳價銀壹兩伍

繁峙縣志

卷之二

五

錢叁分捌毫壹絲

工部項下柴夫木柴胖襖等項共銀伍百肆拾壹兩捌分叁釐肆絲伍忽腳價銀壹兩陸錢伍分玖釐柒毫肆絲陸忽陸微陸纖

舊額存留項欸奉文節年裁扣并裁官經費等項共解

部銀貳千貳百貳拾貳兩玖錢伍分叁毫伍忽貳微柒纖肆沙貳塵

以上除腳價銀外共解銀伍千叁百貳拾叁兩柒

錢伍分玖釐柒毫玖忽肆微肆沙叁塵叁渺玖埃
貳漠內除奉文抵支驛站銀壹百肆兩柒分玖釐
陸毫又除節年添設加增各項共銀叁百伍兩玖
錢叁分玖釐肆毫肆絲貳忽伍微捌抄柒塵壹渺
又乾隆二十八年加增平刑巡檢弓兵工食銀壹
拾伍兩實該解銀肆千捌百玖拾捌兩柒錢肆分
陸毫陸絲陸忽捌微玖纖伍沙陸塵貳渺玖埃貳
漠腳價銀叁兩叁錢玖分肆釐伍絲陸忽陸微陸
纖

置買造解綢絹銀壹拾肆兩壹分柒釐壹毫貳絲
叁微腳價銀玖分肆釐壹絲

本色原額顏料伍百壹拾叁斤肆兩共該銀肆拾
陸兩捌錢壹分貳釐壹毫貳絲伍忽又鋪墊銀伍
兩柒錢陸分肆釐伍毫共銀伍拾貳兩伍錢柒分
陸釐陸毫貳絲伍忽內節次改折核減并停解各
項顏料鋪墊共解

部銀伍拾貳兩壹錢伍分壹釐壹毫伍絲壹忽伍
微貳纖肆沙貳塵壹渺捌埃捌漠

存留顏料價銀辦解本色黃蠟貳斤玖兩柒錢肆分貳釐伍毫每斤減定價銀壹錢伍分伍釐共銀肆錢肆釐叁毫捌絲肆微陸纖捌沙柒塵伍渺腳價銀貳分壹釐玖絲叁忽柒沙叁渺壹埃貳漢一留支

本省額編兵餉銀叁千叁百玖拾捌兩叁錢柒分陸釐玖毫柒絲捌忽玖微壹纖肆沙

本省粟米肆百柒石貳斗伍升陸合玖抄柒撮伍圭壹粒貳粟

本色黑豆玖百柒拾伍石陸斗陸升伍合陸勺貳抄捌撮肆圭捌粒壹粟

驛站實支銀壹千肆拾捌兩壹錢柒分又在代州裁減銀內支給不敷銀叁百柒拾叁兩伍錢伍釐伍毫捌絲柒忽叁微肆纖柒沙柒塵貳渺共實支銀壹千肆百貳拾壹兩陸錢柒分伍釐伍毫捌絲柒忽叁微肆纖柒沙柒塵貳渺內

沙澗驛馬叁拾貳匹頭馬夫壹拾陸名內抽協殺虎口外站馬六匹草料照常支銷馬夫叁名工食

扣解實歲支工食銀壹千壹百捌拾陸兩肆錢壹分陸釐三泉廠夫貳拾捌名歲支工食銀壹百陸拾伍兩貳錢伍分玖釐伍毫捌絲柒忽叁微肆纖柒沙柒塵貳泐官支銀柒拾兩

存留派解并本縣官俸役食雜支照裁定銀壹千貳百叁兩壹錢伍分陸釐壹毫肆絲貳忽伍微捌沙柒塵壹泐內

存知縣俸銀肆拾伍兩

內除缺荒銀壹拾玖兩貳錢叁釐實支銀貳拾伍兩

柒錢玖分柒釐

繁峙縣志

卷之二

五

門子貳名工食銀拾貳兩

內撥給禁卒銀壹兩貳錢捌分

阜隸十六名工食銀玖拾陸兩

內撥給件作銀壹拾貳兩

馬快手八名工食銀肆拾捌兩

內撥給禁卒銀伍兩壹錢貳分

更夫五名工食銀叁拾兩

禁卒八名工食銀肆拾捌兩

轎夫四名工食銀貳拾肆兩

內撥給禁卒銀貳兩伍錢陸分

傘扇夫三名工食銀壹拾捌兩

內撥給禁卒銀壹兩玖錢貳分

庫子四名工食銀貳拾肆兩

內撥給禁卒銀貳兩伍錢陸分

斗級四名工食銀貳拾肆兩

內撥給禁卒銀貳兩伍錢陸分

民壯二十二名工食銀壹百伍拾捌兩肆錢

捕役八名工食銀肆拾捌兩

本縣典史俸銀叁拾壹兩伍錢貳分

門子一名工食銀陸兩

皂隸四名工食銀貳拾肆兩

馬夫一名工食銀陸兩

本縣教諭俸銀肆拾兩

訓導俸銀肆拾兩

廩生二十名餼糧銀陸拾肆兩

繁峙縣志

卷之二

五

齊夫三名工食銀壹拾捌兩

膳夫二名工食銀壹拾叁兩叁錢叁分叁釐叁毫

門斗三名工食銀壹拾捌兩

平刑關巡檢俸銀叁拾壹兩伍錢貳分

皂隸二名工食銀壹拾貳兩

弓兵十名工食銀陸拾兩

原額十五名每名工食銀叁兩共銀肆拾伍兩

北樓口倉斗級四名工食銀貳拾肆兩

時憲書紙價銀陸兩叁錢陸分

文廟春秋二祭銀肆拾兩

啟聖名宦鄉賢祠祭祀銀壹拾壹兩壹錢捌分
風雲雷雨山川社稷八蜡等壇廟祭祀銀貳拾肆
兩

邑厲壇祭祀銀壹拾貳兩

雩禮壇祭品銀叁兩

關帝三代祭品銀貳拾兩捌錢叁分

鄉飲酒禮銀壹拾伍兩

迎春神牛酒席銀伍錢

朔望行香講書等銀伍兩陸錢

繁峙縣志

卷之二

七

舖司兵一十三名工食銀柒拾捌兩

孤老冬衣布花銀壹拾捌兩捌錢柒分玖釐肆毫

肆絲貳忽伍微捌沙柒塵壹渺

二年一辦起送赴考貢生酒席盤纏及考中正貢

旗匾花紅銀壹拾貳兩每年銀陸兩

三年一辦舉人坊牌銀壹拾伍兩每年伍兩

餞送舊舉人會試以一名爲率盤纏銀壹拾伍兩

每年銀伍兩

本府餞送舊舉人會試卷價酒席銀壹兩陸錢每

年銀伍錢叁分叁釐肆毫

新中舉人以一名爲率花紅酒席旗匾賀儀餞送
會試銀柒兩伍錢每年銀貳兩伍錢

一正餘稅銀

乾隆二十一年奏報共徵正餘稅銀貳百肆拾壹
兩叁錢玖分貳釐內徵

房田稅契銀伍兩捌分捌釐盈餘銀肆拾捌兩肆
錢伍分玖釐

無額商稅銀玖兩柒分玖釐盈餘銀肆拾陸兩伍

繁峙縣志

卷之二

五

分伍釐

畜稅銀壹兩叁錢捌分盈餘銀肆拾壹兩貳錢叁
分壹釐

牙稅銀叁兩捌錢

當稅銀捌拾伍兩

鹽牙稅銀壹兩貳錢

附考河鹽引行者三省曰山西曰河南曰陝西

山西省惟平陽潞安澤州蒲州四府屬解絳吉
隰四州屬行河東引而食河東鹽太原汾州寧

武三府屬遼沁平保忻代六州屬皆食本處土
鹽領河東之引而不食河東之鹽名曰鹽稅山
西省額引二十二萬三千一百六引繁峙縣額
行二百八十一引係鹽稅今亦裁減無存矣
一額外共解部銀貳拾玖兩玖錢伍分內
匠價銀壹拾叁兩玖錢伍分於仰請酌改匠價之
輸徵以除隱累事案內攤入地糧徵收
裁操賞酒課銀柒兩

振武衛歸併本縣地丁

繁峙縣志

卷之二

五

一田糧

原併屯田地壹千壹百壹拾陸頃玖拾柒畝捌分
玖釐壹毫捌絲貳微每畝徵本色糧壹升貳合柒
勺叁抄陸撮陸圭折色銀壹毫叁絲玖忽貳微柒
纖叁沙伍塵共徵

本色糧豆壹千肆百貳拾貳石陸斗捌升肆合玖
勺陸抄壹撮叁圭叁粒

折色銀壹拾伍兩伍錢伍分陸釐捌毫

一丁徭

乾隆二十一年審編二十二年分實在行差人捌百伍拾壹丁內

中中則三丁每丁徵銀陸錢陸分肆釐伍毫柒絲柒忽伍微叁纖陸沙伍塵伍渺壹埃

中下則一十二丁每丁徵銀伍錢叁分壹釐陸毫陸絲貳忽貳纖玖沙貳塵肆渺捌漠

下上則一百六十九丁每丁徵銀叁錢玖分捌釐柒毫肆絲陸忽伍微貳纖壹沙玖塵叁渺陸漠

下中則五百三十三丁每丁徵銀貳錢陸分伍釐

捌毫叁絲壹忽壹纖肆沙陸塵貳渺壹漠

下下則一百三十四丁每丁徵銀壹錢叁分貳釐玖毫壹絲伍忽伍微柒沙叁塵壹渺貳漠

以上共徵均徭銀貳百叁拾伍兩貳錢陸分肆毫肆絲柒忽玖微叁纖玖沙伍渺肆埃

通共地丁共徵本色糧豆壹千肆百貳拾貳石陸斗捌升肆合玖勺陸抄壹撮叁圭叁粒內於請改

倉糧兵民兩便等事案內撥歸代州徵收豆陸拾壹石貳斗陸勺外

實徵糧豆壹千叁百陸拾壹石肆斗捌升肆合叁勺陸抄壹撮叁圭叁粒存留本縣

折色併均徭銀貳百伍拾兩捌錢壹分柒釐貳毫肆絲柒忽玖微叁纖玖沙伍渺肆埃起運戶部

道光十四年現行常額共徵地丁折色各項銀壹萬陸百伍拾肆兩肆錢柒分伍釐內

起運戶部銀捌千叁百玖拾柒兩捌錢叁分貳釐徑解戶部顏料并腳價共銀肆錢貳分伍釐

解布政司置買綢絹并腳價共銀壹拾肆兩壹錢

壹分貳釐

存留驛站銀壹千肆拾捌兩壹錢柒分

存留官俸役食雜支祭祀等銀壹千壹百玖拾叁兩玖錢叁分陸釐

連振武衛歸并本縣地丁折色銀貳百伍拾兩捌錢壹分柒釐零通共徵地丁等銀壹萬玖百伍兩貳錢玖分貳釐

加一三耗羨銀除酒課匠價無耗外實徵銀壹千叁百捌拾貳兩叁錢伍分玖釐內

起運戶部項下銀貳百肆拾貳兩叁錢伍分玖釐
原存留各官廉銀壹千貳拾兩繁費銀壹百貳拾
兩於道光十四年戶部議奏廉費解司庫按季具
領

常平倉原額穀捌千石新增穀壹萬貳千石共貯
穀貳萬石



繁峙縣志

物產 典禮
武事 官制

冊三

物產

穀類 果類 菜類 木類 藥類
禽類 獸類 鱗蟲類 土石類

花類 蟲類

粵自志地理者旁及物產紀乘又有異物錄彼都人士莫不各以土物相誇詡繁峙土瘠地寒水陸之產較他邑為薄而有裨於民生日用者錄之以備土風也至神異之物雖不多見昔嘗產者亦附記焉志物產

穀類

稻 代志山西地多高燥種稻者鮮惟滹沱南北兩岸皆下濕獨宜於稻

繁峙縣志

卷之三

一

黍 稷 李時珍曰黍稷一類而二種黏者為黍不黏者為稷

穀 粟 粱 穀即五穀中之粱也脫殼則為粟米亦曰小米今直名曰穀孟詵謂人不識粟李時珍謂人不識粱穗大毛長而粒粗者為粱穗小毛短而粒細者為粟其實一物也

高粱 一名稻秫種來自蜀一名蜀秫又稱茭子

玉蜀秫 土人名玉茭子俗名玉秫

麻 麻有四種一種大麻色蒼而圓可榨油李時

珍曰大麻卽火麻亦曰黃麻處處種之剝麻收子
有雌有雄雄者爲臬雌者爲苴皮可作布作屨亦
可爲繩索稽白而有稜輕虛可爲燭心一種色黑
榨油甚宜名胡麻生則性寒炒則性熱一種色白
亦宜榨油

麥 麥有大小二種繁峙地寒大麥穀雨前種小
暑後收小麥清明前種大暑後收

燕麥 麥之別種俗呼爲莠麥考字典莠字音鈞
江南呼薤爲莠子與此迥別俗稱之訛燕麥夏種

性寒宜邊地故山西近邊等處胥有之

蕎麥 豌豆 黑豆 菜豆 大豆 扁豆

小豆 有赤白二種赤者可辟瘟

豇豆 有菜豇豆柴豇豆二種

茶豆 有猪牙豆火茶豆篋片豆刀豆四種

果類

杏 繁峙杏花穀雨後始開北方地寒故也

棗 桃 梨 榛

櫻桃 說文櫻桃一名含桃

林檎 本草圖經林檎或謂之來禽木似柰實比柰差圓六七月熟

菜類

地菜 雨後生沙草上形似木耳而小南人呼爲地菌皮

蘑菇 出繁峙等處者色微黑肉薄明于謙巡撫時曾入覲有以手帕蘑菇線香爲贄例進者謙口占詩云手帕蘑菇與線香本爲民利反成殃清風兩岫朝天去免得間閭話短長遂革其弊

羊肚 蘑菇之別名

芹

葱

蒜

韭

劈蘭

薤 薤葉似韭而中空根如蒜其葉光滑露亦難貯故曰薤露

茄

葍菲

芥菜

萵苣

莧 繁峙紫赤莧俱有之士人多不食但取其汁以染絳耳

白菜 山西白菜極肥嫩土人九十月握藏地窖中雖嚴冬出賣新鮮可食

芫荽

茗蓬

地椒

黃花

蘿蔔 有紅白二種

菠菜

蕨

葫蘆

瓜

山藥

苘蒿 一名蓬蒿正字通引函史物性志云苘蒿

香可茹

木類

松

柏

榆

楊

柳

椿

槐

檀

桑

楸 柏葉松身似梓

繁峙縣志

卷之三

四

樺 師古註華卽今樺皮貼弓者

榧 廣韻楮榧木一作君遷柿屬

藥類

甘草 本草一名靈通一名國老

麻黃 僧繼洪曰產麻黃地冬不積雪性熱故也

款冬花 花如黃菊至冬而花不懼霜雪故名

艾 急就篇註艾一名冰臺一名醫草

柴胡 本草柴胡香直上雲間聞者皆氣爽

黃芩 本草北芩多內實而得黃卽今所謂条芩

是也

知母 玉菡萏母草卽知母也

車前 陸璣疏馬舄一名車前一名當道喜在牛跡中生幽州人謂之牛舌草

益母草 本草一名茺蔚李時珍曰其功益于婦人及明日益精故有益母之稱

夏枯草 本草冬至生夏至枯故名

半夏 本草辛溫有毒體滑性燥圓白而大陳久者良

芍藥 本草釋名芍藥猶綽約也

荆芥 本草一名假蘇穗在於巔故善升發

兔絲子 玉菡萏兔絲草名

黃耆 李時珍曰耆長也色黃爲補藥之長

沙蔞 生沙地故名正字通鈴兒草卽沙參

桔梗 本草苦辛而平色白屬金入肺

薄荷 本色薄荷莖葉似花而長

枸杞 一名地骨服之輕身

馬兜鈴 本草一名土青木香蔓生葉脫時其實

尙丞如馬頂鈴故名

丞古文垂字

遠志 本草遠志苗名苜草

苜音小

花類

菊 菊有五美賦圓花高懸準天極也純黃不雜后土色也早植晚發君子德也冒霜吐穎象勁直也流中輕體神仙食也

萱 述異記一名忘憂一名宜男草 草木記懷妊佩其花卽生男

玉簪花 花初生未開形似玉簪故名

繁峙縣志

卷之三

六

石竹花 本草竹瞿麥也

金簪花 牡丹 芍藥花 葵花

雞冠花 花形似雞冠故名有紅白二種一名曰

秋實

石榴 種出安石國張騫使西域回所得

茉莉花 繁峙不產茉莉花舊志物產載其名蓋有一種開紫花染指如胭脂色結實米如水粉俗名水粉花者土人呼爲紫茉莉

牽牛花 鳳仙花 薔薇花 鶯粟花

山丹花 仙遊志山丹花一葉百莖狀如繡毳

百合花 一日強瞿韓詩外傳凡物旁生謂之瞿

此物花葉根皆四向故名

鉢囊花 土人名荷包相傳五百阿羅漢所遺化

爲此花

迎春花

無花果 不花實似李

畜類

雞 鴨 牛 羊 犬 豕 驢 騾

繁峙縣志

卷之三

七

馬 古稱代多良馬繁峙代屬

貓 一名烏員

禽類

雉 燕 雀 鵲 烏 鳩

鷹 唐段成式酉陽雜俎肉攫部荆窠白者短身

而大五斤有餘便鳥而快一名沙裏白生代北沙

漠荆窠上向雁門馬邑飛

鵠 爾雅釋鳥鵠雉註青質五采卽所謂鵠負雀

也

鶯

鴿

鴿鶉 鴿一作鶉本草鶉大如雞雞頭細而無尾
有斑點雄者足高雌者足卑

石雞 峩峪諸山中皆有之形質毛羽皆如斑鳩
而喙獨赤冬日以充羹饌亦佳品也

半翅 山有小鳥形類竹雞土人名半翅徐文長
集作半痴因其性也

獸類

辣辣 山海經秦戲之山有辣其鳴自訓 通典

繁峙縣志

卷之三

八

辣見則歲豐辣瑞物也時一見之識者亦稀

虎 貉 狐 狸 豹 狼

豺犬 鹿

麋 說文麋屬

麇 音庖麇屬舊志作狍

鼠 黃鼠

獾 正字通狗獾蜀人呼天狗似小狗而肥

鱗蟲類

魚 滹沱河遶縣城南水涓細而淺有小魚長四

五寸夏月嘗網得之 王世貞有食滹沱魚戲作
一絕載藝文志

蛇 螽斯 蟋蟀 蟻 螳螂

蛾 韻會蛾似黃蝶而小其眉句曲如畫

蠋 詩大雅如蝟如蟾傳蟾蠋也疏蟬屬也

蠹 說文蠹尾蟲也

蠅 蚊 蛙 蚯蚓 蚰蜒

螟蛉 桑蟲一作蠹詩疏謂之桑慢俗亦呼爲戎
女

繁峙縣志

卷之三

九

蜂 爾雅翼蜂種類至多其黃色細腰者謂之穉
蜂又蜜蜂人收養之一日兩出而聚鳴號爲兩衙
又土蠶今江東大蠶在地中作房者啖其子卽馬
蜂又木蜂似土蜂而小在樹上作房者

土石類

包金土 出縣南二十五里王老崖有石洞內出
包金土爲聖壁之用

礧 繁峙地多鹵土故漢謂之鹵城取其土煉之
卽成礧 石灰

禮儀志

典禮 祀典 公式

禮也者所以納民於軌物使彝倫攸敘神人協和也先王制禮無過不及而因時制宜亦不無損益之法繁雖蕞爾舉凡崇德報功賓興鄉飲諸大典規制猶存第經兵燹之後徵文考獻不勝名存實亡之感則修舉廢墜黼黻休明實有賴於守土賢侯焉志典禮

祀典

繁峙縣志

卷之三

十

文廟陳設式 雍正三年定

正位 帛一 色白 白磁爵三 牛一 羊一 豕一

登一 實以 太羹 釧二 實以 籩二 實以 黍稷 簋二 實以 稻粱 籩十 實

形鹽 藁魚 鹿脯 棗栗 豆十 實以 韭菹 菁菹 芹菹 笋

榛菱 芡黑餅 白餅 豚肝 酒罇一

四配 每位帛一 色白 白磁爵三 羊一 豕一 釧

一 實以 籩二 實以 黍稷 簋二 實以 稻粱 籩八 實以 形鹽 藁魚

芡豆八 實以 韭菹 菁菹 芹菹 笋 酒罇一

十哲 東五位 五案 又朱子一位 一案 帛一 色白 白磁

爵各一 豕一 釧各一 實以和羹 簋各一 實以黍 簋各

一 實以稻 籩各四 實以棗栗藁魚 豆各四 實以醢菹醢豕

首一 西五案陳設同

東廡 帛一 白銅爵各一 豕三 每案 簋一

簋一 籩四 實同 西廡陳設同

崇聖祠 正位五案每位帛一 白磁爵三 羊一

豕一 釧一 簋二 籩二 籩八 豆八 實同

上 酒罇一

配位 每位一案帛二 豕首一 銅爵三 簋一

繁峙縣志 卷之三 十一

簋一 籩四 豆四 實同 豕肉一

兩廡 每位帛二 銅爵三 簋一 籩一 籩四

豆四 實同 豕肉一

祭儀

春秋二仲月上丁日祭獻官散齋二日致齋一日

前一日演樂省牲祭日三更鼓祭事皆備鼓再嚴

樂舞生執事者各立丹墀左右鼓三嚴引贊引各

獻官廟門外立通贊唱樂舞生就位樂生各序立

於廟庭奏樂之所兩司節者分引舞生至丹墀東

西兩階各序立於舞佾之位兩司節者退至舞生兩班之首持節相向立唱執事者司事陪祭官就位分獻官就位獻官就位引贊引獻官至拜位引贊退位唱瘞毛血執事者捧毛血正廟由中門出四配十哲兩廡由左右門出瘞於坎遂啟俎蓋唱迎神樂奏咸和之曲麾生揚麾樂生擊祝樂作司節舉節舞生執籥秉翟而舞三叩首與麾生偃麾樂盡櫟啟司節伏節舞生罷舞唱奠帛行初獻禮捧帛者捧帛執爵者執爵引贊引獻官詣盥洗所

勺水淨巾引詣酒尊所司尊者舉冪酌酒執爵者捧帛者在獻官前行正廟帛爵由中門入四配諸爵由左門入各於神案側立引贊引獻官亦由左門入詣

至聖先師孔子神位前樂奏寧和之曲麾生揚麾樂生擊祝樂作司節舉節舞生執籥秉翟而舞獻官跪捧帛者西向跪進帛獻官獻帛授接帛者奠於神位前案上執爵者西向跪進爵獻官獻爵授接爵者奠於神位前叩首與詣讀祝位

祝位在香案前引贊

引獻官至祝位麾生偃麾樂暫止讀祝者跪取祝文退立於獻官左獻官並各官及讀祝者皆跪讀祝文日維某年歲次某某月某朔越幾日某官某等敢昭告於

至聖先師孔子曰維先師德配天地道冠古今刪述六經垂憲萬世維茲仲春謹以牲帛醴齊粢盛庶

品祇奉舊章式陳明薦以復聖顏子宗聖曾子述聖子思亞聖孟子配尚饗叩首與麾生舉麾樂生接奏未終之樂引贊引獻官詣

復聖顏子神位前跪捧帛者跪進帛於獻官右獻官獻帛授接帛者奠於神位案上執爵者跪進爵於獻官右獻官獻爵授接爵者奠於神位前叩首與次詣宗聖曾子述聖子思子亞聖孟子神位前儀同復聖復位引贊引獻官至原拜位立通贊唱行分獻禮各引贊引分獻官詣盥洗所勺水淨巾引詣酒尊所司尊者舉羃酌酒各引贊引分獻官至十哲兩廡神位前跪捧帛者跪進帛分獻官獻帛授接帛者奠於神位前捧爵者跪進爵

分獻官獻爵授接爵者奠於總案上執事於各神前自奠一爵叩首與復位麾生偃麾樂盡櫟啟司節伏節舞生罷舞通贊唱行亞獻禮引贊引獻官詣酒尊所司尊者舉冪酌酒詣

至聖先師孔子神位前樂奏安和之曲麾生揚麾樂生擊祝樂作司節舉節舞生執籥秉翟而舞儀如初獻四配十哲兩廡亞終二獻胥同初獻復位麾生偃麾樂盡櫟啟司節伏節舞生罷舞通贊唱行終獻禮儀同初獻樂奏景和之曲樂作佾舞獻爵

諸儀畢復位麾生偃麾樂盡櫟啟司節伏節舞生罷舞通贊唱飲福受胙進福酒者捧爵進福胙者取正壇羊左肩胙置於盤引贊引獻官詣飲福位跪卽讀祝位捧福酒者跪進酒於獻官右獻官受飲以爵授接爵者捧福胙者跪進胙於獻官右獻官受胙以胙授接胙者由中門捧出叩首與復位三叩首各官同唱徹饌樂奏宣和之曲樂生奏如前式執事者跪舉籩豆一器一舉而徹兩班司節分引舞生於丹墀東西相向序立不舞麾生偃麾樂盡

櫟敵唱辭神樂奏祥和之曲樂生奏如前式三叩
首各官同麾生偃麾樂暫止讀祝者捧祝奠帛者
捧帛各詣燎所正廟帛由中門出四配十哲兩廡
帛由左右門山唱望燎麾生揚麾接奏前樂引贊
引獻官分獻官陪祭官至燎所唱焚文帛九段焚
訖麾生偃麾樂止復位通贊唱禮畢

樂章

迎神 咸和之曲無舞

大哉孔聖道德尊崇維持王化斯民是宗典祀有常

繁峙縣志

卷之三

五

精純並隆神其來格於昭聖容

奠帛 寧和之曲有舞

自生民來誰底其盛惟師神明度越前聖粢帛具陳

禮容斯稱黍稷非馨惟神之聽

初獻 安和之曲有舞

大哉聖師實天生德作樂以崇時祀無斃清酤惟馨

嘉牲孔碩薦羞神明庶幾昭格

亞獻 景和之曲有舞

百王宗師生民物軌瞻之洋洋神其寧止酌彼金罍

惟清且旨登獻維三於嘻成禮

終獻 景和之曲同亞獻有舞

徹饌 宣和之曲無舞

犧象在前豆籩在列以享以薦既芬既潔禮成樂備

人和神悅祭則受福率遵無越

送神 祥和之曲無舞

有嚴學宮四方來崇恪恭祀事威儀雝雝歆茲惟馨

神馭還復明禋斯畢咸膺百福

望燎 祥和之曲同送神無舞

繁峙縣志

卷之三

六

樂器 雍正三年新定

麾 金鐘 玉磬 鼓 搏拊 祝 敔 琴

瑟 排簫 笙 簫 笛 塤

舞器

節 羽 籥 干 戚

崇聖祠同日先祭無樂舞餘儀同

關帝廟二月初十日五月十三日八月初七日祭

祭期先一日省牲穿補服行儀禮正日三號後同

各官朝服詣廟先祭三代行兩跪六叩首禮畢祭

關帝文東武西分班序立鼓三嚴主祭官就位陪祭
官各就位瘞毛血迎神三跪九叩首禮畢行初獻
禮引贊引至盥洗所盥畢詣神位前跪奠帛獻爵
讀祝文行三叩首禮畢復位亞終獻如初儀三獻
畢引贊引獻官詣神位前跪飲福受胙謝胙行三
叩首禮復位徹饌送神再行三跪九叩首禮畢執
事者捧祝帛各詣燎所望燎焚祝帛復位禮畢
文昌廟二月初三日八月初二日祭 祭儀同關帝
廟

南北壇春秋仲月上戊日祭

至期朝服詣壇前鼓三嚴主祭官就位陪祭官各
就位儀與祭關帝廟同祭畢至

土地祠換襟袍詣神位前行一跪三叩首禮畢行
小三獻禮復位再行一跪三叩首禮畢

龍王廟春秋二仲辰日祭

至期詣廟就位行兩跪六叩首禮詣盥洗所盥洗
畢詣神位前行獻禮三獻畢復位再行兩跪六叩
首禮畢

邑厲壇每歲清明孟秋望日孟冬朔日祭

城西門外設壇至期穿補服至壇所就位行兩跪
六叩首禮詣盥洗所盥洗詣城隍神位前行小三
獻禮復位再行兩跪六叩首禮典史隨城隍先行
獻官向東一揖次行

先農壇仲春亥日祭

至期縣正同各官朝服至壇所鼓三嚴文武官分
班立通贊唱主祭官就位陪祭官各就位行三跪
九叩首禮至盥洗至望燎皆如祭關帝廟儀祭畢

繁峙縣志

卷之三

六

更襟袍行耕藉禮文武東西向南九推隨後播種
畢仍更朝服向東北闕叩 恩行三跪九叩首禮
畢

城隍神每春秋二仲祭於風雲雷雨山川壇厲祭則
主之

常雩禮四月辛丑日祭

鄉飲酒禮每歲正月望日十月朔日舉行

屆期主人先至明倫堂用帖請三賓賓至各官俱
接大門外禮生贊唱初讓賓主一揖賓西主東而

行至二門贊唱再讓賓主一揖至堂階前贊唱三讓賓主一揖至堂階臺下賓西主東拜

聖牌行三跪九叩首禮興贊唱升堂賓西向東立主東向西立贊唱主拜賓行四拜禮贊唱賓酬主賓轉東立主轉西立行四拜禮贊唱賓主各復位賓轉西主轉東贊唱司正官揚解禮生導引學正至聖牌前跪進三爵贊唱各官並執事人皆跪首貢讀揚解文曰鄉飲酒禮載於禮記養老引年歷代罔異惟我

聖皇鑒古立治念茲黃髮爲

國之瑞

恩賜餽馨虞庠用序道德文章忠孝節義觀瞻在茲務式是冀嘉禮攸行潔誠揚解賢主嘉賓酬酢交致藉茲酒醴用將敬意二三君子百爾執事共勦盛典庶幾罔愧讀畢引學正復位此時行禮已畢禮生先請大賓就席次請介賓次請耆賓次請主人及各官俱就席主人於大賓前行禮進爵學正在介賓前進爵學副在耆賓前進爵各官亦隨後拱

讓三賓挨次在主人前及各官前酬禮進爵畢贊
唱賓主皆坐供講案執事生員供講案贊唱讀律
齊長立席前讀律曰鄉飲酒禮古有定式違者笞
五十贊唱讀告示齊長立席前讀告示曰鄉飲酒
禮非爲酒內原以尊高年重有德也爲臣盡忠爲
子盡孝長幼有序和睦鄉里惟此大典無墜所生
讀畢贊唱執事皆坐又贊鳴鐘鼓又贊進饌又贊
飲酒又贊歌詩生員歌鹿鳴之詩一章歌詩生員
少退站立又贊鳴鐘鼓進饌飲酒歌詩如初禮生
員歌南山之詩一章少退站立又贊鳴鐘鼓進饌
飲酒歌詩生員歌湛露之詩一章少退站立贊唱
徹饌賓主散席贊唱望

闕謝

恩賓西主東向東北行三跪九叩首禮畢主送賓至
大門外禮生贊唱賓不顧矣禮成

按繁峙鄉飲酒禮久廢但有舉報之名無奉行之
實每不勝餼存禮亡之感聞五臺縣志於乾隆乙
未迄丁酉禮凡三舉儀節昭昭可考使皆舉而行

之則養老引年典禮修明庶幾孝弟之心可以油然而生矣取而錄之亦我愛其禮之意云爾

公式

迎春儀注

立春先一日朝服迎於東郊至期擊三柳各官坐大堂飲酒三巡演唱三齣報子三報飲畢詣東郊芒神位前行三跪九叩首禮陞炮三聲各官坐春棚飲酒三巡如初禮回署至大門內安神行三跪九叩首禮立春之日詣芒神前行小三獻禮擊鼓

發炮鞭牛三至大堂飲春宴禮畢

聖誕冬至元旦朝賀儀注

至日三號後文武各官朝服齊至正覺寺文東武西分班序立鼓三嚴就位行三跪九叩首禮坐班奏小樂退班禮畢

日月食救護儀注

至時僧道陰陽生齊集初虧時陰陽生執小牌稟初虧縣正素服至位前行三跪九叩首回宅食甚稟如前仍穿素服至位前行三跪九叩首候復圓

時穿補服至位前行三跪九叩首禮畢

恩詔迎接儀注

詔至縣正率僚屬朝服出郊外道旁跪接導迎至正覺寺宣

詔各官皆跪宣畢謝

恩行三跪九叩首禮

送學儀注

至日縣正穿襟袍擊三梆陞堂新生行兩跪兩揖禮畢依次列坐飲酒演唱畢新生出席謝向上三

繁峙縣志

卷之三

三

揖簪花起身先行縣主送至文廟同教諭謁廟行三跪九叩首禮游泮畢至明倫堂與教諭行交拜禮畢新生行禮分坐演唱畢回署

賓興儀注

生員赴科場大堂結綵棚一座上書鹿鳴預宴二門搭仙橋一座前後懸小額一鹿野一鴻達至期儒學率諸生公服至縣主公服出迎至大堂與儒學行揖禮畢諸生向上行兩跪兩揖禮禮生唱諸生各就席赴宴諸生向上三揖就席分賓主坐探

馬由中門飛報皆預賀吉語飲畢諸生出席向上
三揖縣主同儒學送至二門外簪花登程畢回署
舉人會試禮亦如之

武備志

武事 兵制 俸餉 防汛 武功

左氏傳云天生五材廢一不可誰能去兵山西雁門諸郡古稱用武之區繁峙居兩山之間北扼十口南連五臺東界直隸實全晉咽喉也故營員之設較他邑爲多大小相制犄角互援其所以重邊防而衛全國者直苞桑之固也志武備

兵制

北樓營原駐北樓口轄北樓平刑茹越三營竇村

繁峙縣志

卷之三

三

金剛庫臺懷三鎮小石車道場二口

車道場官兵今裁

額設參將一員中軍守備一員把總二員馬步戰

守兵四百六十六名康熙五十二年移參將一員

把總二員分爲左右貳司駐繁峙縣城中軍守備

留駐北樓口將繁峙縣城舊設把總移駐金剛庫

五十八年改把總爲千總一員雍正七年添設外

委二員乾隆二十七年添設額外外委一員三十

五年將右司把總移駐小石營四十八年增添額

外外委一員現設參將一員例馬八匹千總一員

例馬二匹外委二員例馬一匹額外外委二員例馬一匹馬兵二十九名騎操馬二十九匹步兵七十九名守兵一百四十八名共兵二百五十六名北樓口留駐中軍守備一員雍正七年添設經制外委二員守備例馬四匹外委例馬一匹馬兵九名騎操馬九匹步兵四十九名守兵六十三名共兵一百二十一名

平刑營原設守備一員把總一員康熙五十二年將把總移駐臺懷鎮馬步戰守兵一百三十五名

雍正七年添設外委二員十年改守備爲都司僉書現設都司一員例馬四匹外委二員例馬一匹馬兵八名騎操馬八匹步戰兵三十九名守兵五十八名共兵一百五十五名

平刑嶺口去關三里明設把總一員統於平刑關今廢

團城子口關北才五里明設把總一員統於平刑關今廢

太安嶺口關北二十五里原設把總一員康熙四

十三年移駐縣城今廢

葫蘆頭口關北四十里明設把總一員後移大營
堡今廢

茹越口營原設守備一員把總一員馬步戰守兵
一百九十名康熙五十一年移把總駐竇村鎮帶
兵五十名雍正七年添設外委把總一員十二年
將守備外委俱裁減改設把總一員現設把總一
員例馬二匹馬兵六名騎操馬六匹步戰兵十八
名守兵二十七名共兵五十一名

小石口營原設守備一員把總一員康熙二十八
年將把總移調新平路屬駐防東井集堡雍正七
年添設外委把總一員乾隆二十七年添設額外
外委一員馬步戰守兵一百五十名乾隆三十五
年官兵改移豐川營屬得勝路以繁峙縣把總移
駐現設把總一員例馬二匹馬兵三名騎操馬三
匹步戰兵十一名守兵二十六名共兵四十名
大石口東北四十五里明設把總一員統於小石
口守備今廢

馬蘭口西北五十里明設把總一員統兵二百名
轄於太原營參將今廢

車道場口原設把總一員兵三十九名雍正十二
年裁減

凌雲口縣東八十里明設把總一員領於北樓營
參將今廢

寶村鎮康熙五十一年移駐把總一員例馬二匹
馬兵二名騎操馬二匹步戰兵六名守兵二十五
名共兵三十三名

金剛庫營康熙五十二年將繁峙縣把總一員移
駐馬步戰守兵九十名五十八年改把總爲千總
雍正七年添設外委把總一員現設千總一員例
馬二匹外委一員例馬一匹馬兵六名騎操馬六
匹步戰兵三十二名守兵五十七名共兵九十五
名

臺懷鎮原設經制把總一員康熙五十二年自平
刑移駐乾隆二十七年添設額外外委一員四十
七年增添額外外委一員馬步戰守兵九十九名

現設把總一員例馬二匹外委二員例馬一匹馬兵十名騎操馬十匹步戰兵四十七名守兵四十一名共兵九十八名

以上北樓營所轄等處現設官共二十員例馬三十四匹騎操馬七十三匹馬兵七十三名步戰兵二百八十一名守兵四百四十四名共馬一百七匹兵七百九十八名

按寶村金剛庫臺懷鎮三營皆在五臺縣境以北樓營叅將駐劄繁峙縣城中三營皆其所轄

餉銀存貯縣庫米豆支自縣倉按月會同散給職非縣令所專司事則其兼治故并志之非徒費筆墨也

俸餉

參將俸薪銀二百四十三兩三錢三分六釐

都司俸薪銀一百四十一兩三錢八分四釐

中軍守備俸薪銀九十兩六錢九分六釐

千總俸薪銀三十六兩

把總俸薪銀三十六兩

外委每月支餉銀二兩每年二十四兩

額外外委每月支餉銀二兩每年二十四兩

乾隆四十七年欽奉

諭旨武職官一體給與養廉卽於是年正月爲始

參將養廉銀五百兩

都司養廉銀二百六十兩

中軍守備養廉銀二百兩

千總養廉銀一百二十兩

把總養廉銀九十兩

繁峙縣志

卷之三

五

經制外委養廉銀十八兩

俸薪額馬草折等銀仍照舊支給

馬兵每名月支餉銀二兩

步兵每名月支餉銀一兩五錢

守兵每名月支餉銀一兩

兵丁每名月支米三斗馬每匹春冬二季月支料

豆九斗

額馬騎操馬每匹春冬二季月支草折銀四錢二

分夏秋二季月支草乾銀五錢

本城營參將每年草折乾銀四十四兩一錢六分
料豆四十三石二斗 千總每年草折乾銀一十
一兩四分料豆十石八斗 外委二員每年共草
折乾銀十一兩四分料豆十石八斗米七石二斗
額外外委二員每年共草折乾銀十一兩四分
料豆十石八斗米七石二斗 馬兵二十九名每
年共餉銀六百九十六兩草折乾銀一百六十兩
料豆一百五十六石六斗米一百四石四斗 步
戰兵七十九名每年共餉銀一千四百二十二兩
九百三十六石

繁峙縣志 卷之三

米二百八十四石四斗 守兵一百四十八名每
年共餉銀一千七百七十六兩米五百三十二石
八斗 通共每年俸餉草折乾銀五千一百六十
二兩六錢一分六釐料豆二百三十二石二斗米
北樓口營中軍守備每年草折乾銀二十二兩八
分料豆二十一石六斗 外委二員每年共草折
乾銀十一兩四分料豆十石八斗米七石二斗馬
兵九名每年餉銀二百六十五兩六錢八分料豆

四十八石六斗米三十二石四斗 步戰兵四十
九名每年餉銀八百八十二兩米一百七十六石
四斗 守兵六十三名每年餉銀七百五十六兩
米二百二十六石八斗 通共俸餉草折乾銀二
千三百一十一兩四錢九分六釐料豆八十一石
米四百四十二石八斗

平刑關營都司每年草折乾銀二十二兩八分料
豆二十一石六斗 外委二員每年草折乾銀十
一兩四分料豆十石八斗米七石二斗 馬兵八

名每年餉銀二百三十六兩一錢六分料豆四十
三石二斗米二十八石八斗 步戰兵三十九名
每年餉銀七百二兩米一百四十石四斗 守兵
五十名每年餉銀六百九十六兩米二百八石八
斗 通共每年草折乾餉銀二千一百五十三兩
三錢八分四釐料豆七十五石六斗米三百八十
五石二斗

茹越口營把總每年草折乾銀十一兩四分料豆
十石八斗 馬兵六名每年餉銀一百七十七兩

一錢二分料豆三十二石四斗米二十一石六斗
步戰兵十八名每年餉銀三百二十四兩米六
十四石八斗 守兵二十七名每年餉銀三百二
十四兩米九十七石二斗 通共草折乾餉銀九
百六十二兩一錢六分料豆四十三石二斗米一
百八十三石六斗

小石口營把總每年草折乾銀十一兩四分料豆
十石八斗 馬兵三名每年餉銀八百八十五錢
六分料豆十六石二斗米十石八斗 步戰兵十

一名每年餉銀一百九十八兩米三十九石六斗
守兵二十六名每年餉銀三百一十二兩米九
十三石六斗 通共每年草折乾餉銀七百三十
五兩六錢料豆二十七石米一百四十四石

竇村鎮營把總每年草折乾銀十一兩四分料豆
十石八斗 馬兵二名每年餉銀五十九兩四分
料豆十石八斗米七石二斗 步戰兵六名每年
餉銀一百八兩米二十一石六斗 守兵二十五
名每年餉銀三百兩米九十石 通共每年草折

乾餉銀六百四兩八分料豆二十一石六斗米二百一十八石八斗

金剛庫營千總每年草折乾銀十一兩四分料豆十石八斗 外委一員每年草折乾銀五兩五錢二分料豆五石四斗米三石六斗 馬兵六名每年餉銀一百七十七兩一錢二分料豆三十二石四斗米二十一石六斗 步戰兵三十二名每年餉銀五百七十六兩米一百一十五石二斗 守兵五十七名每年餉銀六百八十四兩米二百五

石二斗 通共每年草折乾餉銀一千六百五十一兩六錢八分料豆四十八石六斗米三百四十五石六斗

臺懷鎮營把總每年草折乾銀十一兩四分料豆十石八斗 額外外委二員每年草折乾銀十一兩四分料豆十石八斗米七石二斗 馬兵十名每年餉銀二百九十五兩二錢料豆五十四石米三十六石 步戰兵四十七名每年餉銀八百四十六兩米一百六十九石二斗 守兵四十名每

年餉銀四百八十兩米一百四十四石 通共草
折乾餉銀每年一千八百一十七兩二錢八分料
豆七十五石六斗米三百五十六石四斗
以上八營通共俸餉草折乾等銀每年一萬五千
三百九十八兩二錢九分六釐料豆六百四石八
斗米二千九百一十二石四斗

防汛

北樓營分汛設防在繁峙縣屬者十六處在五臺
縣境者十二處每衝汛設兵五名僻汛設兵三名

繁峙縣志

卷之三

三

本城營汛防六處

東留屬

兵五名

聖水頭

兵五名

南峪口

兵五名

東山底

兵五名

野子廠

兵五名

張先生溝

兵五名

北樓口汛防二處

下滙村

兵五名

鶴子溝

兵五名

平刑營汛防三處雍正十二年裁減車道場口官

兵將金山舖一汛撥屬平刑營

石橋澗

兵五名

孤山舖

兵五名

金山舖

兵五名

茹越口營汛防三處

福連坊 兵五名 永興鎮 兵五名 鐵角梁 兵五名

小石口營汛防二處

馮家莊 兵五名 沙河堡 兵五名

寶村鎮汛防三處

大柏村 兵五名 伏勝村 兵五名 潘家峪 兵五名

金剛庫汛防四處

石觜村 兵五名 盧家莊 兵五名 大插箭 兵五名

白頭菴 兵五名

臺懷鎮汛防五處

繁峙縣志 卷之三

三

碧山寺 兵五名 棲賢社 兵五名 金閣嶺 兵五名

大明煙 兵五名 獅子窩 兵五名

舊制縣防設兵三十名百總領之康熙四十三年

新設把總一員路防有東留屬福連坊下永興馮

家莊東沙河下匯村狼澗村金山鋪橋兒溝石橋

澗每處設兵二名步卒一名以為道路截劫之防

向在各村居住自康熙四十年於墩台下建營房

居焉軍民兩便路亦無失口防有岩頭村大李牛

大木角大宋峪獅子坪南峪口小栢峪白坡頭冶

口村紅門峪鐵櫪嶺每處步卒十名把總一員住南峪口統領之今裁移增減各不同

武功

漢高帝七年十月周勃等從帝擊破韓王信軍降虜人遂至武泉 建武十年上谷太守王霸等戰勝賈覽於平城下還合諸將入雁門與驍騎大將軍杜茂會攻盧芳將尹由於崞繁峙不克

晉太元元年十二月劉庫仁遣妻兄公孫希擊破慕容垂將平規復大舉救苻丕發上谷及代雁門

繁峙縣志

卷之三

三

兵次於繁峙慕容文等思東歸率三都人攻殺庫仁

宋張宗誨字習之司空齊賢第二子少喜學兵法陰陽象緯之書無不通究齊賢知代州嘗預計畫遂有土澄砦繁峙之捷

明正統十四年九月瓦剌由茹越口入掠忻崞繁峙五臺

嘉靖三十七年北虜從馬蘭口入掠知縣王三益追之斬獲虜酋一級戰馬三匹

國朝順治五年逆賊劉遷據城大肆焚掠官兵收捕
之

繁峙縣志

卷之三

三

職官志

官制 額官 歷官 名宦

天佑下民作之君師設官分職蓋以為民也我朝澄敘官方三載考績黜陟攸分吏治烝烝日上但姓氏里居不免久而就湮故歷敘於左以明職守以別循良皆於是乎在至有明以前守斯土者亦追敘焉備掌故也志職官

額官

知縣一員

繁峙縣志

卷之三

三六

縣丞一員

明天啟七年裁

驛丞一員

今裁

平刑關倉大使一員

雍正九年裁改設巡檢

巡檢司一員

駐平刑關

典史一員

復設教諭一員

訓導一員

道光十二年裁

醫官一員

陰陽學一員

僧會司一員

道教一員

北樓營參將一員 駐本城

都司一員 駐平刑關

中軍守備一員 駐北樓口

千總一員 駐本城

把總二員 一駐茹越口 一駐小石口

經制外委六員 本城二 平刑營二 北樓口二

額此外委二員 本城

繁峙縣志 卷之三

三九

歷宦

漢

鹵侯張平漢高祖十二年六月以擊黥布盧縮功

由南陽侯晉封邑二千七百戶諡曰莊子勝襲孝

文四年國除

北魏

杜慈度弼父繁峙令

東魏 置廓州

叱列平武定初廓州刺史

隋

敬 釗仁壽中繁峙令 有傳

唐

韋懷質貞觀中繁峙令

元 陞為堅州

知州

劉希元 泰定中任

裴 勤 泰定中任

闊里吉思 至正中任

繁峙縣志

卷之三

四

馮禮周 至正中任

趙 遜 至正中任

常 禮 至正中任

高 琰 至正中任

昔里吉思 為達魯花赤乃監州者至元中任

同知

豆伯顏察兒 至正中任

漆 實 至正中任

蘇志學 至正中任

李羅帖木耳 至正中任

郝顯祖 至正中任

馬從政 至正中任

判官

冀 懋 泰定中任

王 建 至正中任

杜伯不花哈刺八都兒 至正中任

孫丑奴 至元中任

知縣

繁峙縣志

卷之三

四

明

劉 英 直隸寶坻人茂材有傳洪武年間任有傳

王 懋 陝西岐山縣人監生永樂中任

樂 翔 失考

韓 英 山東武定州人監生宣德中任

董 臨 順天房山縣人監生正統中任

馬 駐 直隸青縣人監生正統中任

李 齊 直隸蠡縣人監生正統中任

朱 福 河南歸德人監生景泰中任

彭慶

陝西澄縣人監生景泰中任

曹振

直隸容縣人監生天順中任

李芳

直隸安肅縣人監生天順中任

張壽

陝西華陰縣人監生入名宦成化中任有傳

張璽

陝西秦州人舉人成化中任

許文

山東利津人監生宏治中任

侯威

直隸曲陽人舉人宏治中任

馬通

陝西同州人監生宏治中任有傳

蔣瓚

山東高唐州人舉人入名宦正德中任有傳

繁峙縣志

卷之三

三

李珍

直隸鹽山人監生正德中任

郭洪

正德中任氏里失考

于灌

正德中任

白琦

正德中任

馬馴

陝西綏德州人舉人正德中任

王翰

正德中任

鄭經

正德中任

楊鎮

直隸靜海人監生嘉靖中任

于隆

直隸河間衛人舉人嘉靖中任

蘇章

山東臨清人監生嘉靖中任

戴魁

河南掖縣人監生嘉靖中任

齊魯

直隸青縣人監生嘉靖中任

魏洪

陝西南鄭人監生嘉靖中任

江翰

河南沙縣人監生嘉靖中任

王思聰

直隸人監生嘉靖中任

楊得祚

順天永清人舉人嘉靖中任

劉定邦

直隸正定人拔貢嘉靖中任

劉橋

直隸房山人拔貢嘉靖中任

繁峙縣志

卷之三

三

唐紀

山東陵縣人貢嘉靖中任

董尚義

山東淄川人貢嘉靖中任

王三益

陝西朝邑人舉人有傳嘉靖中任有傳

張翀

山東滋陽人舉人嘉靖中人

楊守信

陝西高陵人舉人有傳嘉靖中任有傳

王民仰

直隸鉅鹿人舉人隆慶中任

楊朗

陝西商南人舉人隆慶中任

任朝臣

陝西洋縣人舉人隆慶中任

王永亨

河南洛陽人舉人隆慶中任

王曰然 陝西鎮安人監生隆慶中任

李先春 山東長青人貢萬曆中任

于梓 陝西靈臺人貢萬曆中任

閻邦英 直隸贊皇人貢萬曆中任

郭廷輔 江西豐城人舉人萬曆中任

張一鶚 陝西會寧人舉人萬曆中任

李春魁 陝西西寧衛人貢萬曆中任

吳璵 山東莒縣人恩貢萬曆中任

邢雲路 直隸安肅人進士萬曆中任

繁峙縣志

卷之三

四

宋才 直隸肥鄉人舉人萬曆中任

耿慎勤 直隸冀州人舉人萬曆中任

塗雲路 直隸延慶州人舉人有傳萬曆中任有傳

劉化龍 南直霍山人貢萬曆中任有傳

張明獻 陝西韓城人舉人萬曆中任

申拱 河南人舉人萬曆中任

蔣秉琨 廣西全州人萬曆中任

高於鄉 虹縣人貢萬曆中任

孫昌祚 山東即墨人貢萬曆中任

張大猷 貢生萬曆中任

劉運開 直隸人萬曆中任

李昌 陝西朝邑人舉人萬曆中任

程雲翰 陝西鳳翔人舉人萬曆中任

李孟祥 山東滕縣人貢萬曆中任

劉光 直隸威縣人貢萬曆中任

周漢傑 福餘人進士萬曆中任有傳

後無考

國朝

繁峙縣志

卷之三

聖

許侗 直隸高陽人舉人順治元年任

劉進科 滿洲人貢順治二年任

崔尙質 遼陽人貢順治四年到任五年遭劉遷之變赴難入忠烈祠有傳

張志高 遼陽人貢順治六年任有傳

戴明玉 湖廣漢陽人舉人順治十年任

麻爾賡 順天宛平人貢順治十三年任

鄒曉 山東萊州衛人貢順治十四年任

黃光華 浙江壽昌人貢順治十六年任

戴璽 順天玉田人進士順治十七年任有傳

郭傑

奉天鐵嶺人鑲白旗筆帖式康熙十一年任有傳

甘文炳

遼東瀋陽人正藍旗筆帖式康熙十七年任

張瓚

山東武定人貢康熙二十年任

劉榮

直隸饒陽人貢康熙二十五年任

王敬敷

山東樂陵人舉人康熙二十八年任

黃繼隆

廣東海豐人廕生康熙二十九年任

阮垣

河南睢州人舉人康熙三十年任有傳

胡士璿

湖北鄖陽人貢康熙三十五年任

程起蛟

直隸獻縣人監生康熙三十八年任有傳

繁峙縣志

卷之三

巽

馬遴

汾州府同知康熙三十九年十一月署詳見本傳

雒倫

河南武陟人進士康熙四十年任有傳

嚴元幃

浙江歸安人進士康熙四十三年任有傳

齊士琬

陝西洋縣人進士康熙四十五年任

程容

廣西恭城人貢康熙五十五年任

鄒煥

河南河內人貢康熙五十九年任

師正楷

陝西臨潼人舉人雍正元年任有傳

溫毓芳

陝西同官人舉人雍正二年任

楊元玠

四川南充人副貢雍正九年任有傳

楊燭

直隸固安人進士雍正十三年任有傳

田成玉

河南濬縣人進士乾隆三年任有傳

孫畧

安徽全椒人翰林改授乾隆六年任有傳

周銘詒

江西鄱陽人進士乾隆十一年任有傳

田璋

貴州玉屏人拔貢乾隆十九年任

顧學潮

河南元和人貢乾隆二十二年任

李鳳集

廣東德慶州人貢乾隆二十三年任有傳

吳泰

浙江錢塘人進士乾隆二十九年任

戴一仁

貴州廣順州人舉人乾隆三十年任

繁峙縣志

卷之三

七

伍佛保

滿洲鑲白旗繙譯舉人乾隆三十四年任有傳

虔禮寶

滿洲進士乾隆三十一年署詳見本傳

鄭如玉

廣東海陽人舉人乾隆三十七年任

仇恂

雲南建水人舉人乾隆四十一年任

劉徵泰

直隸臨榆人翰林改授乾隆四十六年任

萬科炳

江西臨川人舉人乾隆五十年任

陳蕃嗣

雲南蒙化廳人舉人乾隆五十一年任

楊元興

廣東大浦縣人舉人乾隆五十八年任

葉儒林

河南正陽人進士嘉慶八年任

錢桂

浙江仁和人舉人嘉慶十四年任

仲蘊恭

河南通許人拔貢嘉慶十四年任

李華

廣西臨桂人舉人嘉慶十五年任

陶廷颺

貴州都勻人進士嘉慶十八年任

戴先第

安徽太湖人舉人嘉慶二十年任

謝文榮

廣東博羅人舉人嘉慶二十一年任

周宗泗

四川涪州人舉人道光元年任

達興阿

滿洲鑲黃旗筆帖式道光六年任

文林

蒙古鑲紅旗舉人道光九年任

繁峙縣志

卷之三

哭

林德奎

安徽懷遠人舉人道光十一年任

華典

直隸天津人舉人道光十二年置政得廉名去時送者甚衆

周人甲

湖北蒲圻縣人拔貢道光十三年任

吳其均

河南固始縣人副貢道光十六年任

縣丞

明

陳章卯

上高縣人進士

朱思敬

常熟人貢生

李毓

高苑縣人

濮朝 江南人

張涌 益都人貢生

蘭俊 開封府人貢生

李春

劉冕 彭城縣人貢生

張林 海豐人貢生

于葛 長垣人貢生

劉東 陳州人貢生

郭廷 館陶人貢生

繁峙縣志

卷之三

四

郭承芳 昌黎人貢生

楊大用

胡紹齡 永興人

喬邦晉 阜平人

程立 婺源人

汪來 麻城人

王勤 祥符人

王繼志 德州人

劉後榮 唐縣人

劉道源 內江人

李邦仕 涇水人

聶尙勤 邯鄲人

蕭延齡 保定府人

金應兌 淮安府人

吳崇封 陝西人

縣丞缺自此裁

巡檢 雍正九年裁倉大使改設

余 虞 雍正九年任宛平人

繁峙縣志 卷之三

三

沈韶九 乾隆十九年任仁和人

吳瑞章 乾隆二十年任元和人

許大成 乾隆三十四年任漢川人

張永澍 乾隆四十八年任

蔣恒安 乾隆五十五年任

范安邦 嘉慶三年任

劉 燮 嘉慶六年任

王長年 嘉慶十年任大興人

黃昌化 嘉慶十一年任

楊芸 嘉慶十三年任

王長年 道光元年復任

典史

明

袁景

齊忠

楊經 華州人正統中任

張凝 正統中任

張泰 景泰中任

繁峙縣志 卷之三

王邃 雄縣人景泰中任

徐達 懷遠人景泰中任

韓釗 景泰中任

楊斌 景泰中任

徐端 濱州人景泰中任

李進 咸寧人成化中任

羅錦 華陰人宏治中任

黃聰 睢州人宏治中任

胡孜 正德中任

王正舟 襄城人正德中任

王琦 定興人正德中任

夏遵 文安人正德中任

岳儒 正德中任

唐曉 正德中任

董貞 嘉祥人正德中任

齊德威 永平人正德中任

苗希顏 武陽人正德中任

詹大顯 正德中任

繁峙縣志

卷之三

游縉 長清人正德中任

蔡志仁 德州人正德中任

王自智 正定人正德中任

李世寧 歧山人正德中任

郝捷 永平人嘉靖中任

高嶽 黃縣人嘉靖中任

李孟冬 冀州人嘉靖中任

黃思文 富順人嘉靖中任

馮緯 撫寧人嘉靖中任

屈節 華陰人嘉靖中任

後失考

國朝

周環顯 順治中任

王文選 順治中任

王嘉錫 蕭山人順治中任

張珍 康熙中任

解景瑄 韓城人康熙中任

孫紱 商邱人康熙中任

繁峙縣志 卷之三

田運隆 西安人康熙中任

楊建極 同州人康熙中任

潘足則 山東人康熙中任

潘良璧 鉅鹿人康熙中任

顧一夔 紹興人康熙中任

夏樹敏 休寧人康熙中任有傳

林德昌 雍正中任

張雲龍 雍正中任

徐瑛 山陰人雍正四年任

沈道遠

安肅人乾隆十六年任有傳

李長城

新建人乾隆三十年任

陳曰稼

池州府人乾隆三十四年任

曹必聞

宛平人乾隆四十一年任

李際雲

豐城人乾隆五十六年任

葉崇沃

宛平人嘉慶三年任

何培

大興人嘉慶十三年任

陶仁

大興人嘉慶十八年任

夏校

神木人道光九年任

繁峙縣志

卷之三

五

教諭

明

諸葛覃

浮山人洪武中任

管秀

湖廣石首人貢洪武中任

傅恐

直隸武邑人舉人洪武中任

劉志

寧津人舉人永樂中任

萬通

山東諸城人舉人宣德中任

賀瑄

陝西平涼人貢正統中任

屠剛

金城人舉人天順中任

郭 汜 安陽人貢天順中任

王 靚 河南彰德府人舉人成化中任

崔 明 肥鄉人貢成化中任

陳 傑 清源人貢成化中任

陳 琅 直隸深澤人貢成化中任

陳 瑤 陝西盩屋人貢正德中任

曹希賢 陝西葭州人貢正德中任

李 聲 直隸延慶人貢正德中任

何 鼐 山東高苑人貢正德中任

繁峙縣志

卷之三

五

張 鍊 湖廣麻城人貢正德中任

王 交 直隸邢台人貢正德中任

李 正 山東人貢正德中任

郭 忠 直隸邢台人正德中任

許汝瑞 直隸東安人嘉靖中任

屈尙宥 羅山人嘉靖中任

曹汝修 趙城人隆慶中任

喬維嶽 臨晉人貢隆慶中任

李榮春 芮城人貢隆慶中任

劉艾 冀州人貢隆慶中任

張慥 唐縣人貢隆慶中任

郝為臣 稷山人貢隆慶中任

裴之纁 蒲州人舉人隆慶中任

李沂 唐縣人貢隆慶中任

陳信 新添衛人舉人隆慶中任

黃乾亨 山東嘉祥人貢隆慶中任

陳志貞 直隸高陽人貢隆慶中任

侯樸 陝西甘泉人貢隆慶中任

繁峙縣志

卷之三

美

劉讓 山東日照人隆慶中任

楊天寵 偏頭所人貢隆慶中任

陳三省 山東青城人貢隆慶中任

王三餘 直隸故城人貢隆慶中任 後無考

國朝

解一元 解州人貢順治中任

周祚遠 臨汾人舉人祀名宦順治中任有傳

郭連城 洪洞人舉人有傳順治中任

吳國儒 夏縣人舉人順治中任 教諭自此裁至 康熙十八年復設

王章 絳縣人貢康熙中任

劉廷祚 稷山人貢康熙中任

張起鶚 大同井平衛人捐貢康熙中任

靳隆瑜 汾陽人捐貢康熙中任

申伯 潞城人捐貢康熙中任有傳

張體仁 浮山人廩貢康熙中任

甯樹業 聞喜人歲貢康熙中任

李又白 翼城人舉人雍正中任

牛邃修 太谷人捐貢雍正中任

繁峙縣志 卷之三

五

侯繼周 介休人選貢乾隆中任有傳

李子理 聞喜人拔貢乾隆中任

康基田 興縣人舉人乾隆中任有傳

尉涵 太平人歲貢乾隆中任

劉丹書 沁州人拔貢乾隆中任

左機 永濟人舉人乾隆中任

梁樞 靈石人廩貢乾隆中任有傳

王述 汾西人拔貢乾隆中任

王執蒲 平定州人舉人乾隆中任

董揚曾 介休人拔貢乾隆中任

趙成鳳 榆次人副貢乾隆中任

董揚曾 復任

段鳴岐 太原人副榜

楊乃瀚 安邑人

王士元 渾源州人拔貢

劉溥 陽城人副榜

任一硯 太谷人 恩貢

祁塚 高平人歲貢舉孝廉方正道光十三年任

繁峙縣志

卷之三

五

訓導

明

劉昇 淮縣人洪武中任

賈益 徐溝人洪武中任

呂濬 洪武中任

王本 醴泉人洪武中任

杜棠 衮州府人洪武中任

車遜

劉憲

穆貴

王道綱

傅昇 以上皆洪武中任里居無考

劉朝

李璞 以上皆永樂中任里居無考

韓清 正統中任

駱安 景泰中任

石温 曲阜人舉人天順中任

曹海 天順中任

繁峙縣志

卷之三

堯

郝瑄 阜城人成化中任

梁翼 行唐人成化中任

龐簡 南陽衛人成化中任

張鳴鳳 淄縣人正德中任

戴惠 邢台人正德中任

趙清 延安人正德中任

王祿 玉田人正德中任

許賓 平山衛人正德中任

張舜元 洮州衛人正德中任

史直 聊城人正德中任

張文光 邯鄲人正德中任

張縉 荏平人正德中任

牛承裕 洛陽人正德中任

謝謹 息縣人正德中任

李維芳 臨洮人嘉靖中任

趙鵠 商周人隆慶中任

崔如嵩 安肅人隆慶中任

王坦 綏德州人萬曆中任

繁峙縣志

卷之三

卒

王化洽 山東人萬曆中任

王永 鄉寧人萬曆中任

段臻 懷仁人萬曆中任

陳橋 西安府前衛人萬曆中任

張四教 石樓人貢萬曆中任

後無考

國朝

賈懷第 渾源人歲貢順治中任

羅俊秀 屯留人歲貢順治中任

石獻金 石樓人順治中任

楊瑞 介休人順治中任

李際亨 孝義人康熙中任

張策 坦曲人康熙中任

石祿 陽城人康熙中任

郝捷 懷仁人康熙中任

胡化中 太平人康熙中任

仇翊道 曲沃人康熙中任

晉裴勳 潞安人捐貢康熙中任

繁峙縣志

卷之三

空

曹湜 陵川人康熙中任

張宗良 臨縣人康熙中任

王汝為 和順人歲貢雍正中任

董振烈 介休人歲貢雍正中任

馬發一 朔州人歲貢雍正中任

羅謙 猗氏人舉人乾隆中任

吉星臨 絳州人歲貢乾隆中任

曹周屏 大寧人歲貢乾隆中任

趙三多 樂平人歲貢乾隆中任

吳侃 沁州人舉人乾隆中任

譚枝 廣靈人歲貢乾隆中任

單文秀 大寧人歲貢乾隆中任

榮爾仁 交城人歲貢乾隆中任

任璵 汾陽人歲貢乾隆中任

吳沆 沁州人拔貢乾隆中任

鄧天翰 沁源人歲貢

張鴻才 嵐縣人歲貢

王烜 安邑人歲貢

繁峙縣志

卷之三

奎

潘鵬翥 聞喜人舉人

崔巒 沁源人副榜

張廷魁 太原人舉人

劉三香 高平人舉人

李勳 孟縣人舉人

鄭志仁 孟縣人舉人

訓導至此裁

叅將

竇志偉 康熙中任正定人

周天健 康熙中任河南人

楊天桎 雍正中任鑲黃旗人

張大猷 雍正中任固原人

李仲秀 乾隆中任寧夏人

甘文玉 乾隆中任安邊人

楊贊 乾隆中任山陽人

王弘召 乾隆中任貴州人

額爾登額 乾隆中任鑲藍旗人

張國威 乾隆中任晉州人

繁峙縣志 卷之三 奎

李中謨 乾隆中任長安人

明安圖 乾隆中任正紅旗蒙古人

清德

王棟

羅思舉

張承德

劉廷斌

宣朝剛

田中桂

阿爾松阿

馬裕碩 漢軍鑲紅旗人道光 年任勸紳士劉

人甚便山 下有碑記

都司

明

胡遐齡 永寧衛人嘉靖中任

田琦 蔚州衛人嘉靖中任

劉岳 保定衛人嘉靖中任

韓彬 萬全衛人嘉靖中任

繁峙縣志

卷之三

畜

葉經 京衛人嘉靖中任

許昭訓 振武衛指揮嘉靖中任

涂應詔 京衛人武進士嘉靖中任

常經 潞安衛人武進士嘉靖中任

蘇來后 偏頭所人嘉靖中任

施相 振武衛人嘉靖中任

趙堂 太原衛人嘉靖中任

王璋 太原衛人嘉靖中任

孫麒 天成衛人嘉靖中任

朱卿 天成衛人嘉靖中任

邱如葉 鎮西衛人嘉靖中任

葉威 綏德衛人隆慶中任

王昱 榆林衛人隆慶中任

孫錦 綏德衛人萬曆中任

劉經 大同右衛人萬曆中任

劉光祚 金吾前衛人萬曆中任

馬政 平陽衛人萬曆中任

蔡國春 錦衣衛人進士萬曆中任

繁峙縣志

卷之三

七

許其選 振武衛指揮萬曆中任

魏孔興 沁州所人進士萬曆中任

袁鏜 太原左衛指揮萬曆中任

李蘭 金吾左衛指揮萬曆中任

萬化丰 偏頭所指揮萬曆中任

趙天愛 太原左衛萬曆中任

朱國正 太原左衛萬曆中任

郝承宣 宣府前衛萬曆中任

莊蒞民 陝西人萬曆中任

葛維藩 太原衛萬曆中任

母壽祖 天津衛人萬曆中任

趙維忠 太原左衛萬曆中任

周永延 京衛武進士萬曆中任

周宏祚 振武衛人萬曆中任

查克榮 潞州衛人萬曆中任

吳學恭 振武衛指揮萬曆中任

周之士 鎮西衛指揮萬曆中任

沈鯤 大同威遠衛都指揮天啟六年任

繁峙縣志

卷之三

奕

吳一春 振武衛崇禎四年任

王宏祉 直隸容城人進士崇禎五年任

梁之孟 靈石人進士崇禎八年正月到任五月十四日陣亡

林永昌 鎮西衛指揮崇禎末年任

何爾英 京衛人進士崇禎末年任

張振 保安人進士崇禎末年任

國朝

趙英 陝西人順治初任

梁肇蔭 湖廣人進士順治初任

徐國禎 遼東人順治二年任

張國弼 京衛人順治五年任

李國棟 大興人順治十一年任

任萬虎 鎮西衛人順治十五年任

周正 上元人順治十八年任

孫世堯 榆林衛人康熙十二年任

芮復光 寶坻人康熙十九年任

楊煥宇 太平人康熙二十五年任

白世祿 大同府前衛人康熙三十九年任

繁峙縣志 卷之三 七

楊夢鹿 當塗人康熙五十二年任

王象泰 綏德州人康熙六十一年任

林茂 同安人雍正六年任 以上皆守備

魏漢朝 固原人乾隆四年任都司

劉廣 江夏人乾隆十五年任

張志紳 順天府人乾隆二十一年任

來至仁 奉天人乾隆二十八年任

段玉才 懷慶人乾隆三十六年任

扎親 鑲藍旗滿洲人乾隆三十七年任

傅賡揚 武昌府人乾隆四十六年任

馬天奇 甘肅人乾隆五十三年任

胡圖禮 滿洲人乾隆五十九年任

費存孝 漢軍嘉慶二年任

白應祥 漢軍嘉慶五年任

富明 滿洲人嘉慶十二年任

張承德 遵化州人嘉慶十七年任

朱應衡 常德府人嘉慶二十三年任

惠昌 滿洲鑲紅旗人道光三年任

繁峙縣志 卷之三 矣

任樹藩

中軍守備

王珍 陝西人康熙中任

劉國鼎 山東人康熙中任

史特薦 江南人雍正中任

彭國寶 直隸人雍正中任

王石 正紅旗人乾隆中任

西三泰 鑲白旗人乾隆中任

觀德 鑲白旗人乾隆中任

巴爾龍 蒙古正藍旗人乾隆中任

阿爾綳阿 正黃旗人乾隆中任

富明 滿洲鑲藍旗人道光 年任

本城千總 自乾隆四十年起以前無考

葛善慶

冀成德

雷永安

方觀德

覃福

繁峙縣志 卷之三

完

馬鳳

賈鎰才 左雲人

魏陞

金剛庫千總

邢清和

王福祿

高如崗

茹越口把總

張鳴玉

劉德政

張御

姜大成

小石口把總

王得功

劉麟趾

禹濱

臺懷鎮把總

劉舉

繁峙縣志

卷之三

三

趙炳

班上發

盧國林


竇村鎮把總

馮章紹

宋喜

呂永聲


繁峙縣志卷之三終



繁峙縣志

名宦科目

冊四



名宦

隋

敬 釗爲繁峙令有能名漢王諒反城陷賊帥墨弼執釗送僞將喬鍾葵署代州總管司馬釗正色拒之誓以死會葵敗乃免釗字積善河東蒲坂人

明

劉 英直隸寶坻人茂才洪武年間任律身廉潔賦役均平民樂其治後以言事當罷邑人謝整

繁峙縣志

卷之四

一

等備陳善政赴闕請留準復職愈加刻勵不受私謁政聲益卓三年復當去官上知其賢仍復職考滿陞去邑人思之祀名宦祠

張 壽華陰縣人監生成化年間任清慎勤能吏畏民服陞員外郎祀名宦祠

馬 通字致遠陝西同州人監生先任博野東鹿有政聲宏治間來尹茲邑時多逋賦士不知學乃勤勸課重師儒俗爲一變賦亦畢輸會大水沒禾稼州縣報災者承風旨不以實聞公獨詣

臺司力爭得報全災行多善政民被其澤卒於
官

蔣 瓚高唐州人舉人正德年間任嚴明公慎令
行禁止陞戶部員外郎祀名宦祠

王三益字小山朝邑縣人舉人嘉靖年間任持身
廉潔治事勤慎有文武經濟才會邊事告警委
公以瓶刑等十口要務盡力隄防使無東顧憂
陞保安州知州去之日百姓爲之罷市輟耕立
去思碑祀名宦祠

塗雲路號升菴延慶州人舉人萬曆年間任移建
新城纂修邑志其他如均廠役省浮費皆政之
要者祀名宦祠

劉化龍號在田直隸霍山人貢生萬曆年間任精
勤有爲庶事克舉創修預備倉有碑記

楊守信號對川陝西高陵人舉人嘉靖丙寅秋來
尹茲邑下車卽詢民瘼惻然動色曰邑小地瘠
賦繁役重民何以堪於是窮其弊源首以均平
地糧爲急務履地畝辨高下度肥磽上下陂險

丈量均平使兼并影射者無所肆而困輸者得以自立二百年倒懸之害一旦盡除且勸耕助耔招納逃亡瘡痍盡起疲民生色祀名宦祠周漢傑福建餘縣人進士有學能文令行禁止陞太原府同知

蘭 俊開封府人宣德年間以縣丞署令事時風沙害稼徵輸病民公奏免稅糧三分之一民困以蘇祀名宦祠

國朝

繁峙縣志

卷之四

三

崔尙質滿洲人順治四年任慨然有爲會劉遷作亂與民共守賊遣間使與縣役通及至役走堂大譁曰兵至矣兵至矣公登樓望之役張拳內向爲賊先導公連射之賊役益大呼首頂桌避矢引火從樓下焚之公東向再拜曰臣力竭矣遂閣宅焚死賊肆殘掠邑無完壁止遺一老僕攜公幼女逃匿聖水村劉孔壁家中寇平貲送歸里上聞其事甚悼之贈按察司僉事入省忠烈祠並祀邑名宦

張志高遼陽人順治六年任值邑亂初靖城垣頽圮井廬邱墟架木殘廟之中侍從皆露立公設法經營不忍盡民之力三年後堂廡衙舍規模大備敷政臨民有所憑依其功蓋不小云

戴璽字爾玉直隸玉田人戊戌進士順治十七年任簡以臨民征輸有法建儒學明倫堂文教聿興在任十三年陞行人司

郭傑遼東人康熙十一年任毅然有爲百廢具舉事母以孝聞民咸化之纂輯邑乘雖未付梓

繁峙縣志

卷之四

四

其志亦不可沒云

阮垣睢州人舉人康熙三十年任法令嚴明奸宄斂跡會西河運米憂勞成疾卒於官

程起蛟字鱗長獻縣人康熙三十八年任政尙擊斷甫下車有取人草一束者公立召訊以峻法處之民咸股慄失色由是道不拾遺後竟以刑斃越獄二賊犯謫戍去之日民無不泣下者

馬遴汾州府同知康熙三十九年十一月來署庶事精勤敢於有爲見邑積弊多端奮然曰吾

豈以五日京兆塞責不言乎乃力請上憲永爲
禁革勒石示後

雒 倫字彝菴武陟人辛未進士康熙四十年任
性耿介一錢不受靡麗紛華皆非所好布衣蔬
食淡如也後竟以不合上意挂冠而去士民惜
之

嚴元疇字玉笥浙江歸安人庚辰進士康熙四十
三年任工詩歌古文生童以文章來謁親自披
閱剴切指示性寬厚不事敲扑蒲鞭示辱而已

書齋內懸一聯云訟庭草滿山當榻琴閣春深
雪映墀蒞任二載拂衣而歸瀕行惟圖書數篋
而已

師正楷臨潼人舉人雍正二年由和順縣調任爲
政清勤後因吏議被黜未幾病卒貧不能具棺
民爲之痛

楊元玠字冠六四川南充人以教諭陞邑令雍正
九年任自奉儉約實心課士法一本先正擇諸
生能文者十人隨地遠近分任課事以生童十

人屬之朔望爲文呈公披閱於祠事尤虔修葺文昌閣置備祭器甫二載以年老告歸

楊燭字玉齋直隸固安人進士雍正十一年任才具明敏民訟令兩造自來案無留牘三月訟庭肅然有殺販花商而劫其貨者公陽謂醉傷令瘞埋陰使役密訪其人意事平賣花僻村獲之又甲出外乙往投之月餘乙歸甲周以路費且托寄銀三兩於家乙竟匿其事甲歸告公乙黠巧辨言曾以銀資甲而後歸公曰爾誠好人民以爲快

今再以三兩銀資其家乙頓慙沮退如數與之田成玉河南濬縣人進士乾隆三年任治吏最嚴建二坊於永豐街東曰騰蛟西曰起鳳

孫略字圯授號峻山安徽全椒人以翰林庶吉士改授乾隆六年任性仁慈以寬治民每笞杖垂目不忍視稅法銀分錢十抵之公以時值減其二邑舊多流亡丁徭爲累併丁徭入田賦代人置縣產者梗之公力爭不能得也嘗判案吏

稟請決杖公批云某前已杖幾今止應杖幾如法字畫端楷其寬仁敬慎如此後使事臺山勞瘁卒於官士民哭奠三日

周銘諱字有容號慕劬江西鄱陽人進士乾隆十一年任公爲治精勤課士月一召之庭面試之手自評閱每講藝吏旁立無敢白事修理文廟慎用民力癸酉五月雨雹滹沱以南稼無寸苗公欲發倉廩貸民種吏恐不能償難焉公竟發之秋乃大登有他縣民謀於此開礦走書四集

繁峙縣志

卷之四

七

且納工本公力請於上永禁閉民以不病在治十年調長治令送之者至百里外

伍佛寶滿洲鑲白旗人乾隆三十四年任簡樸有風骨不輕聽斷民訟以和上官過絕不擾民供給惟斗酒隻鷄斤肉升米而已

李鳳集字會文德慶州人優貢乾隆二十二年任改置節孝祠創建北靈書院亦有功名教者後調太原令

虔禮寶字席珍號律齋滿洲正紅旗人舉人乾隆

三十一年署任邑舊有吏受賂爲士民脫漏賦役者訟久不決公上車坐經承吏賠輸獎爲之絕

夏樹敏康熙年間任縣典史時有邑民謀財殺妻弟於路旁者縣委公默察公疑某更易新服知舊衣有異因廉得其實抵之法獄以無擾

沈道遠山陰人雍正十五年任典史遇早步禱青龍池卽日大雨治下茹越河渠民爲之勒石

周祚遠臨汾人舉人順治年間任教諭劉遷之亂

邑侯崔公焚死賊授公僞職不屈死之

郭連城洪洞人舉人順治十一年任教諭課士殷勤無曠厥職戊戌登進士

吳國儒平陽府人舉人順治十六年任教諭修葺文廟不辭勞瘁戟門廊廡煥然一新

申伯潞城人拔貢康熙四十三年任恂恂雅飭模範多士

侯繼周字繩武介休人拔貢教習乾隆十六年任教諭風期超邁樂於課士嘗欲立經舍自五經

以及十三經皆令居之後以年滿歸

康基田字仲耕興縣人癸酉舉人乾隆二十一年

任教諭浚泮池雙泉湧出丁丑登進士

梁樞字文斗靈石人廩貢乾隆三十七年任教

諭禮器未備者備之擇謹飭士俾司筦鑰仍勒

諸石

選舉志

科目

國家設科取士卽古人選舉之遺意繁峙科目自金以來文教漸興代有作者我

朝稽古右文培養深厚人文之盛遠軼前朝多士濟濟果能去浮鶩敦實學家絃戶誦日涵濡於詩書禮樂之化其發越尙未有艾也志科目

甲科

金

繁峙縣志

卷之四

十

胥持國

正大中進士官尙書右丞謚通敏

胥

鼎

特國子大定二十八年進士歷官戶部尙書叅知政事授樞密副使封英國公金史

有傳

元

孟時中

泰定年進士

韓仲彬

至元中進士任金城縣知縣歷官代州知州有傳

明

糜有象

萬厯甲辰科進士官通政司左叅議

國朝

張春慶

康熙壬辰科進士官內閣中書舍人

官伯元

雍正丁未科進士任河南光山知縣改授平陸教諭

李子都

乾隆丁丑科進士任寧武府教授

乙科

明

梁志學

洪武庚午科任開平衛同知贈按察使

王哲

洪武癸酉科任浙江道御史

高舉

永樂戊子科任光祿寺署丞

郭宗海

永樂甲午科任山東卽墨縣知縣

繁峙縣志

卷之四

十一

張浩

同甲午科任陝西朝邑縣教諭

張嘉

永樂丁酉科任朝邑縣知縣

韓仕琦

永樂庚子科任刑部主事歷官郎中陝西按察司副使

王霖

同庚子科任兵馬司副指揮

李俊華

同庚子科

糜子實

永樂癸卯科任陝西伏羌縣教諭

韓儒

景泰丙子科任河南懷遠府知府

李寶

同丙子科任山東館陶縣知縣

張政

成化乙酉科任懷遠縣知縣

韓 夙 成化甲午科任河內縣知縣

王 展 成化癸卯科

王 經 宏治戊午科任原武縣知縣

王 藩 宏治辛酉科任南皮縣知縣

韓 年 宏治甲子科任知府

張應聘 嘉靖壬午科任戶部司務歷本部廣西司員外郎中

高文卿 嘉靖丁酉科任東明縣知縣

馬錫珍 萬曆壬午科任新鄭縣知縣

魏 芳 同壬子科

繁峙縣志

卷之四

十三

糜有象 萬曆庚子科爲武姓贅壻榜名武于光

國朝

張春慶 康熙辛卯科

范魁淹 康熙丁酉科

宮伯元 雍正丙午科

宮如緒 乾隆戊午科

韓應選 乾隆辛酉科

宮 全 乾隆甲子科任松溪縣知縣改陽城縣教諭

韓道成 乾隆壬申 恩科任太原縣訓導

李子郁 乾隆丙子科

張振雅 同丙子科

張粹中 乾隆庚寅 恩科 歷任南宮東安大興知縣

李體陽 乾隆己亥 恩科 任長治縣教諭

官數仞 同己亥科

張步高 乾隆乙卯科 任寧津知縣 陞宛平知縣 又陞黃村同知

王心傳 乾隆戊午科 恩賜乙未國子監學政

李師白 嘉慶辛酉科

張濬智 嘉慶甲子 恩賜

繁峙縣志

卷之四

糜天爵 道光辛卯科

武進士

明

樊一誠 萬曆乙未科 任利民叅將

國朝

張淑心 順治辛丑科

張鵬翼 康熙庚戌科 任貴州畢節衛廣東神電衛守備 陞山東濟寧都司

楊映河 道光乙未科

武舉

明

張三戒 萬曆戊子科

劉斐 萬曆癸卯科

國朝

范王賓 康熙丙午科任金山衛守備

張龍祥 同丙午科任南昌千總

張景韓 康熙壬子科任澤東塢嶺把總

張昱瑞 康熙庚午科任山東浮山衛千總

張晉善 乾隆丙辰科任裕州千總

繁峙縣志

卷之四

十四

韓存仁 乾隆戊午科任固關千總

楊世泰 乾隆己卯科任威遠千總

柴萬年 乾隆丙午科署茹越把總

梁崙 乾隆甲寅科任五臺縣把總 誥授武信騎尉
嘉慶初從征漢中有軍功卒加贈恤賞

徐鐸 乾隆乙卯科任唐家會把總

宮雲錦 嘉慶戊午科

徐鏡 同戊午科任絳州千總陞浙江嚴州府都

徐效友 嘉慶庚申 恩科

高如阜 嘉慶癸酉科任瓦窰口千總陞福建福州府守備

鐵現龍 同癸酉科

高如崗 嘉慶己卯科任金剛庫千總

徐 鎰 同己卯科

楊映河 道光甲午科

左鳳舞 同甲午科

高萬邦 道光乙未科

任 鐸 同乙未科

恩貢

國朝

繁峙縣志 卷之四

五

孫 式 康熙年間

韓又愈 康熙年間

梁廷瑞 雍正年

韓大佐 雍正年

梁鳳翀 雍正年

劉青藜 乾隆壬午年

郭佑齡 乾隆壬辰年

張潛修 乾隆庚子年

魏 雙 乾隆丙午科

韓敏政 乾隆四十四年

郭聖藝 乾隆庚戌年任榮河教諭

劉汝聽 嘉慶元年

宮瑞 嘉慶五年

張序 嘉慶十五年

張亮工 嘉慶二十五年

韓清翼 道光元年

侯充義 道光四年

王逢年 道光十六年

繁峙縣志

卷之四

六

拔貢

明

韓溥 綏德州判

高崇 陝西三源縣丞

韓鑽 鳳陽知縣

樊陽春 撫寧主簿

楊大成

宮應禎 山東卽墨知縣

樊瑾 曲陽縣教諭

高時

任中麟 伊陽主簿

王紹湯 應州學正

郭崑 扶風主簿

孟經 獲鹿知縣

高先桂 陝西西安府知事

梁棟 安定知縣

高斗垣 崇信縣知縣
遭亂守城死

國朝

繁峙縣志

卷之四

七

張懷璧 順治五年任太康知縣

張懷瑁 順治年任密雲知縣

郭登秀 順治年任河南按察司知事

劉應祚 順治乙酉科

師文林 康熙十一年

范琮 康熙二十四年

劉溫 康熙三十六年

張春生 康熙乙卯年

宮伯元 雍正癸卯科

李永泰

雍正巳酉年由華陰桐鄉縣丞陞江津知縣

韓應選

乾隆辛酉科

張琳

乾隆乙酉科河津教諭

唐侯

乾隆巳酉科

李師白

嘉慶辛酉科

張儒林

嘉慶癸酉科

宮步霄

道光乙酉科

郭大生

道光丁酉科

副貢

繁峙縣志

卷之四

六

明

宮永端

萬曆戊午天啟庚申

馬錫祚

威縣知縣

樊鼎

兩中副榜

梁梅

國朝

韓煥

康熙乙酉科平遙訓導

張春慶

康熙戊子科

李宗白

乾隆巳亥科任稷山教諭

范煜 嘉慶戊午科 欽賜

張濬智 嘉慶庚申科 欽賜

宮三錫 嘉慶戊寅 恩科旗官學教習

歲貢

明

王佐 沂縣知縣

張志 虞衡清吏司主事

吳翊 安岳縣教諭

羅綺 武邑縣典史

繁峙縣志 卷之四

充

武良 浙江布政司理問

崔崑 水塘知縣

謝懋 玉田縣知縣

韓子雅 四川行都司斷事

謝志堅 河津縣知縣

吳養心 南孟縣知縣

鄭重 狄道縣知縣

宋賓 保安縣知縣

張翼 鞏昌府通判

程文 昌平知縣

高邁 平山主簿

范伯濬 麟遊知縣

李俊傑 孟縣知縣陞太僕寺寺丞

張從文 棗強主簿

張雋 西安府知事

趙邦信 南宮訓導

黃汝器 臨洮府檢校

劉武 內邱縣丞

繁峙縣志 卷之四

三

任魯 冠縣主簿

王槐 廣原知縣

李儀 錦衣衛經歷

賈文衡 冠縣知縣

賈茂 陳留知縣

張澤 博野主簿

馬訓 大石縣丞

郭表 韓城主簿

趙珣 清苑主簿

張英

樊相

陳忠
遼東中屯衛知事

魏衡

高廷璣
武功知縣

薛璟
河南王府舍人

郝安

聶禮

張輝
無錫縣丞

繁峙縣志

卷之四

三

姚琮
固原吏目

王佐
河間府知事

殷輅
蠡縣主簿

糜奎
神木知縣

田賦
徐州吏目

張舉
高邑縣丞

趙進
費縣縣丞

張宗德
宿松縣丞

任紳
湖廣布政司理問

孫良 陝西檢校

王騫 扶風縣丞

張璉 延安府訓導

魏祿

張錦

糜大經 沂水知縣

劉昱 泰安知縣

郝俊 彭縣知縣

曹儒 慶陽府通判

繁峙縣志 卷之四

侯爵

張驥

趙冕 王府典儀

趙景茂 南城主簿

高文原 安定縣丞

張節 會寧教諭

畢舉 渭源知縣

王道

張廷益 太僕寺主簿

劉繪

馬文泰 平涼教諭

張文德 曲陽知縣

張希文 泗水主簿

楊遇春 直隸撫寧縣知縣

糜大鳴 扶風主簿

范錦 恩縣主簿

高文秀 彰德府通判

高傑 舞陽訓導

繁峙縣志

卷之四

三

高佑 孝義訓導

黃金 宛平教諭

陳汝政

范宗儒

馬漢儒 臨潼縣丞

宮絨 商州訓導

韓世簡 扶風訓導

韓世俊

樊鳳揚

糜憲 鎮江府經歷

高文才 欒城訓導

任宏 廣平府照磨

張攀龍

馬思明 隆慶州訓導

柴密 邢臺訓導

畢來輔

韓世浮 冠縣訓導

謝珩 禹城訓導

繁峙縣志

卷之四

十四

張九德 朝城訓導

王嘉謨

馬思溫 林縣訓導

何梁 文安訓導

張文奇 襄陵教諭

高彥臣 馬邑訓導

高文芳 平定州訓導

糜實穎

魏金 澄城訓導

劉伸 廣昌教諭

魏慎 靈邱訓導

畢竟榮 武鄉教諭

王好禮 渾源州學正

畢應元 臨汾訓導

張三光 寧武府教諭

鄭民化 商州學正

張三友 武治縣丞

康強吉 開州州同

繁峙縣志

卷之四

五

靳元捷

畢竟禮

王義

魏承芳 蔚州訓導

孟嘉賓 孝義縣訓導

樊珣

樊珮 沂水縣丞

王浮 蔚州學正

高晉魁 蒲州學正

郭英 朔州學正

姚魚

趙維忠 遼州訓導

畢正芳 房山知縣

張維寰 隴州同知

高冲樞 霍州訓導

樊璧 翼城教諭

魏恪 平陽教諭

魏登榜

繁峙縣志

卷之四

三

畢大中 三原知縣

樊正奇

姚光晉

楊大召

國朝

魏鏡 順治曲沃訓導

王甲根 順治大寧教諭

任光先 順治聞喜訓導

邢可望 順治年

王俊士

順治滎河訓導

李天潤

順治元城縣丞

李澤民

順治廣寧訓導

魏步南

順治巴州知州

張懷珍

順治河津訓導

張士慶

順治年

宮永耀

順治年

張令聞

順治馬邑訓導

陳舜典

順治臨縣訓導

繁峙縣志

卷之四

三

畢大亨

順治年

畢大統

順治汜水知縣 自此停貢

魏步京

康熙八年初開貢

邢洪基

康熙十年武鄉訓導

宮衡斗

康熙十二年山陰訓導

劉鳳岐

康熙十四年

樊而茂

康熙十六年靈石訓導

樊而蕙

康熙十八年寧鄉訓導

韓奇秀

康熙二十年

韓拔選

康熙二十二年永和訓導

王家祥

康熙二十四年

梁宗

康熙二十六年

范含章

康熙二十八年

孫奎光

康熙三十年

楊先培

康熙三十二年

顏鵬起

康熙三十四年

王宗雅

康熙三十六年

韓育德

康熙三十八年

繁峙縣志

卷之四

天

畢祚禕

康熙四十年

劉國梁

康熙四十二年

韓受卿

康熙四十四年

劉國佐

康熙年

劉山

康熙年

劉新明

康熙年

劉新淑

康熙年

劉永祥

康熙年

韓魏卿

康熙年

范繼淹 康熙年

楊連虹 康熙年

王位育 康熙年

張春先 康熙岳陽訓導

劉新璧 雍正年

劉淑思 雍正五年

張雲瑞 雍正年

康大成 雍正洪洞訓導

宮遇世 雍正運司訓導

繁峙縣志

卷之四

三

王問思 雍正垣曲訓導

郭鄰芳 雍正年

侯臨民 乾隆元年

劉文彬 岳陽訓導

張春登 乾隆年

高超品 乾隆年

劉文明 乾隆年

張礪 乾隆年

宮匡世 乾隆十四年

侯長民 乾隆十六年

宮又世 乾隆十八年

郭玕 乾隆二十年

侯化南 乾隆二十三年

宮宗緒 乾隆二十七年

梁正 乾隆二十九年

劉緒 乾隆年

郭繼聘 乾隆三十四年

宮若潭 乾隆三十六年

繁峙縣志

卷之四

畢世奇 乾隆三十八年

侯天佑 乾隆四十年

韓懷瑾 乾隆四十二年

韓覲王 乾隆四十六年

劉淑 乾隆五十年

張績 乾隆五十二年

王克俊 乾隆五十三年

劉汝翼 乾隆五十五年

王宋義 乾隆五十七年

師玉椿 乾隆五十九年

韓存智 嘉慶元年

侯曰蔚 嘉慶三年

石 璞 嘉慶五年

張士芳 嘉慶六年

馬 趙 嘉慶八年

糜際昌 嘉慶十年任平陽府洪洞縣訓導

宮玉鏡 嘉慶十三年平陸訓導

崔登鰲 嘉慶十五年

繁峙縣志

卷之四

三

張映辰 嘉慶十七年

馬 永 嘉慶十九年

張建忠 嘉慶二十一年

何肇修 嘉慶二十三年

孟元文 嘉慶二十五年

孟元長 道光元年

劉鵬化 道光四年

李步白 道光五年

何肇敏 道光七年

張心浩 道光十年

高觀 道光十二年

張心裕 道光十三年

張通淵 道光十五年

例貢

明

張珉 紹興府照磨

王京 醴泉縣丞

沈文輔

繁峙縣志 卷之四

三

高經 城固主簿

韓天爵 婺源縣丞

潘濤

王言 山海衛經歷

楊欽 韓城縣丞

楊鸞 紹興府檢校

孫文傑 西安府檢校

王紹 吉安府照磨

韓重新 城固主簿

劉珩 洛陽主簿

高忻 定遠主簿

張純古 景州吏目

張博古 肥鄉主簿

張琴 紫陽知縣

高文學 昌黎知縣

韓中

韓京

張昂

繁峙縣志

卷之四

三

張紹古

郭應文

韓章

韓卓

高嵐 武定吏目

張天賦 文澄縣丞

韓重華 河間府檢校

張應時 邢台縣丞

高文光 封邱主簿

張酌古 徽州府知事

張綽古

張珩

高遷 寧國府知事

韓世瞻 任訓導

郭舉

韓世重 歸州吏目

韓世浮 任冠縣訓導

朱崇仁 廣平府經歷

繁峙縣志 卷之四

三

郭譽

朱章

鄭文卿 元城縣丞

魏鉞 溧陽縣丞

韓重芳 臨潼主簿

郭俊

郭一桂

朱崇傑

郭歧

張 玟 滋陽縣丞

郭一科 祁州吏目

郭一登 固原吏目

朱 英 高宛主簿

張光華 臨潼主簿

魏 銀 高宛主簿

高 嵩 任驛宰

張士瑛 州判

王廷貴

繁峙縣志 卷之四

三

鄭 璽

魏 錫 濟源縣丞

張 琨 博興主簿

孟加兆

高世熙

張九丘

鄭文燦

魏 玉

高 紀

崔夢鯨

安應乾

韓承嗣

高崱 驛宰

國朝

張廷揚

魏淵初

劉永祀 附

魏澗初 廩

繁峙縣志

卷之四

三

張鵬起 附

張濬 附

韓永盛 附

侯加位

張鵬翔 附縣丞

孟養正 增

韓勃 廩萬泉訓導

張秀 附

梁銍 附

魏六吉 附

張慎修 附

宮适

宮達 附

徐鎮

孟執桓 附

張承烈

魏朝林 縣丞

宮著秀

繁峙縣志 卷之四

三

魏朝模

張承勉

魏侯禮

陳森

郭忠

陳全勝

樊參

高瑩廊 附

任爾達

宮玉笙 附

張紹高 縣丞

范 璞

侯廣義 附

陳師搏 附

鄭德彰 附

趙萬春 附

張維垣 附

郭永瑞 附

繁峙縣志

卷之四

三

官三奇

高慎修 廩任永寧州訓導

魏良成

宮德茂

郭永發 廩署朔平府教授

李光乾 廩署左雲訓導

柴占年 廩訓導

宮又昌 廩

孟邦憲

魏鑑

魏桐

宮三台廩

高國梅附

孟作賓

鄭芹

孟光先

里選

元

繁峙縣志

卷之四

三

王仲祥

以孝行舉歷代澤判官芮城縣尹陞承事郎並管諸軍勸農事

明

韓鎮

由幹濟人才舉歷江西寧都縣丞

高九德

由通經儒術舉任河南宜陽縣丞

聶從古

由賢人君子舉任山東費縣知縣

曹通

由孝廉舉任河南懷慶府知府

楊均讓

由孝廉舉任廣平府知府

侯允

由歲貢人才舉任壽元縣知縣

韓士哲

由稅戶人才舉任寶慶府知府

張平

由人物舉任秦州知州

樊友才

由稅戶人才舉任江都縣知縣

例員

國朝

張生輝

清平典史

張際豐

巡檢

韓翊奇

陽春典史

韓加福

把總

張有基

磁州吏目

繁峙縣志

卷之四

四

梁尙卿

古北口巡檢

王科文

河州茶馬大使

陳璋

澗山巡檢

張振芳

慶元典史

張澤遠

巡檢

張逢堯

貴溪典史

張邁祖

典史

張振遠

巡檢

徐璧光

州判

張根 秀山典史

張鳳鳴 黃州衛千總

魏寧 州同

宮韶鳴 布政使理問

孟兆元 衛千總

張立 布政使經歷

孟邦屏 衛千總

宮德潤 州同

張效高 任南城兵馬司副指揮陞福建福州府通判

繁峙縣志

卷之四

望

徐洲 任殺虎口千總

徐綽 山東濟南府守備

孟執蒲 衛千總

封贈

明

糜穀 以子有象誥封文林郎

董賜 贈鎮國將軍上柱國榮祿大夫

國朝

宮定世 以子伯元誥封徵仕郎

李茂松 以孫子郁馳封文林郎

李君愛 以子子郁誥封文林郎

韓天眷 以子存仁誥封奮力校尉

張寧禧 以子邁祖馳贈修職郎

張寧祐 以孫粹中馳贈文林郎
又馳贈奉直大夫

張肇祖 以子粹中誥贈文林郎又誥贈奉政大夫
以孫馳贈朝議大夫

張粹中 以子步高誥封朝議大夫

徐 鏞 以弟鐸馳封武信騎尉

郭成儒 以子聖藝馳贈修職郎

繁峙縣志 卷之四 里

張步高 以弟效高馳贈奉政大夫

張允中 以姪效高馳封儒林郎
又馳贈奉直大夫

梁清和 以子崙誥封武信騎尉

徐有光 以子鐸誥封武信騎尉

徐觀光 以姪鏡馳封武信騎尉

高士泰 以子如阜誥封武畧騎尉

高如山 以弟如阜馳封武畧騎尉

徐有鵬 以子洲誥封武畧騎尉

徐 瀛 以弟洲馳封武畧騎尉

高瑩廊 以子慎修馳贈修職佐郎

補遺

高斗南 明歲貢

張文治 縣丞


郭世魁 議敘

繁峙縣志

卷之四

三

繁峙縣志卷之四終



繁峙縣志

人物仙釋

冊五

人物志

鄉賢

維嶽降神生甫及申自古英才挺生莫非山川靈秀之氣所鍾毓而成繁峙北承恆嶽之峻南連五臺之雄得地氣爲最厚以故生其間者不乏瑰瑋特達之才雖崇卑殊致顯晦異途皆可昭簡策垂來茲也後有作者果克自樹立接武前型以爲盛世楨榦余深有厚望焉志鄉賢

後魏

繁峙縣志

卷之五

一

莫 含繁峙人家世貨殖貲累巨萬劉琨居并州辟爲從事穆帝愛其才器後爲代王置官屬求含於琨乃入代甚爲穆帝所重常叅軍國大謀爲左將軍封關中侯其故宅在桑乾川南世稱

莫含璧今訛爲莫回城云祀鄉賢

子顯昭成時左常侍

莫 題莫顯子含之孫也有謀略太祖嘗使與將軍王建等討慕容寶廣甯太守劉亢泥斬之徙其部落於平城時寶上谷太守麟捐郡逃走太祖追之題爲大將別出東道以功賜爵東安侯

祀鄉賢

草 雲題之弟好學善射嘗典選曹轉給事中以功賜爵安德侯遷執金吾嘗參軍國謀議世祖克赫連昌詔雲與常山王素留鎮統萬進爵安定公加平西將軍時初并河西人心未一雲於新舊撫之皆宜卒謚敬公祀鄉賢

金

胥持國字秉鈞正大中進士官尚書右丞

胥 鼎字和之尚書右丞持國之子也大定二十

繁峙縣志

卷之五

二

八年擢進士第入官以能稱累遷大理丞承安

二年持國卒去官四年尚書省起復爲著作郎

上曰鼎故家子其才何如宰臣奏曰爲人甚幹

濟上曰著作職閑緣今無他缺姑授之未幾遷

右司郎中轉工部侍郎泰和六年鼎言急遞鋪

轉送文檄之制上從之時以爲便至寧初中都

受兵由戶部尚書拜叅知政事貞祐元年十一

月出爲泰定軍節度使兼兗州管內觀察使未

赴改知大興府事兼中都路兵馬都總管二年

正月鼎以在京貧民鬪食者衆宜立法賑救乃奏曰京師官民有能贍給貧人者宜計所贍遷官升職以勸獎之遂定權宜鬻恩例格如進官升職丁憂人許應舉求仕官監戶從良之類入粟草各有數全活甚衆四月拜尙書右丞仍兼知府事五月宣宗將南渡留爲汾陽軍節度使兼汾州管內觀察使十一月改知平陽府事兼河東南路兵馬都總管權宣撫使三年四月建言利害十三事若積軍儲備黃河選官讞獄簡

將練卒鈔法版籍之類上頗採用焉又言平陽歲再被兵人戶散亡樓櫓修繕未完衣甲器械極少庾廩無兩月食夏田已爲兵蹂復不雨秋種未下雖有復業殘民皆老幼莫能耕種豈足徵求比聞北方劉伯林聚兵野狐嶺將深入平陽降解河中遂抵河南戰禦有期儲積未備不速錯置實關杜稷生靈大計乞降空名宣勅一千紫衣師德號度牒三千以補軍儲上曰鼎言是也有司其如數亟給之七月就拜本路宣撫

使兼前職朝廷欲起代州戍兵五千鼎上言嶺外軍已皆南徙代爲邊要正宜益兵保守今更損其力一朝兵至何以待之平陽以代爲藩籬豈可撤去尙書省奏宜如所請詔從之又言近聞朝廷令臣清野切謂臣所部乃河東南路太原則北路也大兵若來必始於北故清野當先北而後南况北路禾稼早熟其野旣清兵無所掠則勢當自止不然南路雖清而穀草委積於北是資兵而召之南也臣已移文北路宣撫司

矣乞更詔諭之旣而大兵果出境賜詔獎諭曰卿以文武之才膺兵民之寄往鎮方面式固邊防坐釋朕憂孰如卿力益懋忠勤之節以收綏靜之功仰副予心嗣有後寵尋以能設方略退兵進官一階十月鼎上言臣所將義軍皆從來背本趨末勇猛克悍盜竊亡命之徒苟無訓練統攝官以制之則朋聚黨植無所不至乞許臣便宜置總領義軍使副及彈壓仍每五千人設訓練一員不惟豫爲防閑使有畏忌且令武藝

精熟人各爲用上從之四年正月大兵掠霍吉
隰三州已而步騎六萬圍平陽急攻者十餘日
鼎遣兵屢卻之且上言臣以便宜立官賞豫張
文榜招還脅從人七千有奇續至者又六千餘
俱令復業竊謂凡被俘未歸者更宜多方招誘
已歸者所居從便優加存恤無致失所制可二
月拜樞密副使權尙書左丞行省於平陽時鼎
方抗表求退上不許因進拜焉且遣近侍諭曰
卿父子皆朕所知向卿執政時因有人言遂以

河東事相委果能勉力以保無虞方國家多難
非卿孰可倚者卿退易耳能勿慮社稷之計乎
今特授卿是任咫尺防秋更宜悉意時河南粟
麥不令興販渡河鼎上言曰河東多山險平時
地利不遺夏秋薦熟猶常藉陝西河南通販物
料况今累值兵戎農民寢少且無雨雪闕食爲
甚又解州屯兵數多糧儲僅及一月伏見陝州
大陽渡河中大慶渡皆邀阻粟麥不令過河臣
恐軍民不安或生內患伏望朝廷聽其輸販以

紓解州之急從之又言河東兵革之餘疲民稍復然丁牛旣少莫能耕稼重以亢旱蝗螟而餽餉所須徵科頗急貧無依者俱已乏食富戶宿藏亦爲盜發蓋絕無而僅有焉其憔悴亦已甚矣有司宜奉朝廷德意以謀安集而潞州帥府遣官於遼沁諸郡搜括餘粟懸重賞誘人告許州縣憚帥府鞭箠械繫所在騷然甚可憐憫今大兵旣去惟宜汰冗兵省浮費招集流亡勸督農事彼不是務而使瘡痍之民重罹茲苦是兵

未來而先自敝也願朝廷急止之如經費果闕以恩例勸民入粟不猶愈於強括乎又言霍州回牛鳳棲嶺諸阨戍卒幾四千今兵旣去而農事方興臣乞量留偵候餘悉遣歸有警復徵旣休民力且省縣官萬一兵來亦足禦邊舉一事而獲二利臣敢以爲請詔趨行之又言河東兩路農民寢少而兵戍益多是以每歲糧儲常苦不繼臣切見潞州元帥府雖設警衛恩例然條目至少未盡勸誘之術故進獻者無幾宜增益

其條如中都時仍許各路宣撫司俱得發賣庶幾多獲貯儲以濟不給於是尙書省更定制奏行馬又言交鈔貴於通流今諸路所造不敷所出苟不以術收之不無闕誤宜從行省行部量民力徵歛以裨軍用河中宣撫司亦以寶券所支已多民不貴乞驗民貧富徵之雖然陝西若一體徵收則彼中所有日湊於河東其與不歛何異又河北寶券以不許行於河南由是愈滯將誤軍儲而啟釁端時以河北寶券商旅齎販

南渡致物價翔貴權限路分行用因鼎有言罷之又言比者朝廷命擇義軍爲三等臣卽檄所司而潞帥必蘭阿魯帶言自去歲初置帥府時已按本軍去其冗者部分既定上下旣親故能所向成功此皆血戰之餘屢試可者且又父子兄弟自相赴援各顧其家心一而力齊勢不可離今必析之將互易而不相諳矣國家糧儲常恐不繼豈容僥冒但本府兵不至是耳况潞州北卽爲異境日常備戰事務方殷而分別如

此彼居中下者皆將氣挫心懈而不可用慮恐
因得察吾虛實且義軍率皆農民已各散歸田
畝趨時力作若徵集之動經旬日農事廢而歲
計失矣乞從本府所定無輕變易臣切是其言
時阿魯帶奏亦至詔遂許之又言近偵知北兵
駐同耀竊慮梗吾東西往來之路遂委河中經
略使陀滿胡土門領軍赴援今兵勢將叩關矣
前此臣嘗奏聞北兵非止欲攻河東陝西必將
進取河南雖已移文陝州行院及陝西鄰境俱

令設備恐未卽遵行乞詔河南行院統軍司議
所以禦備之策上以示尙書省宰臣奏兵已踰
關惟宜嚴責所遣帥臣趨迎擊之及命鼎益兵
渡河以掣其肘制可旣而鼎聞大兵已越關乃
急上章曰臣叨蒙國恩擢列樞府凡有戎事皆
當任之今入河南將及畿甸豈可安據一方坐
視朝廷之急而不思自奮以少寬陛下之憂乎
去歲頒降聖訓以向者都城被圍四方無援爲
恨明勅將帥若京師有警卽各提兵奔赴其或

不至自有常刑臣已先遣潞州元帥左監軍必
蘭阿魯帶領軍一萬孟州經略使徒單百家領
兵五千由便道濟河以趨關陝臣將親率平陽
精兵直抵京師與王師相合又奏曰京師去平
陽千五百餘里儻俟朝廷之命方圖入援須三
旬而後能至得無失其機耶臣以身先士卒倍
道兼行矣上嘉其意詔樞府督軍應之初鼎以
將率兵赴援京師奏乞委知平陽府事王質權
元帥左監軍同知府事完顏僧家奴權右監軍

以鎮守河東從之至是鼎拜尙書左丞兼樞密
副使是時大兵已過陝州自關以西皆列營柵
連亙數十里鼎慮近薄京畿遂以河東南路懷
孟諸兵合萬五千由河中入援又遣遙授河中
府判官僕散掃吾出領軍趨陝西併力禦之且
慮北兵扼河移檄絳解吉隰孟州經略司相與
會兵以爲夾攻之勢已而北兵果由三門集津
北渡而去鼎復上言自兵興以來河北潰散軍
兵流亡八戶及山西河東老幼俱徙河南在處

僑居各無本業易至動搖竊慮有司妄分彼此
或加迫遣以致不安今兵日益盛將及畿甸儻
復誘此失職之衆使爲鄉導或驅之功成豈不
益資其力乞朝廷遣官撫慰及令所司嚴爲防
閑庶幾不至生釁上從其計遣監察御史陳規
等充安撫捕盜官巡行郡邑大兵還至平陽鼎
遣兵拒戰不利乃興定元年正月上命鼎選兵
三萬五千付陀滿胡土門統之西征至是鼎馳
奏以爲非便略曰自北兵經過之後民食不給

兵力未完若又出師非獨饋運爲勞而民將流
亡愈至失所或宋人乘隙而動復何以制之此
繫國家社稷大計方今事勢止當禦備南邊西
征未可議也遂止是月進拜平章政事封莘國
公又上奏曰臣近遣太原汾嵐官軍以備西征
而太原路元帥左監軍烏古論德升以狀白臣
甚言其失計臣愚以爲德升所言可取敢具以
聞詔付尙書省議之語在德升傳三月鼎以祖
父名章乞避職詔不從朝廷詔鼎舉兵伐宋且

令勿復有言以沮成算鼎已分兵由秦鞏鳳翔三路並進乃上書曰竊懷愚懇不敢自默謹條利害以聞昔泰和間蓋嘗南伐時太平日久百姓富庶馬蕃軍銳所謂萬全之舉也然猶亟和以偃兵爲務才安之後北兵大舉天下騷然者累年然軍馬氣勢視舊纔十一耳至於器械之屬亦多損弊民間差役重繁寢以疲乏而日勤師旅遠近動搖是未獲一敵而自害者衆其不可一也今歲西北二兵無入境之報此非有所

憚而不敢也意者以去年北還姑自息養不然則別部相攻未暇及我如聞王師南征乘隙併至雖有潼關大河之險殆不足恃則三面受敵者首尾莫救得無貽後悔乎其不可二也凡兵雄於天下者必其士馬精強器械犀利且出其不備而後能取勝也宋自泰和再修舊好練兵時糧繕修營壘十年於茲矣又車駕至汴益近宋境彼必朝夕憂懼委曲爲防况聞王師已出唐鄆必徙民渡江所在清野止留空城使我軍

無所得徒自勞費果何益哉其不可三也宋我世讐比年非無恢復舊疆洗雪前恥之志特畏吾威力不能窺其虛實故未敢輕舉今我軍皆山西河北無依之人或招還逃軍脅從歸國大抵烏合之衆素非練習而遽使從我豈能保其決勝哉雖得其城內無儲蓄亦何以守以不練烏合之軍深入敵境進不得食退無所掠將復遁逃嘯聚爲腹心患其不可四也發兵進討欲因敵糧此事不可必者隨軍轉輸則又非民力

所及沿邊人戶雖有恆產而賦役繁重不勝困憊又凡失業寓河南者類皆衣食不給貧窮之迫盜所由生如宋人陰爲招募誘以厚利使爲鄉導伺我不虞突而入寇則內有叛民外有勍敵未易圖之其不可五也今春事將興若進兵不還必違農時以誤防秋之用此社稷大計豈特疆場利害而已哉其不可六也臣愚以爲止當遴選武材將士分布近邊州郡敵至則追擊去則力田以廣儲蓄至於士氣益強民心益固

國運豐饒自可恢廓先業成中興之功一區區之宋何足平乎詔付尙書省宰臣以爲諸軍旣進無復可議遂寢旣而元帥承裔等取宋大散關上諭鼎曰所得大散關可保則保不可則焚毀而還於是鼎奏臣近遣官問諸帥臣皆曰散關至驀關諸隘其地遠甚中間堡壘相望如欲分屯非萬人不可而又有恆州虢縣所置數關宋兵皆固守如舊緩急有事當復分散關之兵餘衆數少必不能支而鳳翔恆隴亦無應援恐

兩失之且比年以來民力困於調度今方春農事已急恐妨耕墾不若焚毀此關但屯邊隘以張其勢彼或來侵互相應援易爲力也制可二年四月鼎乞致仕上遣近侍諭曰卿年旣耄朕非不知然天下事方有次第卿舊人也姑宜勉力以終之鼎以宣宗多親細務非帝王體乃上奏曰天下之大萬幾之衆錢穀之冗非九重所能兼則必付之有司天子操大綱責成功而已况今多故豈可躬親細務哉惟陛下委任大臣

坐收成算則恢復之期不遠矣上覽其奏不悅
謂宰臣曰朕惟恐有怠而鼎言如此何耶高琪
奏曰聖主以宗廟社稷爲心法上天行健之義
憂勤庶政夙夜不遑乃太平之階也鼎言非是
上喜之三年正月上言沿邊州府官既有減定
資歷月日之格至於掌兵及守禦邊隘者征行
暴露備歷艱險宜一體減免以示激勸從之二
月上言近制軍前立功犯罪之人行省行院帥
府不得輒行誅賞夫賞由中出則恩有所歸茲

固至當至於部分犯罪主將不得施行則下無
所畏而令莫得行矣宰臣難之上以問樞密院
官對如鼎言乃下詔自今四品以下皆得裁決
時元帥內族承裔移刺蒲阿伐宋所下城邑多
所焚掠於是鼎上言承裔等奉詔宣揚國威所
謂弔民伐罪者也今大軍已克武林將至興元
興元乃漢中西蜀喉襟之地乞諭帥臣所得城
邑姑無焚掠務慰撫之誠使一軍帖然秋毫不
犯則其餘三十軍將不攻自下矣若拒王師乃

宜有戮上甚是其言遂詔諭之胥鼎以年老屢上表求致仕上謂宰臣曰胥鼎以老求退朕觀其精力未衰已遣人往慰諭之鼎嘗薦把胡魯以爲過已遠甚欲以自代胡魯固住至於駕馭人材處決幾務不及鼎多矣俄以伐宋有功遷官一階八月上言臣奉詔兼節制河東近晉安帥府令百里之內止留桑棗菓木餘皆伐之方今秋收乃爲此舉以奪其事旣不能禦敵而又害民非計也且一朝警急其所伐木豈能盡去

使不資敵乎他木雖伐桑棗舍屋獨非木乎此殆徒勞臣已下帥府止之而左都監完顏閻山乃言嘗奉旨清野臣愚不知其可詔從鼎便宜規畫是時大元兵大舉入陝西鼎多料敵之策朝臣或中沮之上諭樞密院官曰胥鼎規畫必無謬誤自今卿等不須指授也尋又遣諭曰卿專制方面凡事得以從宜規畫又何必一一中覈徒爲逗遛也四年進封溫國公致仕詔諭曰卿屢求退朕初不許者俟其安好復爲朕用爾

今從卿請仍可來居京師或有大事得就諮決也五年三月上遣近侍諭鼎及左丞賈益謙曰自去冬至今雨雪殊少民心不安軍用或闕爲害甚重卿等皆名臣故老今當何以處之欲召赴尙書省會議恐與時相不合難於面折故令就第延問其悉意以陳母有所隱元光元年五月上勅宰相曰前平章胥鼎左丞賈益謙工部尙書札里吉翰林學士孛迭皆致政老臣經練國事當邀赴省與議利害仍遣侍官分議四人

者諭意焉六月晉陽公郭文振奏河朔受兵有年矣向皆秋來春去今已盛暑不迴且不嗜戕殺恣民耕稼此殆不可測也樞府每檄臣會合府兵進戰蓋公府雖號分封力實單弱且不相統攝方自保不暇朝廷不卽遣兵爲援臣恐人心以謂舉棄河北甚非計也伏見前平章政事胥鼎才兼將相威望甚隆向行省河東人樂爲用今雖致政精力未衰乞付重兵使總制公府同力戰禦庶幾人皆響應易爲恢復惟陛下圖

之明年宣宗崩哀宗卽位正大二年起復拜平章政事進封英國公行尙書省於衛州鼎以衰病辭上諭曰卿向在河東朝廷倚重今河朔州郡多歸附須卿圖畫卿先朝大臣必濟吾事大河以北卿皆節制鼎乃力疾赴鎮來歸者益衆鼎病不能自持復申前請優詔不許三年復上章請老且舉朝賢練軍政者自代詔答曰卿往在河東殘破孤危殆不易保卿一至而定迄卿移鎮敵不復侵何乃過爲嫌避且君臣均爲一

體朕待下亦豈自殊自外之語殆爲過計况餘人才力孰可副卿者卿年高久勞於外朕豈不知但國家百年積累之基河朔億萬生靈之命卿當勉出壯圖同濟大事鼎奉詔惶懼不敢退是年七月薨鼎通達吏事有度量爲政鎮靜所在無賢不肖皆得其權心南渡以來書生鎮方面者惟鼎一人而已

元

劉 會繁峙人興定間起布衣授堅州判官時當

草創會披荆棘驅虎豹政績著聞累遷驃騎上將軍堅州都元帥兼節度使祀鄉賢

王 兆繁峙人少有雄氣好俠遊排難解紛不畏強禦元兵及縣境金人棄城奔潰城中遺民謀走南山乃率衆詣主帥欵附邑賴以安累遷昭武將軍陞副元帥節遊獵勤政務招集流亡勸課農桑弟斌善騎射兆恃爲爪牙嘗捕金將武仙餘黨於五台中祀鄉賢

韓仲彬繁峙人至元間以明經舉知應州金城縣

繁峙縣志

卷之五

六

事爲政公平持身廉謹後同知堅州服官益虔以績最遷知代州

殷 珍性謹厚救貧如不及而自奉甚約嘗自言曰吾生平好善不倦隨力所至皆無怠心云州縣薦辟辭不就

殷仲温繁峙人父珍有隱德州縣累辟不就仲温廉慎膚敏起家奉宸副使有政績五遷朝列大夫僉中書院事

明

韓仕琦繁峙人永樂庚子舉人歷任陝西分巡關南道天順元年賊首定山等嘯聚據洋固二縣僭立偽號圖攻漢中仕琦募兵礪器潛伏要地故梳洗橋西岸下候半渡縱兵擊之賊大潰生擒定山黨屬五百餘人賊遂平海陞本司副使張琴繁峙人紫陽縣知縣縣初設在半山寂寞之鄉芟夷墾闢爲難琴乃披荆棘冒險阻擇地居民立市招商凡有興作以身先之入金州名宦

董 暘繁峙曲河都伏連坊人祖岩授宣府衛百戶歷傳至瑄仍前衛百戶陣亡弟璋襲職忠勇茂著暘其子也幼膺力過人就武職累戰奮不顧身解太原圍平宣府清風之亂以功陞遊擊將軍嘉靖間敵入馬市口暘血戰死之贈鎮國將軍建褒忠祠命塑像宣府春秋祀之子一奎一元皆貴

董一奎 一元 一奎都督僉事歷鎮山西延綏寧夏三邊以勇敢著 一元勇如兄而智畧過

之嘉靖間以薊鎮遊擊將軍歷官左都督加太子太保蔭本衛指揮使屢奏膚功並推良將其白沙塢墨山之捷尤稱奇偉云詳明史

韓仕哲字景賢性簡重果毅有爲以明經授北城兵馬指揮緝捕勤能地方竊賊匿迹遷衛輝府通判民有盜牛者被獲公解其縛曰爲民父母不能使爾足衣食守禮義以爲盜此蒞民者之過也遂釋之其人懷愧勉爲良民後陞湖廣寶慶府知府益寬其政有循吏風

繁峙縣志

卷之五

二十

國朝

張春慶字耕餘居南關村家世詩書爲諸生邑侯齊重其品延之賓席每歸省或妄請託卒不爲通一語後成進士授中書舍人操守益厲卒於官

李永泰字東來拔貢任華陰縣丞大中丞桂林陳公薦之考曰立心不苟遇事有爲學識亦復優通遷江津令

王甲根小宋峪村人拔貢任大寧教諭清貧自守

人稱古貌古心

孫奎光傳家莊人歲貢古直端方或戲之召飲先
妓以待一見卽大怒去人曰戲也挽留別坐終
席不一言

范魁淹字亞仲舉人素履謹嚴邑令深所敬重有
懷金欲爲請託者走避之謁選都中或勸小就
可早官鄙之不應歸妻子喪亡備嘗艱苦時邑
令李調馬邑延至署欲爲置妾遂辭歸家益貧
門人邀之亦不輕往年八十無疾而終

繁峙縣志

卷之五

三

宮如緒大李牛村人舉人庭訓最嚴方正與范亞
仲相近

張振雅字肄三舉人善承父志事繼母以孝聞課
諸子嚴肅尤公慎強幹學校事多其區畫手不
釋卷七十猶應鄉舉子廷翹亦以庠生舉介賓
篤行

明

韓 遷人品端方足不入城市十餘年延鄉飲不
就

梁天似歲貢耿介自守戶常扃人罕見其面鄰樹
枝落其院送還之其不苟如此

劉 温傳家莊人拔貢謹於自守足跡不履公門
韓魏卿字文侯貢生性恬淡去城里許足不一至
鄉飲舉大賓終非其志曰古禮明讓近乃不免
競也

劉國樑歲貢生樸誠古直不隨時趨人每方爲古
之矜云

劉 淑歲貢生品格超羣舉動不苟人望而畏之
設教聖水頭成就百餘人

劉汝翼歲貢生淑子性孝友規行矩步好學不倦
教誨生徒多所成就鄉人至今思之

郭聖藝字育菴 恩貢生榮河教諭品行端正處
鄉多義舉卒年八十

文人

明

樊 鼎力學不倦居近山每遊覽誦讀之聲隨其
所至達於林麓泉石間人或過之笑而不言連

中副車二次

國朝

宮伯元字次侯雍正丁未進士刻苦好學座右書
二語青雲有路終須到金榜無名定不休爲文
初艱苦及成時渾厚堅樸無懈可擊信爲到家
先任光山縣知縣後改平陸教諭卒於署
張春先字梅英歲貢生岳陽訓導手不釋卷試輒
冠軍書籍經其丹黃者人皆依爲藍本且樂引
後進至老弗倦

繁峙縣志

卷之五

三

劉文彬字六吉歲貢生岳陽訓導幼最穎悟長於
文墨課徒以善誘稱有四書講義藏於家

郭珩歲貢生幼承父訓嚴毅不苟書理文法堪
爲模範遊其門者甚衆 周邑侯獨心許之以
見士無如題其齋

李體陽乾隆己亥領鄉魁長治教諭舉止不苟博
古好學爲文全做大家有擬修邑志草

倫紀

洪範旣錫彝倫攸敘好德之人皇則錫之福我
國家敦崇實行凡有忠孝節義或祀之專祠或旌之
宅里發潛德之幽光俾大節而彌昭誠令典也繁
峙地氣深厚民俗樸淳密邇 京畿被 化尤速
今有敦倫飭紀可以示勸者雖其天性使然而

聖朝斂五福以錫民德深仁厚澤可想見焉志倫紀
忠

明

繁峙縣志 卷之五

五

董 賜嘉靖中爲宣府遊擊將軍俺答犯滴水崖
力戰死之贈官錫蔭建褒忠祠

梁志學任開平衛同知賊作亂城陷公拒敵不勝
登樓焚死贈按察司副使祀忠烈祠

高斗垣崇禎十二年由恩貢授西平知縣爲人鯁
直以清慎得民十五年李自成陷城執之不屈

死

孝

元

王仲賓以孝行聞旌表其門

郭琪以孝授知州贈朝散大夫

明

賈弁孝子失傳

高紀以孝聞親卒廬墓三載

王雯宋峪村人嘉靖間棄妻負父避亂有司上聞舉孝廉旌其門

郭維祥事孀母至孝輕財好施萬厯四十二年巡按李旌之以匾曰孝義流芳

繁峙縣志

卷之五

三

劉寅天啟五年奉上獎勵風化鄉鄰咸舉巡按獎語云爲母病而千里祈禱母病果愈因父疾而斷髮供神父疾亦瘳

國朝

郭嗣元下永興村人家貧二十始就傅讀書晝夜不輟嘗夢母泣夜泣遽歸果如夢舉優行督學劉旌其門曰上庠領袖

梁宗花岩人移居沙河堡貢生父卒搆草舍墓旁獨居三年三十妻亡不再娶自操井日人勸

之曰吾一子履霜衣絮所不忍見也

韓大佐字君舉聖水村人歲貢性孝友父早亡訓幼弟每涕泣而道與門人講遠遊三樂等章卽嗚咽不能成聲

韓景愈父歿廬墓日夜號泣年餘其妻送食至墓側避不見邑侯王公憐其孝給米與布哀居三年人勸之號泣而歸

樊灝小李牛村人庠生親喪三年不飲酒茹葷郭瑄居喪有禮事繼母無間言葬後守墳數月

劉胤祚拔貢選教諭將赴任見母垂淚問曰兒今有官母何以泣母曰吾不忍離汝也祚亦不忍離母遂不仕

梁正歲貢親喪三年哀毀盡禮不飲酒不茹葷郭南齡增生居父喪哀毀幾殆事繼母儀節維謹鄉人至今稱之

康濟民庠生十一歲父歿每課讀畢卽歸視其母食必親奉晚必安眠母故三年獨居母室親自洒掃宛如母在

義

明

韓鐸聖水村人叔父士琦致仕家居歲荒盜起劫之環刃逼其叔父鐸執挺救援盜與之敵捶擊幾斃叔父獲免有司聞於上以義夫旌之周文端公有傳

樊一魁小李牛村人貢士歲荒賑濟輸粟五百石旌其門曰尚義

高智甫爲人輕財樂與洪武年大饑有數盜穴牆而入獲之詢其所以因妻子飢寒所迫遂惻然各予粟一斛飲食遣之去並不問其姓名後子舉孫文卿皆登第人以爲陰騭之報云

韓天敘爲邑巨族豐於財文廟傾圮捐貲修葺巡撫李旌之曰尚義及歿鄉人以祀鄉賢祠

國朝

劉孔璧聖水村人輕財任俠順治五年劉遷作亂城陷邑令崔公閣門焚死其老僕攜一幼女倉皇至璧門告以故曰公死止遺此女老奴不能

攜之遠行聞公好義特來託之孔壁慨然允留
家人有難色孔壁奮曰邑且不保賊來家破無
此女亦破豈得獨生乎竟藏於家事定貲送還
里上官屢旌其義

王護國傅家莊人耕牧爲業有雜戲者夫婦寓其
里積十餘金婦常懷之一日夫外出婦謀午炊
求火於鄰適護國門外有遺棄穢婦俯拾墮銀
不覺也取火竟歸護國過而拾之持以白母母
驚曰此必戲者婦適來取火所遺失其夫悍今

不見銀婦無生理護國亟往婦方呼號欲死里
人環室相勸護國遽以銀置婦前婦視頓喜里
人皆讚嘆夫還同婦至其家欲分少許伸意母
子堅辭不受後護國子孫列青衿者不絕

王嘉友康熙三十九年拾金不昧

柴茂枝性孝友好施與於峩峪建石橋一座後被
水傷壞復率衆創修寺灣盤道一條路遇包袱
一個尋訪數日知爲韓氏所遺送還子孫繁盛
功名綿延人皆謂厚德所貽云

孟邦屏衛千總嘉慶二十年改建節孝祠獨出工
貲二百四十餘金有邑侯張公碑記

賀元勳沙河鎮之平民也性好義王泰榮病重以
幼子少女相托直應不辭撫養成立本鎮人皆
矜式之

節烈

明

侯氏東關糜巖妻年二十一生子麟甫四歲夫病
劇囑曰親老失養不孝滋大願終吾志死亦瞑

繁峙縣志

卷之五

三

目氏泣誓曰有不踐斯言者天必殛守節五十
餘年養姑育幼百折不磨天順間旌表其門

姚氏福連坊李敏妻年十八夫亡遺孕生子撫孤
成立誓不二天旌表其門

李氏陳登與妻無出納妾賈氏夫亡賈方孕李相
與誓守未幾生男兩孀共撫一孤壺守益巖歷
久不變旌表其門

孫氏下茹越侯鳳梧妻年十九夫亡守節撫孤成
立奉旌

鄭氏王傑妻年少而寡艱苦備嘗終身不二撫孤
成名旌表

宋氏舊東關庠生張九成妻年十九夫亡家貧苦
節自守撫孤子肯播成名年七十而卒按院桂
旌之

范氏小李牛村樊元妻年二十夫亡矢志守節孝
養舅姑撫孤子一魁入庠巡按陳旌之

鄭氏舊東關張九職妻年二十一夫亡堅操苦節
撫幼子箠遺腹子秀俱入庠按院桂旌之

張氏城內鄭文魁妻年十九夫死家貧甘心凍餒
蓬頭采薪針澣度日教子成立按院黃以苦節
旌之

吳氏城內張皇師妻年二十四夫亡遺孤方六月
茹荼守節克底有成子爾貞亦以孝聞按院蔡
旌之

侯氏舊東關王曰是妻年二十五夫亡家貧矢志
不二撫孤謝嗣成立按院蔡旌之

陳氏作頭村馬珽妻年二十夫亡子幼矢志守節

孝養其姑克盡婦道

楊氏狼澗村帥祿妻年二十而寡孝事舅姑撫子

衛國成名年七十終

張氏東留屬高山妻年二十夫沒無子父母欲奪

其志氏以死自誓撫侄文彡爲嗣課讀成名

陳氏南關張素明繼妻也夫亡遺前妻子二氏子

二撫育無異天啟七年北虜入寇攻所居堡將

破氏激烈慷慨聚族人謀之曰失堡而生不如

固守而死乃易男子衣冠親冒矢石禦虜退賊

繁峙縣志

卷之五

三

一堡獲全子淑心成武進士

國朝

韓氏何廷悅妻年十七夫亡舅姑以其年少欲令

改適氏孕不從後生男撫育成立至孫肇興入

庠旌表入祠

張氏何惠元妻年二十夫亡子甫七月矢志守節

事舅姑維謹撫子相如入庠旌表入祠

孫氏古家莊陳鳳梧妻矢志守節旌表入祠

殷氏侯宏妻青年守節其子安民卒婦郭氏亦青

年苦守一門雙節旌表入祠

侯氏南關村張春元妻家貧苦節撫孤成名旌表
宋氏李舉子妻夫外傭氏留門待之倦卧有村人
某探知推門入室圖奸氏驚覺喊拒其人奔逸
夫歸哭訴卽自經題奉旌表

郝氏張福永妻年二十而寡守志三載歸寧適母
弟外出家止留幼妹氏如廁有鄰某瞰知闖入
調奸氏喊罵其人逸出午後母弟歸氏以情告
哭不止是夜自經題奉旌表

劉氏趙忠獻妻年二十歲守節家貧自苦孝奉舅
姑生養死葬無遺憾旌表入祠

白氏宋峪監生孟延生側室夫亡矢志堅守孝以
事姑撫子兆儒入國學題奉旌表

郭氏孟兆鳳妻年二十三夫故矢志守節事奉舅
姑曲盡孝道繼胞侄執信爲嗣教養成立身列
膠庠題請旌表

郭氏生員梁清泉妻年二十二夫故甘守清貧奉
養舅姑撫六月遺孤崢教養備至身列成均姪

嶸亦列膠庠題請旌表

任氏張宣妻因人調姦不從以致氏羞忿投井身
死旌表

趙氏高佩妻年二十三守節孝事舅姑持家有法
撫子成立入武學並撫二孫俱中武舉旌表入

祠

劉氏庠生韓舜臣妻年二十五夫亡敬事舅姑撫
子林森入庠邑侯胡給匾旌獎

魏氏劉恕妻年十九夫亡無子家貧勤女紅以孝

繁峙縣志

卷之五

三

養舅姑族人爲之繼嗣節孝終身督學喀旌之

張氏許瑄妻年十七夫死守節撫孤終始不替邑
令孫給匾旌之

張氏福連坊庠生韓士燦妻年二十夫亡無子撫
侄鍾綦爲嗣入庠督學旌其門

張氏大溝村生員韓月明妻夫亡家貧氏藉草而
卧聞舅姑欲奪其志卽自盡邑令李表爲完節

祭其墓

董氏南關村廩生王增善妻年二十三夫亡事舅

姑撫幼子守節終身孝慈兼盡邑侯周旌其門
白氏南關張沛霖妻年二十五夫亡子幼家徒壁
立母家與氏翁議改適氏矢志靡他女紅度日
孝謹事翁鸞簪質衣以資二子課讀長克鐸次
克明並入庠邑侯周旌其門

魏氏庠生楊預瑞妻年二十一夫亡子甫週歲族
人利其財逼之攜子改嫁氏持刀臨夫柩大慟
剪髮剗面力救乃止自是無敢言改適者邑侯
李旌之

李氏楊御國妻年二十三夫亡事孀姑撫孤子始
終不易其操督學吳旌之

郭氏張文玉妻年十八夫亡遺腹生子鞠育成立
垂死曰吾今可以見地下人矣邑令劉旌之

張氏澤萌泉梁士偉妻年十九夫亡孝事舅姑矢
死不二有遺腹每夕焚香祝曰願天賜男以延
夫祀果生子清選撫育成人入庠年八十一而
終督學呂旌其門

劉氏南關張秉全妻青年守節撫孤居四十年而

終督學呂旌其門

李氏福連坊郭堯賓妻年二十守節撫遺腹子繼
昌入庠年三十一而卒又撫孫璽入庠氏年八
十二而卒邑侯麻戴均給匾旌之

韓氏張璿妻年二十夫亡守節撫幼子成名學憲
陳以節孝可風旌之

郎氏張法先妻年二十四夫亡人勸以他適氏矢
志不嫁事翁姑孝敬撫子成立督學周旌之

張氏韓爾霖妻年二十五生子待聘甫六日夫亡

繁峙縣志

卷之五

三

苦志堅守孝養舅姑教子入庠督學賀旌其門

姚氏張世偉妻年二十二守節事翁姑孝撫孤子

陶武成立國學憲給匾旌之

曹氏高允中妻年二十三守節孝事舅姑撫子成
立黃學憲給匾表其門

王氏高尙功妻年二十守節事舅姑至孝撫未歲
子成立入文學後援例入成均黃學憲表其門

糜氏庠生陳士選妻年二十四夫亡孝事孀姑撫
子國弼食廩餼學憲賀給匾旌之

劉氏鄧發妻年二十二守節撫子成立卒年八十
七歲邑侯楊公給匾獎之

武氏孫靖妻年二十二夫亡矢志不嫁時有遺腹
及生爲男名希康氏奉舅姑撫孤子成立入泮
學憲李給匾旌之

張氏杜恒健妻年二十四守節遺一子方三歲氏
立志守節事翁姑克盡孝道教孤子有方督學
汪給匾旌之

黃氏張鎖妻青年守節立志不二督學汪給匾旌
之

繁峙縣志

卷之五

三

姚氏糜琳妻夫故守節舅姑多殘疾朝夕奉養毫
無難色撫三歲子成立督學汪給匾旌之

樊氏賀嗣昌妻暨子達妻王氏俱以守節傳邑侯
孫學師牛均給匾旌之

李氏廩生劉庶之妻暨弟庠生富之妻李氏均青
年守節敬事翁姑矢志不移學師劉以一門雙
節旌之

韓氏劉鳳鳴妻夫亡守節始終不改學憲黃給匾

旌之

韓氏支發偉妻夫故守節子甫二歲事翁姑極孝

撫子成立入泮學師

趙李均給匾旌之

李氏崔涵魁妻夫亡家貧二子俱幼猶子怙恃皆

失氏苦志堅守撫長子挹桂入庠次子與侄亦

皆克承家業學憲國給匾旌之

徐氏王萬壽妻年二十二夫亡誓不再適孝翁姑

撫幼孤學師劉旌表其門

韓氏孫琚璋妻年二十二夫亡家貧苦守誓不改

繁峙縣志

卷之五

三七

節周學憲以芝茂完貞旌之

喬氏康維垣妻年二十五守節七十二歲終督學

黃給匾旌其門

郝氏何令德妻年二十五夫亡事垂暮之親克盡

婦道撫幼弱之孤無忝母儀學憲給匾旌之

高氏霍振業妻年二十二夫亡事翁姑盡禮撫子

成家學師祁給匾旌之

李氏賀承業妻于歸之時無翁姑敬夫如賓夫故

守節好善樂施鄉里敬之學師李給匾旌之

王氏聖水村韓繼盛妻痛夫溺死自經棺側同日
合葬

楊氏下滙村魏澹初妻年十九夫亡子朝棟方二
歲苦節存孤教誨入庠以完節終

梁氏庠生韓嗣鼎妻夫亡無子撫侄大觀如已出
後大觀入庠

李氏南關寄居人妻夫亡貧苦無依年甫二十誓
死靡他針黹度日守節七十而終

張氏大木瓜韓養周妻夫亡家貧二子方乳哺氏

繁峙縣志

卷之五

三

戴笠爲牧手自採薪血痕不斷日拾遺秉滯穗
夜操杵日鄰里聞之有泣下者撫二子皆成立
年七十餘終

韓氏趙天寶妻年二十夫亡家貧無依葬夫事畢
啼泣數日自經死里人皆爲之痛

郎氏韓天成妻早孀茹苦幽貞性成守節四十年
而終

霍氏沙嶺村許明妻年二十夫亡舅姑年邁子方
週歲氏孝養撫育終身不二

張氏侯封宋妻年二十四夫亡守節撫孤子裕德成立入庠裕德死又撫其孫人稱苦節

韓氏侯莊臨妻年二十夫亡矢志從一終身不渝
王氏大木瓜村韓配妻年二十二夫亡事舅姑以孝稱撫孤成立壽九十有三

陳氏歲貢王家祥繼室家祥年六十求賢德有力婦持家政久之無應者時陳氏年十四言於父願嫁之父壯其志從焉氏年二十三家祥死親爲營葬畢蓬首垢面於財物一無所私耗或謂

之氏曰夫老而娶吾欲以家事相托耳若稍失何以見地下矢志終身不變所守

史氏高世輔妻年十八夫亡守節終身撫遺腹子岱成立

韓氏魏德芳妻年二十夫亡仰事俯畜苦節彌貞子亡撫孫守節垂四十六年

左氏吳安妻年十九夫亡遺腹生男撫育成立家貧苦節壽七十五卒

董氏梁臣衛妻年二十三夫亡遺子元正甫四歲

舅姑衰邁奉養維謹教子知稼穡艱難門庭肅然年八十一卒

孟氏楊勃妻年二十夫亡子幼誓死不嫁守節終身

劉氏殷殿颺妻青年矢志撫孤成立

曹氏任貴妻年二十夫亡遺孤早夭苦節四十餘年而終

韓氏趙連科妻年二十二夫亡遺子純儒甫三歲鞠育成立守節逾四十五年

繁峙縣志

卷之五

四

韓氏庠生李翹妻年二十五夫亡撫孤成立苦節自甘

范氏李璐妻年二十二夫故矢志撫孤有成守節垂四十九年

劉氏韓效姬妻年十九夫亡家貧無子翁姑熒獨矢志奉養克盡婦道

劉氏李允中妻年二十四守節事親撫子孝慈兼全

高氏劉公官妻年二十二夫亡艱苦備嘗節操甚

堅

李氏郭泰妻年二十一夫亡撫孤成立守節七十

五卒

王氏何許可妻年二十二夫卒哀毀誓殉未過三

七遂自縊

高氏庠生鄧事宜妻年二十四守節撫子成家

傅氏郭純齡妻年二十五守節矢志最堅七十三

歲卒

郭氏官理元妻年二十一夫亡翁姑在堂子甫週

繁峙縣志

卷之五

聖

歲事親撫子矢死靡他鄉里贈以匾曰志堅金

石

韓氏劉維屏妻年二十二守節家道艱苦事七旬

翁姑撫無日孤幼矢志不二鄉黨賢之

楊氏韓顯順妻年二十五夫亡艱苦自守矢志靡

他善事翁姑撫侄一元爲子已列膠庠年六十

九卒

韓氏侯震妻年二十四守節生子未及週歲貧寒

度日憑針黹以奉祖姑擇良師以課孤子四十

四歲卒

楊氏郭峯妻年二十三守節敬事翁姑撫子成立
王氏孫寬泰妻年二十二守節無子翁姑憐其年
幼勸改嫁氏誓不改節氏之翁行二昆弟三人
公議繼二門寬成子爲氏子氏勸翁姑析已家
產與長三房各一半以敦友于鄉里稱之

孫氏左襄妻年十九守節撫幼子成人

楊氏韓天春妻年二十五守節遺孤早亡撫養幼
孫成人

繁峙縣志

卷之五

聖

高氏鄭綿周妻年十九守節撫子成立

樊氏宮玉鳴妻年二十五守節六十九卒

劉氏鄭邦基妻年十九守節七十二卒

韓氏劉丕基妻年二十一守節矢志堅貞撫子成
立

馬氏張全仁側室夫亡家寒苦守撫子成丁

韓氏唐嗣堯妻年二十一守節子幼家貧誓不改
適翁姑有篤疾二十餘年事奉極孝卒能教子
德峻入庠

張氏韓國寶妻年二十四守節家道貧苦親老子
幼仰事俯畜獨力支持撫子成丁

劉氏石恆泰妻年二十四守節家道不豐孝事雙
親撫育孤子成家

王氏魏岱妻青年苦守誓不改節撫二子俱入庠
姚氏楊干章妻年二十四夫亡遺子八月撫育成
立

張氏馬應泰妻年十七夫亡事姑撫幼矢志守節
親族贈以匾曰冰清玉潔

繁峙縣志

卷之五

三

謝氏宮明倫妻年二十五守節五十四歲卒

劉氏侯名譽妻年二十五夫亡上事舅姑下撫孤
兒守節不渝

王氏李瑜妻年二十五守節孝事翁姑撫子成人
李氏姚宣武妻年二十四夫亡無嗣撫姪爲子艱
苦之至

霍氏鄧天秩妻年二十三孀居孝事翁姑撫週歲
子訓教至嚴克成家業

附載

梁氏宮效奚妻年二十六夫亡家道貧窮備嘗艱苦矢志不二六十一歲卒

王氏鄭秉善妻年二十六守節撫子成人

韓氏郭永春妻年二十六夫亡撫子持家艱苦自守

張氏高成基妻年二十六守節撫子成立八十二歲卒

穆氏韓吉妻年二十六夫歿矢志守節備嘗艱辛楊氏王緒文妻年二十七夫亡家貧子少苦守貞

繁峙縣志

卷之五

四

節

梁氏鄭邦佑妻年二十七夫故撫育幼子誓不他適

馬氏范泰來側室年二十七夫亡正室李氏閱一載亦亡奉翁姑孝順撫子成人六十二卒

許氏楊金龍妻年二十八夫亡事姑最孝守節十二年而卒

劉氏高子潔妻年二十八守節清貧自甘撫子成立

馮氏楊金鳳妻年二十八守節事姑甚敬訓子有方鄉黨以柏節松操贈之

鄭氏楊縉紳妻年二十八夫歿事姑孝撫二子成立

韓氏鄭延年妻年二十九守節勤儉自矢戮力成家事姑甚敬撫幼子身列成均爲邑巨富八十
六卒

鄭氏楊泮林妻生子二年二十九守節三門無嗣
命次子承其嗣八十四卒

繁峙縣志

卷之五

聖

呂氏康廷重妻年二十九守節幽貞性成誓不二
天

魏氏梁清表妻青年守節事親撫子孝慈兼全
鄧氏任文妻家貧守節歷久不渝撫子成立

魏氏庠生王璋妻矢志守節孝親撫子年三十八
卒

仙釋

神仙之術聖人不師佛老之教儒者弗道曷爲乎志然劉向有列仙傳葛洪有神仙傳齊王有四大門詩沈約有千佛讚好古者未嘗不旁及之繁峙接壤五臺清涼寺觀諸名勝每爲仙釋遊棲之地雖羽化飛昇事近於誕而懷立抱真度世覺民亦必有術也姑卽傳聞所及者附於編末云志仙釋魏

梵僧不詳其名氏嘗從魏文帝乞一臥地帝許之繁峙縣志

卷之五

巽

展臥具覆五百餘里帝知其異駭之僧馳騎而去山隨之帝曰爾憇耶山遂止繁峙憇山得名以此隋

高節并州人年十七辭親入臺山至北臺谷後見頭陀苦茅爲居節長跪求度僧曰能食我食乃可度節卽採藥而食汲泉而飲居數日僧曰能誦法華乃可度七日法華成誦僧曰汝能攝念坐七日必當得度節坐七日起長跪僧曰我年髻矣不能令汝成道今長安有臥輪禪師可往依之且曰我

海雲比丘也節謁輪公輪問所從來節曰奉海雲
比丘命自五臺來輪大驚曰海雲卽華嚴經中善
財所叅第三知識也節辭輪而返復履舊境惟見
荒麓焉

唐

誠慧靈邱李氏子其親禱於臺山而娠長不願娶
從五臺真容院法順和尚披剃嘗誦華嚴於李牛
谷有五六儒服者來坐聽或持異花鮮果而獻怪
問之答曰某山神也願充執侍誠慧舍而他適同

繁峙縣志

卷之五

七

光元年莊宗製書并紫衣賜之書云師鷲嶺名流
鷄園上哲精持護鵝之戒宏宣住雁之談潛招三
乘深明四諦忍草常新於性苑覺花不染於情塵
高蹈雲峰棲心聖境汎慈舟而濟溺持慧炬以照
迷五百龍王皆皈懿德十千聖衆盡繼高蹤爲百
姓之甘露作空門之標格朕方興景運大闡宗風
宜旌精行之名以奉無爲之教崇號廣法大師兼
賜紫衣固辭不受復降勅諭略云再遣內城遠頒
成名師號旣旌於道行紫衣無爽於受持久屬當

仁匪宜多讓誠慧聞命卽囑累門人吉祥而逝壽八十諡曰法雨大師塔號慈雲

隱峰姓鄧氏邵武人幼不慧父母聽其出家初遊馬大師門復往來石頭後於馬祖言下契悟冬居衡嶽夏往清涼唐元和中路出淮西屬吳元濟阻兵隱峰曰吾當爲解紛乃擲錫空中飛身而過兩軍鬪心頓息遂入五臺於金剛窟前將示寂先問衆曰諸方遷化坐去臥去吾嘗見之還有立化者否曰有曰還有倒立而化者否曰未之見也乃倒

立而化衆昇就茶毘屹然不動隱峰有妹爲尼乃拊而咄曰老兄疇昔不循法律死更惑人以手推之儼然而踣遂就闍維收舍利塔於北臺之頂

元

鄭祐小李牛村人學黃白吞吐之術與其妻李氏皆羽化登仙

明

壁峰禪師名寶金世稱金壁峰乾州永壽石氏子母張氏好善壁峰生六歲依雲寂溫公剃落受具

謁如海真公於縉雲遂大徹悟真授記別且囑曰
昔無用和尚謂我云座下出三虎一彪爾其彪也
爾緣在此當詣朔方先是定中見一山有招者曰
此秘魔巖也後北遊五臺道逢蓬頭女子衣敝而
五彩閃爍走足徐行一黑獒隨之問何所之答曰
入山曰入山何爲答曰一切不爲言訖而沒因就
地建靈鷲菴元至正間詔祈雨入京卽大雨賜千
金逾年復詔入值大雪夜有紅光出室中賜寂照
圓明大禪師明洪武戊申詔赴京住天界寺賜紫

衣金鉢及御製詩壬子六月集衆言別弟子請偈
曰三藏十二部尙爲故紙吾何言爲怡然坐逝茶
毗得舍利無算建塔北臺文岫山又賜詩旌之學
士宋濂有碑壁峰製華嚴字母佛事梵音清雅盛
行於世

具生吉祥天竺迦維衛國人別號板的達明初浮
海來禮五頂閱四載抵臺山駐錫壽安禪林洪武
七年詔住蔣山開化石城聽法雲集八年春御製
善世歌賜之有笑談般若生紅蓮之句十四年足

疾不能行勅醫療之師附奏欲歸五臺師別衆曰
今將爲五臺之行有能從我者乎有一弟子曰某
能從師舉足曰汝無這腳安能從我後盥沐跣跌
而化得舍利無算立塔普光寺與壁峰塔對峙長
史桂彥良撰碑

然燈和尚臨汾人名性平居五臺華嚴嶺獨坐誦
經虎魅遁跡人甚奇之迎至堯王山中爲建天光
寺神宗召入內殿賜千佛珍珠紫衣賜號然燈主
皇壇講經拜國師年餘辭歸河東延生菴以老焉


讓大師號衲空一號罕峰相傳爲陝右人筮仕長
吏後棄官雲遊得佛法於五臺山達觀禪師遂棲
獅子窟與憨山海印沙峰輩五十三人爲淨友達
觀示寂乃卓錫方山之昭化院戒行精嚴工吟咏
晉潘二藩雅敬之萬厯中賜爲紫衣大士嘗貯粟
於掌鳥雀馴集掌上就食後無疾跣跌而化
德清字澄印全椒人族姓蔡氏年十二辭親入報
恩寺與雪浪恩並事無極法師內江趙文肅公摩
其頂曰人天師也德清以江南習氣軟暖宜入春

冰夏雪苦寒不可耐之地以痛自磨厲飄然北邁
叅徧融笑岩偕妙峰登棲北臺之龍門老屋數椽
在萬山冰雪中日尋緣溪橫徇危坐其上忽然忘
身衆籟聞寂身心湛然如大圓鏡大事旣澈光明
四照慈聖后建祈儲道場於五臺與妙峰實主其
事光宗應期降誕德清乃棲東海之牢山慈聖遣
使再徵不能致布金造寺賜額曰海印丙申坐私
造寺院戊雷陽成楞伽筆記居五年住錫曹溪甲
寅披剃返初服於是東遊吳越赴紫柏之墓於雙

徑弔蓮池於雲棲結菴廬山五乳峰下專修淨業
居四年復住曹溪示微疾沐浴焚香集衆告別危
坐而逝天啟三年之十月也弟子奉全身歸五乳
塔而藏焉後二十年復奉其龕歸曹溪將茶毗啟
視之膚理氣軟鬚髮郁然乃加髹漆於六祖真身
之側云

臘菩薩本縣人身貧傭工自食性不茹葷以平等
心待人恩怨不立喜怒不形后就食渾源州李家
莊時天啟七年五月大旱二十五日微有雲氣語

人曰此接吾雲也如不雨而去必大旱三年急設一几坐吾於上兩邊設大甕注水於中用二人執瓢以水灌吾頂待兩足方止至二十八日雨果大足臘氏從鼻內出火目焚空中現瓔珞觀音之像里人建廟祀之時有耿氏韓氏亦化於廟人稱三仙飛昇



繁峙縣志

藝文祥異

冊六

藝文志

藝文

藝文者道德之英華也上而朝宁之章疏下而名山之著作以及詩賦詞章皆足以覘性情而徵品學繁邑之以藝文著者惟胥鼎爲最其餘紀事徵實採藻摘華出於賢士大夫之手而足以備一邑之掌故亦間有焉故摘而錄之以俟輶軒之採云

志藝文

疏

繁峙縣志

卷之六

一

薦胥鼎疏

郭文振

河朔受兵有年矣向皆秋來春去今已盛暑不問且不嗜戕殺恣民耕稼此殆不可測也樞府每檄臣會合府兵進戰蓋公府雖號分封力實單弱且不相統攝方自保不暇朝廷不卽遣兵爲援臣恐人心以爲舉棄河北甚非計也伏見前平章政事胥鼎才兼將相威望甚隆向行省河東人樂爲用今雖致政精力未衰乞附重兵使總制公府同力禦戰庶幾人皆響應易爲恢復惟陛下圖之

書

與沱滿胡士門書

胥 鼎

元帥始鎮河中惠愛在民移旆晉安遠所忻仰去歲兵入平陽不守河東保完者惟絳而已蓋公坐籌制勝威德素著故不動聲氣以至無虞也邇來傳聞治政大綱科徵太重鼎竊憂之古人有言御下不寬則人多懼禍用人有疑則士不盡心况大兵在邇鄰境已虛小人易動誠不可不慮也願公以謙虛待下忠厚結人明賞罰平賦稅上以分聖

繁峙縣志

卷之六

二

主宵旰之憂下以爲河東長城之托興定二年書

乞塗邑侯總裁修志啟

任中麟

竊謂文啟一代之英華昌符國運事總千年之筆削道本家傳是固儒者之當究心猶爲邑侯之所加意蓋景致形於歌咏政化攸關討論酌其精詳典章聿敘此自幼至老之素願雖愚不肖之可與知茲惟父母營繕極綜理之周士民悅服誌序垂篇什之首汗竹留香引物連類之難窮原古證今之悉備念生識本鷓鴣曷能白雪之句文慙吐鳳

竟無黃絹之辭祇以坎蛙之見漫測巨海之謀台
卿七篇之解甚明尙慮違闕以需改正晦翁四書
之註已備猶設或問以辨疑訛余復何能敢自爲
是遷重負於他境併力堪扶示夙恙於通衢良方
乃得用求正於罄效希郢斲於宗匠儻臭味式契
於芝蘭庶採掇不遺於葑菲如曰胸蟠國子監可
讀工部詩茲維艱哉就使眼空天下書始答韓公
策蓋亦寡矣拳拳尺素耿耿寸丹幸大道之爲公
納微言於不棄謹啟上聞

記

遷城記

翰林侍講于慎行東阿人

繁峙雁門塞下邑也城於山麓羣山環而拱之故
曰繁峙其城迤靡差池民居如緣上屋之陟乘下
屋之危市則如坎不平而撼負陽抱陰嶽峯穹深
蔽虧日月產石與鐵俗樸而獷健訟嗜爭其士也
文采不著闕於賢書亦其地形風氣然也吏相沿
以治莫筭徙之邑人日咨咨焉萬歷乙酉按察張
公治兵雁門行部至邑周視而慨屬吏與民議之

邑令塗君率三老子弟請曰以是蕞爾土介在山谷湫底壅闕無以疏滯導和民不蒙福今使君有意更造之德至渥也敢陳畚揭以從公曰是烏可緩也以謀諸太原守吳君對如今議請於大司馬鄭公大中丞許公按司洪公暨藩臬之長咸以爲然乃疏諸朝遷焉卜地於故城之西北三里許厥壤地平圭之景中蓋沃土也丙戌四月朔興工問費安出則帑金八千有餘問役安徵則以口爲賦益以追胥鳩人徒則副將李君棟叅將周君易管

出納則郡丞周官評核羣材則別駕劉君應文綜旣稟則代守陳君宗凱董工役則守備俞君尙德而鉤稽功課考度章程則太原守主之邑令行焉是年十月六日城成民挈其孥以徙咸喜無怨以奠厥居云城周四里有奇高三丈五尺基厚亦如之闢門三面展其坎方重城亦如之爲樓者八爲臺十有三屹屹如也官長有宇師徒有廬神有壇祠客有館舍翼翼如也市廛術隧坦坦如也將規模於故城何啻過之而基圖敞夷原臯坦衍若去

奧窔卽堂皇焉不亦偉哉今堡塞邊吏士蒙甲戢
矢一如內郡主上惟桑土至計詔塞下郡邑以時
完繕城堡三歲上其績爵賞隨之蓋雲中五原以
往百室之聚罔不城矣繁峙斗僻其間非當路塞
斥堠不及獨以民俗士風阨於樸陋改而遷之乃
至金湯之險與長城勾注若重鍵焉斯不亦永利
哉丁卯之役河汾上黨遺鏃如茨况直并塞下邑
道不朝食而晏然毋早圖也茲城之遷毋論醞靈
毓粹使士風民俗襲於休明設如雲中五原烽燧

燧舉羽檄南馳邑之吏民無亦登陴受甲以收全
勝而何虞之有故予於是城也知張公之於籌邊
無遺算矣太守及此胥能奉公指以懋樹豐績亦
咸有休閒矣哉張公名維城永清人辛未進士吳
君名同春固始人甲戌進士塗合名雲路延慶人
予門下士也來告厥成請識歲月予嘉其勤而紀
之云

移學宮記

太原同知劉應文
東光人

繁峙故有學宮在舊治左其一切廟制相沿習多

未備且左右向背造設傾欹每堪輿氏過輒嘆謂當與縣治共議遷歲乙酉邊境寢烽燧諸放牛過馬幾臻鳧鷺旣醉雁門兵臬張公以無事時巡其邑青衿士并老幼輩咸出遮道請謂城邑自古王公設以爲民其地欲平行曠豁令民樂適有居茲繁峙久不愜士民願思欲變置累歲勢將弗可因上奚以爲民圖張公手起衆因試所請周回城內外蒞視見城垣廟署社稷廛市制果弗以稱也於是弗避艱大刻日移文兩臺使者言繁邑不可因

狀兩臺使者見亦與兵臬合急疏上陳狀上俞允下令諸期會浩費一一諧議議定更檄東路郡亞周君繁峙尹塗君小石口守備俞君共襄厥事諸君卜日如所議引丈方位定墨食吉率衆丕作未幾城垣縣治以次成諸學宮亦以次成旣成規制視昔漸備四向軒豁張公至達觀親色頓沾沾喜因擇日釋奠奠畢集青衿士與譚經堂上時諸青衿士並邑中老幼環橋觀聽莫不懽忻鼓舞若塗泥旣脫而爽塏聿登者嗚乎茲其爲一時鼎新盛

事與念昔耿圯河水殷民不適有居盤庚率衆矢
民猶安土重遷今張公始爲民圖遷民卒懽欣以
赴子來和會不歲而役成謂非樂民樂者乎且記
學宮費非妄用非外索構櫨榱桷取諸舊腐而新
磧礪整砌取諸舊缺而補丹雘聖赭至畚鈿舉鋤
之屬則取諸操狀均勞役而時餽廩肇工丙戌三
月竣於丁亥七月總 大成殿五楹櫺星門 啟
聖祠敬一亭及東西齋並東西號房名宦鄉賢祠
各三楹祭器庫二楹泮池一區育賢房一座學博

宅二所視昔爲勝焉茲遷也繁民思之舊矣一旦
經營輒就茲邑博士弟子幸鼎新之會旦夕游藝
其中翱翔比翼與昔先達並茂可謂厚幸哉塗君
與余同銓注實與議所自始又以余董其事今托
余記余非能文職亦非珥筆特思地以人興事與
時會塗君一率衆議而遂定繁邑百年遊士之所
後之君子或有取余言而識歲月焉是爲記

繁峙古晉地以其環列皆山也故名其升復代更

爲繁峙爲堅州自遷聚寶寨城未及三里東西置
二門後少大之移東門增下城而廣其地而門且
北向人文寢衰自嘉靖丁酉後士若中酒者五十
年或者謂地氣下而趨陰也繁之人每欲徙是司
治者苦其難不果萬厯癸未塗公蒞茲邑是時宿
蠹藏奸諸務廢弛且地接靈邱二百餘里民疲於
奔役差糧率多拖歉公爲立夫廠置軍站整積逋
裁里長更北樓斗級建官廳公廨多方措注百廢
俱起乃值多事之區未嘗以劇自撓環視城池慨然

曰茲非闕典與繫古建國險城池以防寇壯公庭
以臨民崇學校以毓士君子修此三者故全也今
三者不法奚政之爲遂毅然思光大之列狀以請
適兵憲張公重民命卽允議請於上而葺其事相
地勢察土脈叢茂處知土肥掘地則泉泉甘俯仰
四顧前有峯若筆架簇擁而崢嶸後有嶺若屏圍
環列而峻嶒左臂瓶形右臂雁門首乾足坤襟山
帶河卽於是城焉城四里四十一步高三丈五尺
下濶三丈上濶二丈有奇墁以磚凌以塹東西南

門三北樓一門樓三角樓四敵臺十二市增鼓樓
公署宅樓五中庭五堂前後增捲棚左右二甬道
砌磚崇 聖諭亭六房之上葺兩衙六房之末增
里書阜隸房建豫備倉及公廨公廨前儀門外左
土地祠增建延賓館茶房右建陰陽醫學支房大
門旁建申明亭旌善亭若 文廟則又封其堊拓
崇其臺階飾以琉璃塼以朱丹戟門外關泮塘舊
名宦鄉賢祠各一間悉增三間左 啟聖祠敬一
亭右儒學明倫堂學右文昌祠舊制學在殿後改

列右舊齋房六間增號房六間舊宅十間新增各
六間廟城隍於治西像立帝於北樓東三官而西
三義街東西三南北五曰崇義曰尙禮曰承宣曰
興化曰永豐曰東順曰西順曰中順民民騰連鱗
比轟轟有條察院分司悉皆更新始於丙戌夏四
月成於丁亥秋九月又請設軍伍以衛之其爲民
計何深遠也回視向昔則渾渾乎鼎異而有章矣
由茲靈秀所鍾風移俗美而人才之振厲將不泮
泮駸盛乎是役也邑之義官康登科醫官韓遠農

民韓守幹等與有勞焉今請記於余欲鑄之石余因詳其始末以見塗公澤被當時功垂後世云

邑侯王公去思記

進士 王三聘 代州人

關中王公以己酉鄉進士丙戌歲來尹繁峙越四載遷保安太守邑人赴當道借寇者始千人兩院將欲奏留時命已下議者以爲非體乃持久不決會上谷有邊報而保安其四輔也總督葛公曾委公以十口邊事遂無東顧之憂因急欲得公捍禦之促公赴任使者相望於道公開諭攀轅之民百

繁峙縣志

卷之六

十

端始釋啟行之日百姓祖帳稱觴連絡境外因欲立石以記其去後之思予分署民部由是邑將便道之官繁民遮拜請記按狀繁峙古堅州昔人謂其爲窺三晉之奇道犯燕趙之捷徑乃宋遼金設重兵處誠不可不爲家門慮也我 國家休養生息亦旣庶且富矣至癸酉歲居民罹鋒鏑者相與枕籍溝塗歷甲寅乙卯凡三載其禍蔓延不絕孳畜田產蕩然盡矣且加之以饑饉重之以徭役民貧盜起父子兄弟不能相保其呻吟饑寒之狀疆

場廬舍板蕩之形傷心慘目難以枚舉及公視事先釋淹獄以開無辜全活千連包賠者百餘家與凡民詞之在諸司者悉移文取回部決之而囹圄乃空於是并疲敝之都而孱弱不堪之民始得寧肩除逃亡之役而顛連無告之衆方爲息喘往年公用之常額出自都里歲計不下千金一切革之甲里止於使令而已驛遞過客加倍求索公置印封袋照例支給與者受者不得增減於其間月省二三十金是縣膏腴之地多爲軍餘置買公於若

屬每名糧一石加徵銀一錢五分共起徵銀一百三十三兩乃悉載憲綱爲不朽之典未及編審之期先裁民壯一百名正兵營健卒十名革回雁門驛馬騾四匹該糧二百石及協濟銀四十兩雁門所車十輛俱坐派於靜樂榆次太谷三縣遞運所防夫六名廣濟倉斗級一名草場庫役一名坐派於代州其平刑斗級一名則改之五臺井陘快手二名則改之平定壽陽一歲減費計六千餘金此非得哀多益寡變通宜民之術者乎有奸民史文

忠者投獻王府侵奪南山田土民不堪命公繩之
法而黨徒股慄自是強宗豪右弄法舞文者若將
遠去而無所控訴之民咸相安於無事矣行之期
月成績旣著復建敵樓一十六座周圍女牆甃之
以磚浚濠丈餘易縣治而創造之葺學宮而更新
之凡廟宇之在祀典者皆完其昔之所未備蓋二
千金費也而材不擾於公私數千人役也而力不
征於田畝惟需材於廢寺官山助工於四方遊食
凡待哺之民爭爲赴公勞民之內而有活民之恩

非悅以使民者乎南山中聚巨寇數十處據險劫
人公分部健勇生擒之而境內安堵庚申大饑旣
發倉廩復勸民出粟其所全活者數萬人無有遠
近咸指其室家曰此輩皆我公所生也其遺愛於
人如此使其少留三載當不止於復昔日之風土
而已有令如此今父母乎他邦固宜其隨觸而興
思也思在人心猶水之在地中何往非澤亦何往
而非其所遺之思也乎不立石以紀其一時官民
相與之情不幾於盛而弗傳也哉故勒之金石庶

君子觀之則愛小人觀之則易使也由此言之記亦不爲無補豈真思云乎哉公諱三益別號小山爲朝邑世家三代皆爲循吏所至輒有去思碑云

邑侯楊公德政記

進士

安嘉言

代州人

萬厯元年歲在甲戌繁邑頗稱無虞食德者思昔楊公之澤而未艾也迺欲謀垂不朽噫楊公而胡爲有是哉按繁峙偏陬晉東北密邇邊陲民鮮生理服播藝早潦則坐困無策差役繁劇輕重弗均黔首垂喪無所控告其積敝於茲司牧者長太息

繁峙縣志

卷之六

三

焉嘉靖丙寅秋楊公來尹斯土下車卽詢民瘼惻然色動曰邑狹土瘠賦煩役重且倥偬無紀民其病乎吾旣承乏茲土當卽爲調劑庶罔曠典守遂窮弊源下條格首以均地糧爲急務履地畝辨高下度肥磽上下坡險間丈量均平使兼并影射者無所肆而困輸者得以自立以故夏秋二稅不兩旬咸爲報完上恬下安催科得以息肩二百年不解之害一旦遽釋仍開懇荒田勸助佃資招納流移奠安逋負懷來王堯相等一百五十九人復業

城垣舊址卑淺公登眺與嗟卽申請營繕式增高
厚建大小城樓二十餘座雄城百雉保障無失倉
廩傾圯且無儲蓄公多方設備其古義社倉之遺
與縣南境有糜家溝奸宄竊據負固公以法鎮撫
解勸歸版圖地糧亦爲樂輸至修學宮以興文整
教場以奮武收養孤老以恤窮旌揚節孝以勵風
除獷徒之害而山寇爲屏息與市廛之利而三泉
置集場嚴禁甲里糜費罷置北樓斗級庫子叁酌
丁糧之中而定其等則爰立庸調不刊之典庶貧

富均和徵寄莊糧銀以填實差徭賢侯王小山之
美政延久未報公請擬陽曲縣事例每石徵銀一
錢奇以補逃亡其他良法美政更僕未易數者而
均糧一節尤爲急務夫是以瘡痍盡起疲邑生色
咸欣然謳歌樂利之休民不誠幸矣哉公尤慮日
久湮沒具冊申詳報諸執政使垂於後後被豪右
惡其害已將欲付諸烈焰義民楊林公訟於上乃
益明且定焉今八九年間邑之薦紳士民罔不頌
揚羨慕咸發五袴一天之謠至於觸事則流涕慨

嘆願祝後嗣榮昌是蓋激於天理之不容泯感於
實德之不容秘甘棠遺愛峴山墮淚良有以也時
事變遷幸逢洛陽會吾王公廉介仁明深恤民隱
從縣人郭英楊林等數百人議將請於上以崇祀
公名宦先持狀索記於余余嘉公之有實政而繁
人之有實心也其他有民社寄者咸以公之心爲
心將造福生靈而國家萬世無疆之慶亦胥賴之
矣公其可風乎因摛以爲記公諱守信號對川陝
西高陵人嘉靖壬子舉人

修預備倉記

邑進士 糜有象

山海經曰泰戲之山無草木滹沱之水出焉西流
百三十里曰聖水村聖水之陰有廢治湮沉不可
考唐聖厯二年改建於聚寶寨在滹沱之南數百
載因之厥時草昧縣署湫隘僅蔽風雨倉在治南
數椽茅屋敗壁頽垣不堪藏貯萬厯丙戌徙治滹
沱北是爲今城民窮財盡土木煩興先後經營閱
二十餘載迄無成績鼠牙雀角苦風淒雨並爲倉
蠹應是役者動至傾家是豈前乎此者剪焉不治

乃或補其漏或塞其隙力未休而剝落隨之徒勤民於役耳劉侯蒞邑之初年萬厯三十五年也視事時諸長老趨進曰窮邊下邑倉頽日甚明公能無意乎侯曰唯唯又明年諸長老復請曰窮邊下邑倉頽日甚明公能無意乎侯曰唯唯又明年諸長老復請如故侯曰凡事不一勞者不能永逸不善始者難與圖終邑方罹兵人值播遷力訕事劇如不勝何長老休矣予將有以辦之嗣是一土一木尺積寸累閱三年久諸務畢集召諸長老議鳩

工飭材給餉募夫一舉手而倉告成楹計者北凡七東西各九大小門凡一圻墁瓴壁孔堅且長棟宇豐隆櫺檻疏廠諸長老曰噫嘻邑之永圖也庶力無假候蓋私我也相率而問記於余余聞之矣魯新作南門春秋譏之列國入其境而道路川梁不以時修春秋又譏之要以允協時宜民不勞而政有藉是惟無作作則君子與之矣葺爾孤城昔不能當上遊一面以至今日山河不改風景日佳三十年之通可計而民命因誰之賜也語有之何

知仁義享其利者爲有德候之政類若斯昔宋蔡公襄記萬安渡石橋但書役要而不及其他余竊取斯義用述創修之顛末勒諸貞珉以告來禩是役也經始於庚戌冬十月辛亥春三月落成焉候諱化龍字在田直隸霍山人

移祀名宦記

齊士琬

丙戌嘉平余始奉

簡命來蒞斯邑謁廟後惟兢兢於簿書錢穀未遑載考祀典客春上丁致祭先師次及名宦鄉賢夫

鄉賢紳士責也考核自詳獨稽名宦自有明三百年寥寥相望劉公張公蔣公蘭公四人而已豈果循吏之難與抑有遺賢而未附於廟者也心竊疑之繼卽以皇差馳去迨仲秋又因礦務奔走並未與祭祀之有無遺缺仍不暇深考今春先祭上戊禮曹以西門月城祠堂之祭請援舊例委縣尉往祀之其地隻椽片瓦無復存者僅於砂礫委積中具楮帛奉餘牲設木主展拜祭畢則木主零落吏人提攜以去諸職事顧尉湫然爲子備述因痛

自悔過曰祀事不修藝實甚神明能無怨恫耶爰
訪諸耆老諮之紳士遍尋舊志得抄本讀之知月
城之祀有五人焉其一蘭公名俊前朝縣貳旣祠
學宮又祠月城得毋澤留人心譽留人耳思之深
不覺禮之複乎其一楊公原名守信蒞茲土也度
地高下均糧重輕影射詭寄銷歸烏有國人頌之
班班可謂仁矣第不知相沿木主何以誤名爲亨
是不可不急正之其一塗公名雲路視舊城多被
水衝改築新城於河北岍以奠民居非有大經濟

大擔當烏能興大役而不致中阻乎至監察趙公
失其名里缺其行實自應仍奉舊祀另候博訪確
切補入縣志若崔公尙質值劉遷之亂堅守危城
城破焚脊於樓後自盡河山正氣與日月同光矣
夫此數公或死捍社稷或恤災禦患或減徭薄賦
奠安斯民雖比戶尸祝百世不祧可也乃祠宇傾
頽至不獲數椽以安義魄而妥忠魂傷已今請同
祀於名宦或亦上不違功令下不拂輿情而出於
人心之同然乎外如三益王公志稱有文武兼材

會邊事起以十隘口重任畀之卒無東顧憂去之日民罷市輟耕而不得與諸公同祀母亦缺畧之憾與應補祀焉是舉余主其議學博申縣尉顧以及薦紳先生咸以爲宜是知秉彜攸好非出私意也借曰有私則任公諱朝臣者與余同里顧其行事寂然無聞又何敢阿其所好以重予過哉是爲記

重修文廟記

進士 劉 愨 州人

繁邑之有文廟也自萬曆十四年塗令徙新城新

建暨

國朝初經兵燹之餘其不至燬燼者僅大成殿耳幸廣文吳君國儒糾生徒而營造之規制草創嗣是邑令若戴若郭訓導李公際亨各徵役草治且漸多添設特以歲久傾廢風雨飄零幾於礎陷柱歌邑侯齊公甫下車詣學釋奠俯仰周回乃慨然曰學宮傾圯若斯非官斯土者任哉第授任伊始相厥工程非構一椽庀一瓦之能爲力也閱三載政務之暇爰偕教諭申公伯訓導王公庭樞集博士

弟子於明倫堂曰

聖天子右文宏化重道崇儒矧學宮關一縣之文風荒
烟零落吾儕可聽之而不爲釐飭耶於是學中齋
長劉子新明新淑雲祥張子雲瑞暨武生張子瑞
麟士璽師子璇等皆欣然曰生等有志久矣顧力
不逮耳幸我公慷慨增修固繁邑文運將興之機
也時諸生之洋洋而動于于而來者無慮百餘輩
公卽捐貲爲倡併諸生之所輸具册詳憲卜日鳩
工因者什七益者什三大殿椽瓦易以新而堊塗

之兩廡舊五門增爲什一戟門舊三間增爲五櫺
星門之剝落者煥以文采門外照牆前一大泮池
舊泮池之在戟門內者更從而深廣之文昌閣則
移而西向奎星樓更遷離位儒學署之昔燬者今
重修之啟聖祠名宦鄉賢祠以及明倫堂之宜經
營者皆次第補葺之於是煥然改觀不數月而工
告竣此可見根本之地人心實不能自己然非父
母師長鼓舞先倡邑中紳士不過望宮牆而嘆耳
欲以冀廟貌之重新俎豆之生色也豈可得哉余

代人也家於繁邑數十載昔應童子試嘗聚文社於此斯舉也不勝悅志爽心焉因援筆而爲之記

重修學宮記

翰林庶吉士 史珥 鄱陽人

余客繁峙後三年識韓李張三孝廉與諸文學以書抵京邸導邑人士意丐余記其宰周侯之重修學宮也曰侯蒞繁十年治浹人和百廢具興惟文廟庠隘弗稱典禮每欲改爲重其事未及行今年春始師虞焉而捐奉以爲倡邑人士咸踴躍襄事得義作之金一千三百零侯不以入署籍而畀邑

繁峙縣志

卷之六

三

士勤幹者董其事凡購材篋銀八百三十四兩零募工銀三百九十五兩零悉撤故宇而新之侯時親臨不數月殿廡門垣巍然堅整觀者咸訝爲神速橋門一池素枯涸屢鑿不得水蓋縣治踞高陽城中井率四五丈可汲學基又踞治之高處池弗能鍾水宜也侯銳欲及泉益大鑿之丈有九尺而靈泉漢涌倏忽泛溢滙爲青池甘冽甲諸井邑人士謹然驚嘆以爲侯精誠感通厚地肇錫甘泉雖耿將軍疏勒之拜何以加茲再踰月鄉闈榜發繁

獲雋者二人皆侯所刮目也邑人士益謹然謂此
吾繁百四十餘年所未有者泉動於下士奮於上
微侯何以覩此乎且侯之治繁也嚴以戢奸猾慈
以惠柔良清介自厲暮夜無敢以金造門者屢應
夫差民不告病課諸生月備餘饌而手校其瑕瑜
邑賦有不均者力申於上雖不得請而爲民苦心
皎如也慮坑冶將藪逋逃爲巖邑公私病力障不
使開欣以利怵以勢終不動皆侯政之大者今以
廉受當道知聞將移治上黨侯不日去我夫安可

以無紀也予循覽書詞旣嘆邑人士用心之厚而
又喜侯能以實政誠民也夫學校之設所以布教
化正人心厚風俗有舉無廢守土有專責焉侯之
爲此修其職焉已耳然世方因循苟且以俸代去
侯獨不以十年不調稍懈其有爲之志誠大異乎
俗吏之爲乃余觀繁邑士風淳樸勇於向學第以
僻處山徼歷代苦戰爭文獻凋謝今雖久際承平
而地少藏書良師友亦不多覲聰明才力日促局
於故篋陳言非絕人之資烏能自振侯之崇深堂

與濬發靈源蓋隱示人以入室盈科人自得師之意景行向往古昔先民其屬望也深其爲教也大矣固不獨修舉廢墜之爲也昔范文正公嘗守饒吾鄱學基實公所定二十載而器資彭公魁天下至今稱焉夫名賢流澤所存雖未及親爲者尙樂推原其美况侯於茲役業已於事而竣矣邑人士固將思所以存侯振興締搆之勤俾有志者鼓舞不倦庶幾有人品文章不負科名如器資者應運而興將繁人之思侯如鄱人之思范公焉侯雖游

膺顯擢敷歷四方猶其在繁也上黨咫尺地直旦暮遇之則今之亟欲紀述豈獨春秋以民力爲重事之義哉余自壬申下第客繁峙歲餘嘗以筆墨獲與諸君商確而諸君相與之篤不異昔者是邦鄉大夫之與李臥雲喜其來而懼其往也茲以記見屬義不得辭乃書此以復侯姓周氏名銘詒號慕劬乙丑進士鄱陽人與余爲世戚稱侯原繁邑士民之意也司鐸康君基田曹君周屏實分猷焉

琴之有臺筆之有家書畫之有船皆紀實也未有無實而空寄以名者况乎鼓樓之建所以宣通駿之聲而叶於論之奏聲音之道與政治通又非第如名流勝蹟徒令後世文人墨士誇爲美談已也北靈鼓樓巍然聳峙於通衢中央累以崇臺覆以飛閣繚垣四周八牕洞起體勢與省郡相埒塑

文昌神像於樓中歲時祀事唯謹顧求所謂饗乎鼓之而厥聲嗶嗶者寂乎其未有聞焉樓故有鐘第偃臥東偏檐下問當年崇牙樹羽之跡已了不復

繁峙縣志

卷之六

七

存矣予周覽地方形勝竊謂鼓樓之名宜副其實已而衆論皆以爲然於是諏日度地購材募工於樓南東西兩旁添建小樓二間東樓懸鐘西樓置鼓從下而仰觀之一如人之竦立而張拱端好如鳥舒翼然者晨昏司考擊者二人卽以樂樓鋪租資之薪水聲聞於天而出王游衍衆志於以凜旦明聲聞於野而夜寐夙興四民於以警作息豈徒以簷阿棟宇華采軒翔務爲觀美已乎詩曰虞業維樅賁鼓維鏞鼓舞振興於政治亦不無小補焉

揆之昔人建樓之意庶幾其無負乎是役也經始於六月初三落成於九月初二共費白金一百五十六兩有奇伙助銀錢監督工匠例得列名碑陰以示來許更爲我告邑人曰事之當因名以紀實者獨鼓樓也歟哉在昔猗那之詩首稱奏鼓而大成之集肇自金聲姑以是爲先聲之導可耳

邑侯周公養士遺愛記

康基田 興縣人

余自爲諸生業晉陽時卽聞公愛育人材勵進後輩每同考入闈士人願得出於其門遠近習舉子

繁峙縣志

卷之六

三

業者無論知與不知皆識其爲繁侯周公也余心竊向往之甲戌冬以明經司鐸茲土始得一覲且時從諸生課業其庭歲再稔中丞明公請於

朝調公潞安首邑

命下之日爲公頌禱而又以不盡其私悵然如失諸同人告余且爲商記曰某等炙公之光十載於茲矣公平日身正率人大指以孝弟廉恥爲先勤勤懇懇謀預纖悉談及倫理骨肉事怡然改容暇日講授經義量材質之鈍敏宛轉開導一語觸機滔滔

萬言至夜分不寐左右之進食者不敢以聞不時
召之於庭扃門具食課以時藝遇貢舉年自春徂
秋殆無虛日蓋其教人如此歲壬申門人韓道成
獲雋公猶以科甲寥寥少二寡雙教育益力聲崇
臺之鐘鼓煥幾圯之廟堂會子闈榜發震雅張君
子郁李君並舉於鄉捷至四民歡呼舉手加額以
爲公壽蓋自前明王子魏馬二君聯鑣而後距今
百四十二年不再之休隆而於我公十餘載之涵
育薰陶一得嗣音於此他如學之人皆知自愛崇

修尙實潛移於其中而不覺者固不待言也是烏
可以不記余曰然歐文忠公有言致治之盛衰視
學之興廢公久於是地加意作士俾爲民倡宜乎
行之數年民恬於野商熙於市風俗醇美獄訟衰
息學校政之本豈不諒哉今以治聲久著循資調
劇行登五馬之堂入循吏之傳邑人所爲公慶者
方未有艾而獨念余向與晉之人士耳聞繁邑之
賢侯者今又與繁之士民懷想他郊之父母矣諸
同人不忍違離之私與余同心因述所聞見筆諸

石以俟後之君子焉

新建北靈書院記

邑令 李鳳集

王者建國君民教學爲先非學則無以化民而成俗然教之不專猶未足以化民而成俗也我

國家定鼎百餘年

列聖相承崇儒重道教化大洽山陬僻壤咸建學宮設博士環堵之儒蒸蒸向風爭自濯磨以進於善然學宮之制未嘗萃弟子員於學而課習之其徒旣散而不聚卽其師亦未免尊而不親課不能朝考

繁峙縣志

卷之六

七

而夕稽業未必晝講而夜計此直省書院之設所以補黌宮之闕而爲教化之助者誠非淺鮮也繁邑古晉陽地山川奇秀代有文人前之蒞茲土者治具畢張秩然咸理惟書院之設尙爾闕如余自戊寅承乏茲邑卽有志勸建值年來軍務旁午未暇也壬午事少竣始得捐薄貲鳩工庀材擇日興作中建講堂五間前後學舍二十四間閱數月而功成明年拔諸生之尤者誦習其中延經明行修之儒掌厥教事日省而月試之而向之散者以聚

尊者兼親莫不考課有成期肄業有專所彬彬乎萃處一堂相觀而善矣雖然靡不有初鮮克有終抑有始事者之大懼也爰思廣置學田資膏火方爲久遠計以力絀未逮良用自愧又得鄉先生起而玉成之踴躍捐輸助勦不及於是焚膏繼晷之士無憂餽粥其諸樂成人美之君子出乎性情而實亦氣運之將開與人心之鼓舞有默相感召乎當今

聖天子雅化作人薰陶涵育月異日新行見茹越滹沱

必有雲蒸霞蔚之英上充國賓此則區區之意所不能無厚望於諸生也爰誌其顛末勒諸石以爲券

書院捐貲碑記

邑令 伍佛保

蓋聞養士之法莫備於學制其經費給以廩食美矣善矣書院卽仿此意以立者也我

國家樂育宏敷百餘年來士氣蒸蒸日上矧繁邑雄連紫塞秀接臺峯尤代郡之名區人文之淵藪哉邑舊有書院曰北靈自東粵李公諱鳳集勸捐修

葺剝銀三伯餘兩皆爲諸生膏火之用後接任者因公挪用此項遂歸烏有余下車之始卽聞而惜之歲在庚寅余首爲捐俸併勸邑中諸紳士量力俛助以成前數固不敢謂有當於養士之法亦以興廢補缺司牧之責且以慶人文蔚起不獨膠庠譽髦之濟也爲序

重修書院碑記

邑令 楊元興

北靈書院創自乾隆壬午前縣 李公諱鳳集捐建講堂五間前後學舍二十四間又闔邑捐輸廣

繁峙縣志

卷之六

三

置學田以資膏火維時加意作人延明師造就有方歲庚寅 伍公諱佛保起而勸之自乙酉迄

己亥人文蔚起接鍾聯登實開從前所未有二公之有造於繁豈淺鮮哉奈日久傾圯僅存講堂數間院中肄業者落落如晨星數十年來書院僅空名耳余蒞斯土慨然有修復之志多事卒卒未遑也嘉慶二年乃糾合紳士與縣中有力之家捐金俛助鳩工庀材越次年孟夏而落成計開講堂後改置正廳五間西火房一間東西配房六間講堂

前東西配房八間雖房舍不及向時之多而整齊堅緻則過之自是藏修息游有其地樂羣敬業有其人而前任創建之遺規可以不泯期望之至意亦可以無負矣抑余更有進者諸生朝而受業晝而講貫夕而習復居今而稽古時省而力行勿徒以誦說爲功務必以科第爲志處則爲端人出則爲循吏是尤余之厚望也夫

重修繁峙縣學宮記

葉儒林

嘉慶八年夏四月余選知繁峙縣下車之始晤學

博董君雨岳及縣之薦紳先生僉曰縣學宮自江右周明府修今几五十載上雨旁風鞠爲茂草亟宜重新前任粵東楊明府倡其議事未竟及是時捐修募化事易舉功易集也余心韙其言卽與學博董君邀請邑人士奔走勸諭邑之人莫不鼓舞爭先率其私錢約二千緡鳩工庀材經始於九年夏落成於十年冬自殿廡堂筵門池以及諸祠文魁之閣學舍齊備嚴翼整齊用人之力不以爲勞也良材堅甃不以爲侈也嗚乎可謂知所重矣從

來人材出於學校故建國君民敦學爲先永叔記
吉州子固記宜黃言敦學之法甚備繁峙雖藁爾
邑南北山勢環拱中間滹沱一水長流西下西連
代郡東接畿輔山川雄秀磅礴而鬱積甲乙之科
後先接踵登仕籍者不乏人宜有奇傑俊偉之材
處爲良士出爲名臣者區區科目帖括之學又不
足道也余觀前記所云繁峙地處山徼歷代苦戰
爭文獻彫謝地少藏書良師友亦不多觀其言近
之又較他縣地瘠而民貧或有不得竟其學者然

繁峙縣志

卷之六

三

久際承平蒸蒸日上蒸蒸向化地瘠貧斯善心生且務本力
農者多愛土物則心臧教養無二理也夫民風視
乎士習士習端卽民風淳習顧可不慎哉余謬忝
科第而學殖謏陋無可以教士子者今學博介休
董君雨崑聞喜潘君桐川學行皆宜爲人師者願
諸君束身修行共期遠大以勿負斯舉也已

贈按察司僉事邑侯崔公墓碑 葉儒林

昔先王之制祀典也以死勤事則祀之以勞定國
則祀之誠以功在社稷澤在生民禮亦宜之漢朱

邑爲桐鄉吏後位大司農臨終遺令葬桐鄉其民立祠奉祀勿絕具見古人吏治之良人心之厚交成其美也考順治四年遼東崔公任繁峙山西通志云治行最一時姜逆之亂賊劉遷聚黨來攻公登城設守禦具旣而城潰令家人自焚乃殉城贈官祀忠烈當寇薄孤城外乏應援變起倉卒人無固志公以彈丸之區帶韃握刀登陴抗拒雖不勝而死已足壯軍民之心而喪奸賊之胆比 大兵至遂就撲滅代五嶠皆獲全不可謂非公大有造

于繁也昔吾縣志乘闕如治行不詳據通志云爲一時最則所謂忠臣孝子仁民愛物可推而知也余於八年夏四月蒞任茲土甫下車訪知公墓在東郭外潔誠往拜見荒烟蔓草遺跡將沒承平百餘年遺老無存問墓旁居民不復知爲何氏之壟此守土之責亦士民之事也今年夏四月數旬不雨靡神不祀余親至墓前默禱如三日過雨卽修墓刻石以答靈貺越二日大雨霑足適逢其會又相傳公沒爲縣城隍之神生而爲英死而爲靈固

理之所有者一坏之土公之魂魄猶應戀此亦繁
之人所當保護而奉祀之也同時教諭臨汾舉人
周君遠祚城潰時勒受僞職不屈死之亦載通志
皆與日月爭光不可泯沒者舊有仇明府碑畧而
未詳余故封墓立石揭諸道左俾後人屬耳目焉
附仇明府題 崔公墓跋語

丙申冬仲來宰是邑甫下車訪求縣志杳無存者
後閱太原志得悉前令崔公盡節顛末因跡其墓
於城之東隅見其傾圮欲平悵然者久之夫墓以
人傳人亦以墓傳倖生之頭不如死士之壟久矣
因亟勒諸石而表其墓聊以誌不朽云爾

序

祝前邑侯齊公壽序

陳廷敬

古者觀遊宴饗講禮習射之地子弟之於父兄黔
黎之於君長皆可酌兕觥而介眉壽固不必其時
也後世始有生辰祝壽之文往往稱述其箕裘闋
閔之盛德行政事之美以輸其頌禱之誠期勉之
意亦庶幾友朋贈言之義焉余備員卿輔凡官於

朝吏於四方賢而才者余固樂得而稱述之以備
顧問以風天下又况加以及門之誼耶今歲孟
冬爲晉繁峙邑侯 齊君之初度其鄰封 州劉
子馮子徵辭於余蓋君鄉舉之時出於馮氏門人
萬子之房而庚辰王子濞澱主試事又君與劉子
所自出也馮子之先人曰懿生給諫與濞澱偕遊
於余門宜兩家之重有請也余惟繁邑僻處一方
凡吏茲土才大者卑視其地以爲不足爲不才者
又難於措置而不能爲君以英達敏練之才爲文

翁化蜀之治爬搔其利病而振興其教化無矜心
亦無怠事視其民欣欣然有起色也視其士振振
乎其有可觀也晉去 神京不遠久已耳君之治
狀若此而代人之述君曰繁峙自鼎革後祀孔子
廟蕪剝不治久矣君肅謁之下以爲是先師之所
式憑也多士之所具瞻也何褻越如是蚤作夜思
損衣減膳傾數年祿俸之積而一新之然後得以
安神靈而歆祭祀邑風氣敦龐間有志士特以漫
無指授故天荒數十年君乃嚴其程課勤其獎勵

躬爲講論如童子師戊子秋張子春慶雋焉邑士
瘠眈疲近又苦供意之煩也於是其民重困君乃
禁苞苴減繇役正征而外無所取而民始得以甦
息矣代與繁鄰比繁土多曠代之人耕其地而供
其賦者十蓋三四也繁之民思取其邑之丁役而
強代人供之君決不可曰繁民多積逋而代人急
公賦繁之所以未甚累者以代人爲之蔽也今若
此是重困代人而徹繁之蔽也於是繁民之計沮
而代人之謳咏者遍國中矣如君者真可謂有民

胞物與之心而視天下如一家者豈特堪一邑令
哉 在昔申甫之詩曰維嶽降神生甫及申雖爲
申甫咏也而詩人之意以爲國家休明昌大之運
山川靈異之氣篤生是人也余則以爲申甫之先
世亦必有幽隱之德和平之氣蜿蟺扶輿磅礴而
鬱積者今君之先世皆有隱德曾祖爲新野教諭
士之被其化者有西河河汾之思王父爲江浦令
有異政至今父老猶能道之父中辛酉副車懷道
抱德未竟其志母夫人和熊畫荻口講指授俾君

爲名進士又適

國家重熙累洽之世則所謂蜿蟺扶輿磅礴而鬱積者其在君乎其在君乎君行且報最 內召有日晉台垣而陟卿貳得大布其設施則余今日耳君之治者異日更將親炙其事矣余雖老尙能載筆以記之

擬修縣志序

邑令 郭 傑

繁峙左連五臺之勝右接三關之雄而滹沱之水發源泰戲山之陽汪洋千餘里而注諸海余聞而

繁峙縣志

卷之六

三六

且慕者素矣昔有事

輦下不能策蹇橐金以至其處祇懸之夢想中壬子孟夏承乏茲邑景移物換舊蹟蕪沒所謂勝者終未能遇之步履襟帶間而聞且慕者耿耿如昔也訛諸邑人取志稽焉僉曰原板遭兵燹殄滅無存邑是以無志嗟乎邑豈可以無志耶余急欲重梓之而蒞治無幾未果卽行時值 內閣衛公遵

旨條奏修輯各省通志彙成

大清一統志恭進

聖覽蒙憲劄頒縣余卽集紳士會議咸默然苦無成本
賴有廩生楊先培從逸生劉永祚處覓得成本曰
向者因亂失散又遭蠹魚侵蝕其半幸綱領存焉
似有待於今日之取也余忻然曰志可以成矣取
而次第閱之始嘆作者用力之勤而向之所謂勝
而聞且慕者一一披卷而知也考是書成於明代
萬厯丁亥歲迄今相距八十有六載矣昔之繁峙
非今之繁峙景移物換地瘠民漓甚相越也然其
間山川形勢疆圉險要地畝錢糧風俗人物今無

異於昔不猶彰彰在人耳目間乎苟不得博物洽
聞之士曷克當此重任遂於諸子中擇郭子需使
董成之余又囑曰生等不可執一己之私見顛倒
一邑之是非不博通乎人情物曲是爲私意通乎
人情物曲而不叅稽於往古徵信於近今雖公亦
私夫事有消長人有賢愚不博則愜不約則支徒
徇乎虛譽而不徵乎實後有識者亦將起而笑且
詈之矣况呈之諸憲且獻之

聖天子深居九重得以考八方之風雅九州之異同如指其掌可不慎與不佞雖固陋得藉以觀厥成焉是爲序

擬修縣志序

邑進士李子郁

士不知一邑又安知天下哉方其束髮受書沾沾焉人守一篋日誦一言不敢稍語戶外事此與蟲吟草間何異余昆季四人讀書家塾時每嘆息曰我家世茲士乃惡池戍夫未識其山川也後人大鹵未詳其疆里也世業如胥莫二氏之赫奕竟同

繁峙縣志

卷之六

三

談上世事豈非邑志之殘缺使然乎因於壬申冬論文之暇分占彙集思成一書時從堂兄子育好

綜核名實同懷仲弟

子邲

愛課桑麻則官師人物

田賦諸條二人是任同懷季弟

子邲

好網羅舊聞

余亦寄情山水則山川關隘祀典藝文諸條分厥

勞焉三年之間凡有一得卽質疑於泰來韓老夫

子丙子稿粗成邑侯

周向

余

索稿第恐一家私

言不足當合邑公是匿而未與反壬午

余

司鐸寧

郡閱盡經書史鑑遂取前稿仍其舊者十之三四

相爲增損者十之五六又殫二歲之力乃集成編
視向稍益方今

聖天子崇儒重道昔日戎馬奔馳之區亦遍沐以詩書
凡茲學宮所貯洵駕石渠而超武庫矣士欲知天
下事舍此其何由愧余有志而未逮也

擬修繁峙縣志序

前任周人甲
知縣

縣之有志志所見也志所聞也余少時從先君
子遊每談及某州某邑山川之勝人物之盛古蹟
之留遺從旁竊聽輒向往情深弱冠後卽好作山

繁峙縣志

卷之六

三

水遊甫壯飄蓬宦海凡足跡所經必繙閱邑乘訪
求名勝披荆棘拂苔蘚尋殘碑讀之每思卽所見
所聞者筆之書以信今而傳後卒未果癸巳秋捧
檄蒞繁下車卽求縣志僉曰前朝屢經兵燹版籍
無存已二百餘年矣其事其文詢諸故老皆茫然
間有能言者亦復影響舛謬旣不能得諸耳聞而
簿書鞅掌山巖險峻又不能親歷其地使皆得之
目擊悵然者久之粵稽疆域其山泰戲其川滹沱
關隘則有平刑北樓之險人物則有胥相經國之

才其於前代爲用武地而於山右諸邑爲雄且要
况經我

國家重熙累洽聲教覃敷遠軼前朝雖邊疆僻壤莫
不慕義向化風會日上比戶之間彬彬質有其文
此而無志掌故之謂何且夫作志之難也不可驚
虛不可蔽故不可逞臆不可徇私余不敏其敢率
爾操觚貽笑大方然徒以謏陋自安則昔之於所
見所聞欲筆之書而未克如願者今幸得所藉手
忍令一邑之事與文日就湮沒而不彰戾滋大矣

繁峙縣志

卷之六

四

爰於政治之暇細心讐校芟其蕪煩補其遺漏信
者存之疑者闕之閱一年而手錄成帙以待後之
爲政者考訂焉而付諸梨棗以垂不朽云是爲序
傳

韓義夫傳

周經

義夫韓氏鐸名代之繁峙人其先自陽曲來徙族
最盛詩書簪組自宋元迄今不乏祖某性至孝材
可以仕而以弗忍違親養隱居終身義夫能世其
德目不多讀然負氣尙義以人有過面責之雖頸發

顏不恤亶亶言論皆不外道理訟不平者來質一二語辨之莫不悅服去事有合義而人以為有禍患者則毅然身任之無難色故為其伯父陝西憲副公所竒愛憲副公致仕家居義夫事之如其父憲副公亦不一日舍義夫家事非與義夫計者不行繁峙僻在五臺山陰地險阻而人多質實憲副公家聖水臨滹沱既遠邑城復絕鄰里苟有寇盜之虞烏能守望而憲副公家居數年不聞焉豈其人之盡淳亦憲副公之廉譽素聞於人也歲值早

荒後加有司催科之橫有以艱匱為盜者戊子冬季劫憲副公家摧門垣秉火執刃鼓譟而入家人驚悸奔竄獨憲副公在室義夫居與憲副公頗隔越聞憲副公被執即驚奮起詈家人曰人無孝義禽獸不如鄉人有急尚相救援况在至親豈可委棄儻或遭禍何面獨生遂踰數垣赴救行且呼曰眾君可憐財產任為爾有第勿傷我伯父至憲副公室方見羣盜環刃逼公義夫遂怒恨執大挺逕前殺數人盜舍憲副公與之敵捶擊幾死盜去人

弔焉曰賊勢凶甚汝不畏作菹醢耶曰吾知有吾伯父耳伯父在吾雖死何憾憲副公竟無恙爲之上章於朝如請著令以義夫旌之爲世勸自後鄉人皆稱之爲義夫而不名云

宮生璿璣傳

教諭 董揚曾

宮生名玉衡字璿璣號五峯爲繁諸生居城東之李牛新堡父翼庭有子二長玉鏡廩生生其仲也少敦厚恂謹寡言行安而節和弱冠失怙奉母居依依膝下無間晨昏凡飲食衣服疾痛疴癢以意

承志官於繁爲著姓先世多隱德子姓林立率讀書知禮而君家爲最家故豐食齒蕃衍是時生當室治家以勤儉稱料簡鎖細必親生不忍兄獨任其勞奉母之餘以身先之小大內外布置井井十餘年來兄友弟恭門庭雍穆母亦怡然暢然康寧壽考終其身生年少兄十七歲生二子兄之子九女二生爲兄計以兄之第五子爲己子兄以口齒日繁嫁婚用鉅謂生曰吾雖丁多先人田產與弟共之吾曷忍以子女故累吾弟哉願析產爲二得

其一生不肯請析爲三與兄二而生受其一鄉人傳誦以爲美談惜生天不永年三十有九而卒夫人心不古家庭骨肉間有不可勝言者矣讀史載薛包田廬取其荒頓者奴婢取其老憊者每流連感歎以爲誠古之賢豪今安得有如古人者而與之砥礪風俗使不異於古所云也不圖於生見之余學官也生余學弟子員也師生之誼激揚之責余兼有之故爲之傳以爲士風勸

解

旱魃解

繁峙女怪或以爲旱魃非也雲漢之雅曰旱魃爲虐傳旱神也箋旱氣生魃而害益甚疏引神異經曰南方有人長二三尺袒身而目在頂上走行如飛名曰魃所見之國赤地千里一名旱母遇者得之投溷中卽死旱災消此言旱神蓋是鬼魅之物不必生於南方可以爲人所執獲者也韋曜毛詩問曰旱魃傳曰天旱鬼箋曰旱氣生魃天有常神人死爲鬼不審旱氣生魃奈何答曰魃鬼人形眼

在頂上天生此物則將旱天欲爲災何所不生而
云有常神耶藝文類聚引神異經語又云貉檢韻
書說文曰旱鬼也周禮有赤魃氏或作媧文字指
歸云女媧禿無髮所居之處天不雨周禮赤魃一
作友按此則旱魃神鬼之屬不產於人今女乃人
產不合也魃目必在頂俗云天恐雨下傷其目故
旱今日不在頂不合也馬端臨文獻通考齊後主
時死魃面頂各二目列之人痾中正以其非魃有
二目在面耳魃已異矣似魃非魃異之異者也前

漢書五行志皇之不極是謂不建厥咎眊厥罰恒
陰時則有下人伐上之痾後漢書五行志同而引
洛陽上西門外女子生兒兩頭異肩共胸又引劉
倉妻生男兩頭共身以前一事爲董卓之應魃主
旱而兩漢志主恒陰其不合較然矣前漢書傳又
言凡草木之類謂之妖妖猶天胎言尙微蟲豸之
類謂之孽孽則牙孽矣及六畜謂之旤言其著也
及人謂之痾痾病貌言寢深也故此女怪謂之人
痾其災異在山東牛怪上

銘

觀我堂銘 并序

邑令 王三益

堂曰觀我矣何銘也銘夫不知爲我而觀之者也
蓋民不自民民卽我也我不自我我卽民也况勢
可搖我利可誘我榮辱可奪我情僞可眩我我不
自觀而徒人之徇則人將議我之後而我何以爲
人之觀是故登斯堂也先求所以自觀勿使人之
議其後斯爲天下之達觀矣

繁峙縣志 卷之六 聖

賤遠近分殊情均絜矩之道何關於人我之喜怒
爲人禍福我之噓嘻爲人寒燠一念可忽蜂蠆有
毒我譬之鑑鑑物惟明我譬之秤秤物惟平垢或
未刮妍媸何分星苟未定輕重奚庸無我卽忘有
我卽偏有無之間從乎反觀我旣觀矣此心其安
榮我辱我是在司銓

劉元帥碑銘

學正 王子成

昔遭時變六合豺狼風塵競起衆庶流亡猗與劉
侯立志非常披堅執銳剪荆棘除荒鵬搏鯤化虎視

鷹揚身爲舟楫濟川梯航有子代職視民如傷政
無苛刻何用不臧迺孫繼立益顯榮昌簪纓三世
聲名四方松柏蒼蒼背擁崇岡卜塋於茲銘旌皇
皇孝子慈孫繼續不忘

附貢生澄齋高君墓志銘

董揚曾

余初鐸繁同官王公道高生之文行賢且優時余
尙攻舉子業與諸生之文學有名者爲文會而高
生與焉生貌不踰中人行方而語樸樂與人爲善
爲文自出機軸不投時好故屢躋不售居邑之東

留屬家故豐村人多賴以舉火者生以祖若父遺
集遵行不倦無事不入城來必視余留連竟日或
夜分不遽去乾隆癸丑余以病歸後復來繁時闕
八載矣過東留屬而訪之生喜曰先生吾故人來
何幸耶乃備述邑中諸生之繼起者某也賢某也
才勸余培植之家有塾教其子並教人之子詩書
之聲不絕嘗謂余曰讀書識得道理則知足安分
終身受用不盡居數月來告其左脇時作痛余時
慰以善調攝間留小酌飲不過數卮食則一盂盡

不復餒也余心竊憂之孰知竟殞其生哉嘉慶癸亥十月十三日卒年五十有七卒之前一年援例入成均嗟呼生與余齒相若道相同生之善聞於一鄉余惟學未成而道未著生獨愛之重之則是惟生知余惟余知生而生且不幸死矣悲夫越乙丑十月將葬其孤來乞銘余不以不文辭生名瑩廊字蘭生號澄齋其先隴西華陽人明洪武諱就者遷於繁會祖明乾祖成章考天錫庠生妣侯氏世有隱德君娶王氏再娶張氏子慎修廩生醇謹

而文女六四適人孫男一君家四世單傳人皆危之而卒能世其業善人之獲報也信夫銘曰傷君之賢不永其年說君之世皆謂丁單詎天相之宗祀綿綿君有令子足爲宗亢徵我銘詞納諸君壙南山之麓北山之陽卜君兆宅旣固旣康

附繁峙縣考

邑增 韓復起 生

山必崑崙水必星宿豈舍近而求遠哉牽一髮而頭動蘇子固嘗言之矣繁峙僻處邊陲真太倉之一粟渺乎小矣然冀并恒遞有源流晉代趙互分

本末分屬則雁門太原不一也名稱則鹵城葭人攸分也蓋嘗總而論之九州首冀帝堯之所都也北盡高闕陰山而繁峙猶在其南浩乎帝德之廣運矣舜分冀州之北爲并合天下之州有十二而晉代汾潞皆并也周成王九年封弟叔虞爲君侯仍堯都之舊號子變爲晉侯因晉水也晉大夫有趙氏至襄子遂滅代而有其地代不詳其始然名甚久而地甚廣觀戰國每稱燕代則東與燕連矣而蘇秦說秦王則曰北有代馬之饒是西又接秦

境故綱目曰并肆汾蔚雲朔定恒皆代也則今之州治尙未得十分之一耳初襄子望代山川之美

元年遂登夏屋

今代州草梁山

誘代王使廚人以金斗殺

之封伯魯子周爲代成君後李牧居雁門功著於邊此郡縣未分以前之大略也秦郡縣天下邑屬雁門郡繁峙之名始此而所治則未詳也漢時縣有三繁峙名仍舊而城則在渾源西崞口山屬雁門不改一曰鹵城屬代郡一曰葭人葭人者晉之舊邑也左傳以逼陽子納諸葭人又高祖攻反韓

王信於代自稜人以往至武泉時屬太原至文帝
爲代王平陽以北皆其封邑州縣固未之改也新
莽改繁峙爲當要鹵城爲魯府後漢稜人罷鹵城
改隸雁門晉鹵城罷復有稜人亦隸雁門二縣時
有廢置而繁峙獨如故焉北魏以繁峙爲郡仍有
繁峙縣崞山縣爲屬邑而以恒州統之郡而見統
於州非常制也東魏僑置武州北齊改爲北靈州
北周郡縣俱廢隋開皇十八年復爲繁峙縣隸雁
門仍治於前僑置武州之所故志謂移治於武州

城第時已一統而猶寄吐京郡齊郡新安郡於邑
何也且三郡又何時革乎唐縣如故武德七年以
靈邱飛狐寄治城中貞觀元年分天下爲十道而
邑屬河東路五代猶雜亂難紀至後周地爲劉旻
父子所據宋太平興國四年平太原得十州一軍
邑在焉屬代州堅州之名金元共之而金隸太原
元隸冀寧不無少異焉明洪武二年改堅州仍名
繁峙縣屬太原府若夫大啟土宇幅員式廓我
朝建萬年不拔之基

順治元年大兵取太原則五色雲現因置太原府
而以代州五臺繁峙崞縣屬之雍正二年直隸代
州且立學棚士子免於奔走而王道平平洵哉四
達不悖此其建置之善不遠過漢唐而與唐虞同
規乎是爲考

附證說

士大夫居鄉缺失證

糜有象

士大夫退居林下優游泉石以養餘年事事皆可
度外置之惟有君親師三者未可一日而釋諸懷

繁峙縣志

卷之六

辛

也卽云休沐解綬是不任職位已耳非併將朝廷
而置之也今士大夫居家者於親無可說已於君
師大有缺矣竟無一人能深察者試言之士大夫
一自致仕居鄉以老是委雖遇長至正旦萬壽千
秋各大典漠不相關及問其故則曰致仕居鄉從
前相沿皆不與也噫致仕居鄉果老病不能起動
禮儀通不與聞方可徜徉自便今觀在籍休致告
假候補等項每遇節序誕辰與官長往來拜祝及
遇大節聖壽偏不慶賀凡遇私家封誥爭先遠接

及遇頒發詔書偏不郊迎厚薄逆施輕重違背莫此爲甚且告老大臣朝廷尙有頒賜之典是朝廷不因致仕而忘臣子臣子偏因致仕而忘朝廷矣捫心自揣夢寐難安如謂致仕居鄉謝絕朝儀不思鄉黨所記夫子吉月必朝服而朝夫非夫子致仕居鄉之日乎其必朝也非夫子念念不忘朝廷之明徵耶凡爲臣子孰無此念奈何昧於從前缺失之陋習不法吾夫子千古昭垂之儀型哉此子數年來兢兢不容自己之懷一遇聖誕大節恭設

香案望闕叩頭上法夫子遺意下展老巨愚誠此心求安孰云爲過特爲拈出與同志共爲證明更有不忘先師之說惟有向文廟中以盡其誠蓋文廟非他廟可比無敢私建私祭除朔望行香春秋祭祀外封閉嚴肅誰敢以香楮牲醴與諸神一體褻瀆而爲鄉紳貢舉者一自策名出學絕迹宮墻終身再無人廟拜謁之日夫朔望旣不行香春秋又不與祭不知更向何地更因何時更備何物以展昭事誠敬之意而祭丁之典屬在鄉紳貢舉各

有所頒胙肉夫鄉紳貢舉既不與祭何以受胙此
中必有缺失奈何習而不察且春秋二祭鄉賢祠
有祖先位者官師此夜在彼行禮而子孫熟睡其
家於心何安此子每逢祭丁之夜不能安寢擬隨
行禮此心方慊及讀說郭多書內載崑山呂寅叔
先生行實一歎乃先得我心同然喜不自勝按先
生家寒授徒爲養平時不出戶庭每歲春秋祀先
師必夜半預詣學前候隨班行禮禮畢輒去不令
縣官知歲歲如此雖陰雨不輟人皆稱爲篤厚君
子效者比比至今不衰抑先生往矣其芳行昭垂
若是也總由一念不忘君親師致也予愧不及前
賢幸此心此行同也特立此說以告敦在三之義
者

白雲寺三松說

糜有象

白雲寺三松列植釋迦殿前中左二株圍各一丈
五尺右一株差小然其高皆數丈也膚理瑩膩如
雪蓋山中萬松皆然而此其大者一耳山中人習
見之不以爲異也余嘗陟代嶽中道有五松柯幹

尋常非有殊異而說者謂此秦皇所封五大夫也
密縣有白松一株觀者異其色爲之歌詠爲之繪
圖以爲宇內第一松矣抑豈知此山有三松乎玉
骨凌霄瓊枝插漢視岱嶽五松不啻藐小方之密
縣彼一此三其數不敵也然數千年來未有稱其
奇者蓋托根巖寺岑寂巖嶮無論車馬所不到而
文人墨客亦罕有涉其境者安得與泰山密縣同
被榮名也余因而知天下士矣彼其據高位履亨
途卽一材一能皆可樹勲名而垂竹帛彼山林高
隱之士閤才塊抱老死無聞者可勝數哉四皓之
才未必劣於三傑桐江釣叟且超雲臺而上之若
匪高光之世亦泯泯無聞也吾於三松乎有感

詩

臨滹沱見入蕃使

唐李益

漠南春暮到滹沱邊柳青青塞馬過萬里關山
今不閉天家頓許郅支和

北臺

宋張商英

北臺高峻碧崔嵬多少遊人到便回怕見目前
生地獄愁聞耳畔發風雷七星每夜霑風頂六
出長年積澗盃若遇黑龍靈燥者人間心念自
然灰

繁峙縣志

卷之六

書

瓶形嶺早發

金元德明

海雲蕭瑟雪花乾人在羊腸百八盤閒客不知
名利苦見時應作畫中看

滹沱晚渡

明章懋

風捲流澌晚作波行人猶說漢滹沱誰知天上
乘槎客不用堅冰也渡河

夜抵瓶形關

邢大道

猶龍紫氣自西來入夜關門帶月開俗吏只今
非尹喜青牛亦識是仙才

食滹沱魚戲作

邢大道

滹沱魚尾真全赤况復車輪敗後炊三輔周遭
二千里從今魚樂也應知

題辣

王 鑰

曾將踪跡驗圖經出沒知時信有靈莫訝近來
年不稔一泓深處靜潛形

過胥相墓

甯圖公壽

亭亭華表映朱門始見征西宰相尊下馬讀碑
人不識夷山高處望中原

繁峙縣志

卷之六

五

北樓留別許叅戎

楊 巍

客路看層嶺關門入暮秋霜餘山盡出澗凍水
還流君倚將軍樹余慚季子裘邊塵今幸少不
必動離憂

圭峯寺

王 傅

已覺馳驅苦來從勝地遊看山疑樹出陟險喜
僧幽清磬隨風落碧泉帶月流憑欄新得句不
負此登樓

入援京師過沙澗驛

楊守器

仗劍重關外寒雲接陣橫干城思國士戎服嘆
書生李牧終難效廉頗老未輕古來征戰士留
得幾人名

宿沙澗驛

周宏禴

西來車騎好誰共雲鎖關門近幾重拾字何須
尋補缺採薪還自問開封山中介子書難就江
上陶潛酒未逢會得禪心無去住五臺月朗照
高峯

北臺叶斗峯

釋覺同

繁峙縣志

卷之六

五

北來乘輿上崔嵬天外捫蘿鳥逕迴寒谷未秋
先落葉陰崖不雨自生雷低懸銀漢星千點俯
視滄溟水一盃笑指文殊棲跡處幾經劫火不
曾灰

南峪口雨後取道上五臺

陸深

六月蕭然似晚秋登高重整木棉裘卽看滿澗
泉初出知是前巖雨乍收碧嶂旋隨孤鳥沒白
雲長傍古松留幽芳一路無人採何處三山與
十洲

九月正覺寺登高

王三益

如帶滹沱抱郭流夕陽紅樹萬山秋黃花笑插
烏紗側白草遙看紫塞愁烽火三邊仍未息循
良兩字愧難收催租莫敗高人興欲起蒼生爲
解憂

重遊圭峯寺

楊順

溪橋曉度入山幽古寺雲深記舊遊勾注遙從
關外落滹沱近向檻前流時當上已成春服客
有狂歌勸酒甌日夕不煩催去馬塵纓還濯碧

繁峙縣志

卷之六

七

纂頭

圭峯寺

吳璞

石壁山雨潤松逕溪雲結巖溜下龍唇圭峯起
鳳闕捫蘿傍翠岑披薜讀殘碣滄桑幾變更山
靈爲我說

滴水崖

梁志學

靈源一脈暗相通傾瀉明珠顆顆同可惜無人
收拾得隨風飄泊任西東

滹沱河

朱夔尊

滹沱河上流，嘶急騎馬春。冰滑可憐百尺浮橋，
空斷板孤城。哀角動荒烟，愁顏送老。飢寒日絕，
塞因人。兩雪邊轉憶江鄉，多樂事。花濃齊放五
湖船。

鐵腳山

王 鑰

鐵腳名山古盤根，獨據雄峻。嶒爲邑鎮，突兀倚
蒼穹。壑大無佳木，巖高只短蓬。城中三百戶，樵
爨往來通。

玉斗泉 今名三泉

王 鑰

繁峙縣志

卷之六

五

靈源名玉斗，恬淡自年年。淨脈通三竇，清光瀉
一川。落花紅泛泛，觸石綠濺濺。派與滹沱合，朝
宗日出邊。

北臺

王 鑰

危峯疊嶂勢崔嵬，曲徑縈紆百折迴。雨過臺端
疑凍雪，風生澗底吼晴雷。平臨霄漢如超世，俯
視懸山若覆盃。多少氣豪名利客，來遊心火便
成灰。

國朝

和笠洲清涼石道上韻

周銘詒

祝釐靈鷲路紆漫羣峭摩天秀色寬
靈霖初停飛爽籟空濛乍斂散輕寒
詩敲霽晚儲囊佩人眺高秋入畫看
遙想嵩呼隨虎拜上方香繞碧闌干

重過凌雲口

桂敬順

瀑雪年來夢巖花此日探石蹲駭伏
虎桑綠恰宜蠶霖雨三春足清泉一
掬甘前峯思少憩記取舊蒲庵

繁峙縣志

卷之六

五

從繁峙往渾源路經圪坨峪作 顧學潮

不辨東西路行行又一村黍頭低雨氣
山意淡秋痕曹子千金帚莊生五石樽
浮雲看世事好共月黃昏

課士來十八人口占一律 史珥

共挾封姨伴雄文疊九霞尋幽攀石磴
按調拍胡笳松夢占應吉瀛登路未賒
天門客往返玉李秀春華

送北樓王千戎戍雲中

侯繼周

策騎嚴冬到迎門笑口開酸風當冷面和氣拂
醇杯緩帶真儒雅雄猷實將才雲中征戍去霜
獵射鷗回

平刑關懷古

周人甲

城頭笳鼓送殘昏戰壘烟塞接雁門天許完顏
成割據會從關上數中原

秋日登繁峙市樓有懷

周人甲

傑閣俯滹沱登臨意若何村烟連樹遠秋色入
城多塞近寒偏早山高雁易過家書憑汝寄爲

繁峙縣志

卷之六

卒

報體安和

楊七郎墓

周人甲

殘碣苔深繡斷文路旁指點七郎墳岳家父子
楊兄弟三百年來共戰勲

望滹沱南岸舊址懷遷城諸君 周人甲

滹沱南遶古城隈樵牧衝寒去復回霜冷頽垣
餘瓦礫沙埋斷碣長莓苔荒唐故老談前事區
畫何人識異才雉堞無存喬木在甘棠應是舊
時栽

楊六郎城懷古

斷垣衰草野狐鳴
會說六郎此駐兵
千載風烟鎖舊壘
三軍旗鼓剩荒城
雁門重鎮雄西北
楊氏邊勲勒弟兄
鐵馬不嘶烽火靜
至今惟有塞雲橫

望南口

侯繼周

蔓草青青積石寒
馬頭頻點漫河灘
暮烟一簇凝南口
嬾數山峯欲解鞍

十景詩

繁峙縣志

卷之六

空

滹沱落石

李子郁

邑進士

連天巨浪欲長吞
水落不會有石存
漢使爭傳危渡口
晉人早已識河源

峪口晴嵐

雨餘淡曉淨無塵
峪口晴時分外新
百仞嵐光重到眼
幾回過此獨留神

筆峯拱秀

周人甲

繞郭山多暮色蒼
崎嶇石磴入羊腸
筆峯可是生來巧
寫出飛鴻字幾行

圭峯古栢

塞雲深處辨花之百丈虬龍影倒垂神物飛騰
終有日穩看風雨會來時

巖山疊翠

晴峯高聳夏雲收古木陰濃翠欲流恰是倪迂
新畫稿輕烟淡抹碧山頭

臺背冰巖

六月重陰迓北臺炎威會不到林隈乾宮合是
寒凝位莫道冰山勢易摧

繁峙縣志

卷之六

三

三泉湧列

兩岸青青柳色妍靈源映澈碧連天道元注水
微嫌畧不載孤山品字泉

鹵城現影

料得天公欲雨情烟雲變換鹵王城層層雉堞
都如繪海市樓臺幻景成

孤山晚照

林巖盡暝失羣山斜挂桑榆映小鬟可是天心
憐孤特夕陽猶照翠微間

峩嶺秋紅

百仞層峩接遠空秋來不與衆山同雁門多少
征人血染遍峯頭草木紅

筆峯拱秀

筆架嶙峋勢不羣舉頭直許逼青雲高臨沱水
波三折遙寫雁行字八分莫道邊關全用武須
知

盛世本崇文洪爐鑄就峯巒巧秀毓人間翰墨勳
圭峯古柏

古寺幽深徑轉螺亭亭翠柏鬱山阿前朝歲月
銷磨盡邊塞風霜閱歷多鱗甲生成形變化羽
毛豐滿影婆娑秦封未受真君子縱到嚴寒不
改柯

巖山滴翠

蒼苔滿徑草成茵萬仞峯巒豁翠輦深樹浮嵐
晴帶雨邊山入望夏猶春沾衣欲濕容如滴印
屐無痕態更新抱澗流泉都着色隨波皺綠到
前津

臺背冰巖

仄徑崎嶇不易登北臺高聳白雲層寒崖慣積
三冬雪陰壑猶餘六月冰澗底石都成玉骨佛
前水合映銀燈遊人到此塵心淨細把華嚴問
老僧

三泉湧例

泰戲山前品字開清泉并注碧澗洄隄邊樹綠
三春柳澗底石青萬點苔藻荇波流分復合板
橋人踏去還來塵纓許我臨溪濯不是滄浪意

莫猜

孤山晚照

平地孤峰聳碧霄龍沙日落景偏饒渾疑砥柱
中流立遮莫寒山野火燒僧坐白雲遲度磬鴉
翻紅樹緩歸樵夕陽谷口真如畫好倩倪迂着
意描

峩嶺秋紅

商飈一夜起晴空霜染山頭老樹紅白草遙憐
雞塞北紫巒獨映雁門東鮮妍半幅開圖畫妝

點三秋賴化工爲憶江南當此日寒溪處處落
丹楓

筆峰拱秀

祁 琛

人傑從知地有靈筆端精銳走雷霆自從一畫
開天後留得三峰萬古青

鹵城現影

林間霽色勝蓬萊雉堞層層隔水隈幻景果能
存故國鹵王何事不重來

孤山晚照

繁峙縣志

卷之六

奎

夕陽高掛一峰青萬壑千巖入窈冥樵子不知
天欲晚兩肩斜影出松肩

臺背冰巖

北臺高聳接蒼茫萬古寒冰一壑藏我亦清心
堅自勵不知人世有炎涼

滹沱落石

宮三詔

從來沱水不東流肯向支河最下游力挽狂瀾
爭上際能教頑石亦低頭

臺背冰巖

此日登臨古北臺行人疑向玉壺來萬峰都在
光明裏處處梅花對面開

筆峰拱秀

侯効職

山頭矗筆意亭亭可有仙人到勒銘暗點荒邨
蠶葉綠留題春草雁門青誰邀天外三峰伴自
寫雲中五岳形借手書空緣底事烟霞作字毓

鍾靈

巖山滴翠

萬巖層出似芙蓉拾翠人來第一峰路已到頭

繁峙縣志

卷之六

奕

猶百轉山纔開眼又千重疑看綠石成飛羽誤
認蒼苔作老松搔首青天攜謝句籐蘿倚仗水

淙淙

白馬石

李光乾

白馬將軍去幾年五花獨自臥雲烟但逢叱石
成羊客不許秦皇試一鞭

遊秘魔巖

腳踏佛門總是空無端色相似屏風不生不滅
魔緣盡留待遊人自慧通

賦

詠圭峰寺澗泉滴水賦

知縣 王 經

寒脈穿岩竇深然出石窟涓涓如噴玉滴滴似
垂珠傾寫琴音噪潺湲瑟韻徐竟宵鳴席枕永
晝響山居萬古何嘗息千年未始除風吹不斷
絕月照更相須崇壁峰前落茂林樹下需瀟灑
超塵境耿介拔俗塗深秀岑巒繞幽香花草俱
喬松傍舞鬱怪柏止盤紆瑩徹全明鑑澄清異
濁渠旦凝舍壁翠夕射斗牛墟上下天光映往

繁峙縣志

卷之六

七

來雲影浮源頭活水瀟池內走泉瀦灌漑施無
盡飪烹用有餘每頤附鳳客能養化龍魚迥與
凡流別頓比世湍殊或假爲霖雨亦足潤槁枯
慰滿人人望滋培物物蘇淺溪難久遏僻壑豈
終儲溢坎行自洌盈科進必舒屈轉離澗谷滌
通達江湖浩浩聲愈大洋洋勢莫拘朝宗直至
海翻浪上冲虛滔浴日星垢包乾括坤區

寒天向日賦

糜有象

乙巳之冬臘月哉生明之次日天色晴明日氣

融和陰雲不作冽風不生三冬氣候宛如九十
春光野叟就日於臘天伏地軒下藉草爲毡移
石作枕偃仰屈伸於其上但見日白天青照徹
五臟六腑平日閑思亂想頓覺冰消霧釋一段
天機自是活活潑潑因思前賢雲淡風清天光
雲影一切吟風弄月之句其光景趣味大抵不
過如斯因題曰潛身在光天化日之下遊神在
陶唐羲皇之上棲心於高明廣大之域混迹於
流俗濁世之中清風明月是吾友前賢往哲是

繁峙縣志

卷之六

矣

吾朋民安物阜是吾願春風沂水適吾情粗衣
淡飯隨吾分不貪不妒畢吾生題罷藹藹然一
夢不知天地間之有野叟又安知野叟之在天
地間

雜體

泰戲山 七言古

王 鑰

庚辰大都回會上泰戲峰群山四圍台笑兀峙
當中北望恒山特秀拔南瞻五頂何蒼葱平刑
關險隘太行勢巖從河朔限表裏趙代分西東

七峰巖嶽青玉立一川蜿蜒滄溟通幽壑晴雷
闐轟吼絕巘怪石巘岈雄乾坤塊北大但見紅
塵滾滾飛溟濛紛紛掌上走雲霧颺飄腋下生
天風是時景象難爲狀恍惚平地來崆峒有如
仙子拔宅凌霄漢又如禦寇駕鸞遊穹窿頓忘
形骸起太古那知詩思無終窮此行清興不寂
寞賴有朋輩襟懷同

鹵城 七言古

鹵城故址沙河東千年毀圯生蒿蓬精靈隱約

繁峙縣志

卷之六

六

闕隴祺常時出現烟霞中須臾雲氣彌長空甘
霖大澍遐邇同四郊沾足慰疲癯農人預卜時
年豐

仙雞歌 并序

元德明

繁峙義興鎮酒家韓氏子畜一雞以善鬥雄
其鄉一日敵家以藥飼雞使不知痛求與韓
雞對久果被傷口下頷不收垂死矣一賣藥
道人過其門曰我能活此韓欣然使療之里
中諸兒隨看者一二十輩皆使向壁立道人

以雞置籠中探手良久若摩拊然者已而取
瓢水喫之置瓢籠上卽出門兒曹怪其久不
還竊視之雞喙已復生矣道人布袍草冠腋
下懸青囊落魄嗜酒夜宿寺閣上韓氏子與
里中人奔走求之並所臥草薦不在矣是時
明昌七年仲規弟爲此鎮酒官予亦在焉作
仙雞歌以記之

老雄健鬪夸擅場韓郎抱歸神色揚豈知黠兒
出徼倖毒手一發不得妨毳毛散灑尙可養利

嘴一哆何由張青囊道人何許來自言救藥吾
有方垂鬚喫水濯殘血半喙隨手生新黃筠籠
半開聞膈膊草冠已往徒驚忙神仙世有寧虛
荒惜哉詭激不可量世人鷲勇天且劓况於物
也恣強梁敷榮枯枿變金石未若與世鍼膏盲
何須變化示狡獪知君辦作淮南王蓬萊東望
雲茫茫愛而不見心爲狂刀圭不願接凡骨且
欲共醉無何鄉

浩浩滹沱水蕭蕭戰馬秋渡河當日事將軍麥
飯酬繁峙城東百餘里秦戲山下沱源起起處
細流本涓涓一泉三窟如鼎峙活活噴出飛浪
白萬派奔騰搖空碧大波小瀾縈黃沙洗盡紅
塵灌紫陌脈穿岩底隱復現激湍高湧雪花堆
流入郊原田萬頃家有秧鉞傍水栽我來正值
春日暮扶杖臨流閒獨步春老潭邊花自舞山
花亂落如紅雨花落水面水流花宛似桃源入
漁父漁父鼓棹訪歸途執我手問溯源無年年

溯源尋槎去但見晝夜如斯夫

孤山晚照

天邊日西落林盡鴉將歸縹緲碧雲端匹練掛
斜暉君不見沱陽東去百餘里巍然峭立孤山
起孤山不與衆山連一朵芙蓉出沱水特留晚
照翻古渡照盡行人崎嶇路羊腸鳥道明昧裏
忽明忽昧日將暮牧童歸兮雞栖埭村落隱隱
柴扉閉一抹淡影上簾鉤晚霞灼爛天正霽迴
看絕壁孤峰巔猶銜日光銷餘烟他處已隨孤

驚散此地重明翠微邊孰逐之於夸父孰繫之於青蓮豈魯陽揮戈而倦顧豈虞公指劍而流連吁嗟乎桑榆晚景盡若斯駒隙之間目送之寄語志士陰可惜夕陽紅處不多時

祥異志

祥異

洪範庶徵備言休咎春秋一冊於雨雹隕霜無麥無禾以及地震日月食無不大書特書反時爲災反常爲變君子修德可以回天爲政者其可忽諸繁峙前隸雁門郡凡祥異之事載於史傳者不多見自元魏以來亦間有可考者余故摘而錄之以備一則云志祥異

北魏宣武帝延昌元年四月庚辰并朔州地震恒

繁峙縣志

卷之六

七

州之繁峙桑乾靈邱肆州之秀容雁門地震陷裂山崩泉湧殺五千三百一十人傷者二千七百二十二人牛馬雜畜死傷者三千餘

宋祥符六年有大鳥從五臺山飛鳴來過所至有黃鳥四白鵠四從之是歲大稔

元世祖中統十七年十一月太原路堅州進嘉禾六莖

明成化四年六月大水太峪口山崩水溢數丈其聲如雷木石隨下有巨石橫澗中圍五尺厚二丈

餘白色粉質或疑爲老松所化云

嘉靖七年春大疫秋多虎災十二月流星隕光觸地有聲墜而復起入斗口至日出始沒

嘉靖三十二年俺答掠繁峙

萬曆十五年大旱

萬曆三十二年夏六月大水

萬曆二十七年六月民李宜妻牛氏一產二女頭面相連手足各分

國朝順治五年劉遷作亂據城大肆焚掠

繁峙縣志

卷之六

七

康熙元年旱禱泰華池雷電大作空中墜冰長丈三尺濶七尺厚四尺上覆茅土

乾隆五年邑東山會等村飛蝗食禾 孫令躬率

邑民急捕方止十一月地震

十年五月初十日大雨雹河以南樹木一空 邑令周急發倉助粒秋乃稔

十七年冬沙鷄從北飛來千萬成羣十八年免租

養老

二十一年六月地震八月大水李牛村被災

二十八年李牛村牛產犢一身兩頭

三十年二月與

梓潼帝君獻戲忽山雉飛集樓屋脊移時不去是秋
州人居縣者姚秉哲掄元

五十九年大水凡被災村莊發帑賑濟

嘉慶六年大水凡溷壤地畝發帑修復

道光十二年大荒境內粟貴 林邑侯勸捐助賑
各鄉紳士勇躍捐資除以捐數較多者詳請議敘
外其餘沙河紳士捐粟數石至數十石捐錢數千

繁峙縣志

卷之六

七

至數十千者甚衆是年饑民賴以生活洵爲好義
其捐施各紳士姓名暨錢粟數目沙河本鎮廟宇
已有梁記永垂不朽志內不及填載外有永興三
會各村自行捐施本村賴以生活者不少至今稱
之

十三年歲豐

十四年大旱

十六年大旱

繁峙縣志卷之六終



